

Xtiidxza'c Jesucrist ni bacaa San Matew

Xdiaagulal Jesucrist (Lc. 3:23-38)

¹ Guie zëéd laj ree bén naj xdiaagulal Jesucrist, bén zëéd ree loj xdiaa rey Davi në loj xdiaa Abraham.

² Abraham brier laj xdad Isaac, abi' Isaac gojc xdad Jacob, guiáad Jacob gojc xdad Judá con ree bijchaman. ³ Dxel Judá cwa'man Tamar, abi' guyu xi'n reeman brier laj reeman Fares con Zara. Fares gojc xdad Esrom, Esrom gojc xdad Aram. ⁴ Aram gojc xdad Aminadab, Aminadab gojc xdad Naasón, Naasón gojc xdad Salmón. ⁵ Salmón gojc xdad Booz, guiáad xniaa Booz brier laj Rahab. Booz cwa'man Rut, abi' xi'n reeman brier laj Obed. Obed gojc xdad Isaí, ⁶ Isaí gojc xdad rey Davi. Dxel rey Davi con bén goc lacheel Urías guyu xi'n reeman brier lajman Salomón.

⁷ Dxel Salomón gojc xdad Roboam, Roboam gojc xdad Abías, Abías gojc xdad Asa. ⁸ Asa gojc xdad Josafat, Josafat gojc xdad Joram, Joram gojc xdad Uzías. ⁹ Uzías gojc xdad Jotam, Jotam gojc xdad Acáz, Acáz gojc xdad Ezequías. ¹⁰ Ezequías gojc xdad Mainán, Mainán gojc xdad Amón, Amón gojc xdad Josías. ¹¹ Dxel Josías gojc xdad Jeconías con ree bijchaman, tiamp ni guzu ree bén Israel Babilonia zi'c bén yu' ladxguiib.

¹² Chi ma barii reeman Babilonia lod guzu reeman zi'c b́en yu' ladxguib, gojl Salatiel, xdadaman gojc Jeconías. Dxel Salatiel gojc xdad Zorobabel. ¹³ Zorobabel gojc xdad Abiud, Abiud gojc xdad Eliaquim. Eliaquim gojc xdad Azor, ¹⁴ Azor gojc xdad Sadoc, Sadoc gojc xdad Aquim. Aquim gojc xdad Eliud, ¹⁵ Eliud gojc xdad Eleazar. Eleazar gojc xdad Matán, Matán gojc xdad Jacob. ¹⁶ Jacob gojc xdad Xiëb lacheel Li. Dxel Li gojc xniaa Jesús, b́en la gajc Cristo.

¹⁷ Zian gojc, diizd xtiamp Abraham xt xtiamp rey Davi, guyu chidaj generacion, dxel chidaj generacion guyu diizd xtiamp rey Davi xt tiamp ni guzu ree b́en Israel Babilonia zi'c b́en yu' ladxguib, abi' zachidaj generacion guyu diizd tiamp ni barii ree b́en Israel Babilonia xt chi bidxin dxej gojl Jesucrist loj guidxliuj.

Gojl Jesucrist (Lc. 2:1-7)

¹⁸ Ze gojc gojl Jesucrist: Li, xniaaman, ma naj tia' Xiëb laaman. Per chi gad reeman tia' lasa', guyu xi'n Li por xSprijt Dios. ¹⁹ Abi' Xiëb guial najman benza'c, ad guyëntaman nusa'nxtuman Li. Beenman xgab niro'nladxaman laaman ralanzi. ²⁰ Per la'tgaj cayünman xgab zian, balüüloj tijb xianjl Dios lojman loj bacaal, rëb anjl guin lojman:

—Xiëb, xdiaa Davi, ad bal rdxebil tia'l Li, din xindo nüüm por xSprijt Dios zëëdix. ²¹ Tijb xindoniguaaw gac xi'n Li, yagu'l lajx “Jesús”, din por laax gra ree xbejnx gac perdon xtol.

²² Gra ree ni guie gojc persi guzojb xtiidx Dios zi'c gunee b́en badëë xtiidxaman loj ree bejn, chi rëbaman:

²³ Tijb biinxdüb chu' xi'n,

abi' chi galix grii lajx Emanuel,

rën guiëban: Dios za'në dunuj ree.

²⁴ Chi baban Xiëb, dxel beenman zi'c gunabee xianjl Dios laaman, cwa'man Li, ²⁵ per ad bagaalt Xiëb laaman xt chi bidxin dxej gojl xi'nman. Dxel bagu' Xiëb laj xindobëz guin JESÚS.

2

Bignaj ree b́en rajc Jesús

¹ Jesús gojlaman Belén tijb guiedx naaz Judea, tiamp gunabee rey Herodes. Dxel bidxin ree b́en rajc, Jerusalén, laa reeman naj magos, za reeman niz oriente. ² Abi' gunabdiidx reeman, rëb reeman:

—¿Con xrey ree b́en Israel, b́en ma gojl? Din dunujn diizd duladxan baguiaan xbajlaman xanyabaa, zeel zio'pan din yazuxiban lojman.

³ Chi biguien rey Herodes zian, dád guyunawëëgaman, nëgajc gra ree b́en Jerusalén guyunawëëg. ⁴ Zeel gurejdx Herodes gra ree bixhioz rniabee ree bixhioz, në ree mextr rajc ley, persi gunabdiidxaman loj reeman banguin naj gal Cristo. ⁵ Dxel rëb reeman:

—Belén naj galaman, tijb guiedx naaz Judea, din ze bacaa b́en badëë xtiidx Dios loj ree bejn:

⁶ Läj Belén, tijb guiedx naaz Judea, majsi guiedx dobëz najl loj gra ree guiedxro' naaz Judea.

Per lasajquil din luguiedx Belén guin grii tijb b́en nabee
guiniaj t́eeman da b́en Israel reen.

⁷ Dxel ralanzi gurejdx rey Herodes b́en rajc guin ree, persi gunabdiidxaman goc balüüloj bajl xanyabaa guin loj reeman. ⁸ Abi' guxhaalaman laa reeman Belén, rëbaman loj reeman:

—Gol wej, gol bignabdiidxchaaw graczi xcwent xindobëz guin. Abi' chi yadxejlidi laax, laa gol bagojn gajc naj, din në naj chigzuxib lojx.

⁹ Chi gulox rëb Herodes loj reeman zian, dxel zë reeman. Abi' bajl xanyabaa baguiaa reeman diizd ladx reeman, nedan loj reeman, xt lod yu' xindobëz guin guzudxen. ¹⁰ Chi baguiaa reeman bajl guin, dád babaa reeman. ¹¹ Abi' chi guyu reeman lënü guin, baguiaa reeman xindo guin con xniaax Li. Abi' bazuxib reeman gojp reeman laax respejt. Dxel guxhal ro' xcaj reeman, abi' bazaladx reeman or, në yaal, nëtëë mirra par xindo guin. ¹² Chi ma guidxin dxej yaza reeman, dxel bagojn Dios laa reeman loj bacaal chitëë yayejc reeman niz lod za' Herodes, zianan zeel bayejc reeman niz lood ren.

Zë reeman Egipto

¹³ Chi ma zia ree b́en rajc guin ladx reeman, dxel balüüloj tijb xianjl Dios loj Xiëb loj bacaal, rëbaman:

—Bixche, cwa' xindo guin con xniaax, gol chej niz Egipto. Ni gol guzuj xt chi ganin lëjt, din zaguiil Herodes laax din gugjtaman laax.

¹⁴ Dxel bixche Xiëb, cwa'man xindobëz guin con xniaax, abi' guxhin guin brii reeman zë reeman niz Egipto. ¹⁵ Ni guzu reeman xt güjt rey Herodes.

Zian guzojb xtiidx Dios ni gunee bèn badëë xtiidxaman loj ree bejn, chi rëbaman: “Babedx da xi'nan Egipto.”

Gunabee Herodes guiët ree xindobëz

¹⁶ Chi gogbee Herodes guial basquiee ree bèn rajc guin laaman, dád bidxe'chaman. Dxel gunabeeman guiët gra ree xindoniguiaaw diisd ree xindo qui gojlri ree xt ree xindo ma yu' ree guia' tio'p ijz, xindo yu' ree Belén në gra ree guiedx riga' niz ni, guial yu'guijcaman ni rëb ree bèn rajc guin guial ma gojc tio'p ijz ni baguiaa reeman bajl guin.

¹⁷ Zian gojc cumplid ni bacaa Jeremías, bèn badëë xtiidx Dios loj ree bejn, chi rëbaman:

¹⁸ Biguien cha' tijb bejn guiedx Ramá, yu' guialroon në guialrbixdiaj, Raquelan cayoon por ree xi'nman, abi' ad rilet chu gusquiejn laaman guial güjt ree xi'nman.

¹⁹ Per chi güt Herodes, dxel balüüloj tijb xianjl Dios loj Xiëb loj bacaal lod zojb reeman, Egipto, abi' rëbaman lojman:

²⁰ —Bixche, cwa' xindobëz guin con xniaax. Gol baguiaj niz Israel, din ma güjt ree bèn guyën nugüjt laax.

²¹ Dxel bixche Xiëb cwa'man xindobëz guin con xniaax, bayejc reeman niz Israel. ²² Per chi gogbee Xiëb guial Arquelao, xi'n Herodes, naj bèn canabee niz Judea, bidxebaman naguiaj reeman niz ni. Dxel bagojn Dios laaman loj bacaal din che reeman niz Galilea, dxel zë reeman. ²³ Chi bidxin reeman ni, gurej reeman guiedx Nazaret. Zian gojc persi guzojb diidx ni gunee ree bèn badëë

xtiidx Dios loj ree bejn, guial grii laj Jesús bén Nazaret.

3

Diidx gunee Waj bén baroobnijs bejn ree

(Mr. 1:1-8; Lc. 3:1-9, 15-17; Jn.1 :19-28)

¹ Lën ree dxej ni bidxin Waj, bén baroobnijs bejn ree, loj yujbidx niz Judea catie'chaman xtiidx Dios. ² Rëbaman:

—Gol bayüjn xgab por xtolidi din ma zidyob xguialrniabee Dios.

³ Xcwent Waj guinan bacaa Isaías, bén badëë xtiidx Dios loj ree bejn, chi rëbaman:

Rguien cha' tijb bén rbidxa' niz loj yujbidx, rëbaman:

“Gol beenchaaw xnejz dux Dad ree Dios, gol guxhal tijb nejz nali.”

⁴ Con guidxlad camell gojcnë xab Waj, abi' lënman bixii tijb guid. Gudaw tëëman bi'tsu con dxijn yu' dajn. ⁵ Dxel bén Jerusalén ree në los demazri ree bén Judea nëtëë gra ree bén zobj gadëd ro' guiiw Jordán, brii reeman bicaagdiajg reeman ni rniee Waj. ⁶ Dxel guxhoobdol reeman, abi' baroobnijs Waj laa reeman loj guiiw Jordán guin.

⁷ Per chi baguiaa Waj zien ree bénfarisew në ree bénsaducew bidxin din tiobnijs reeman, rëbaman loj reeman:

—¡Xi'n xindxab! ¿Chu bagojn lëjt din laadi loj castiro' ni zëed? ⁸ Gol gubajn zagdxë din guiguien guial waliquidi ma bayüjndi xgab por xtolidi, ⁹ abi' ad bal rlies xvalorgajquidi, rëbidi: “Dunujn zio'p loj xdiaa Abraham”, din naj rni lëjt xt guiaj guie

ree zile' yayüjn Dios xdiaa Abraham. ¹⁰ Abi' ree bën ad zinalt xnejz Dios zi'c rayal, ma zidyob dxej ni güünnë Dios laa reeman zi'c rüjnnë bejn tijb yag chi ad rtiatan, rutüügaman laan din che'can. ¹¹ Naj rni lojdi, curobnijsan lëjt con nijs zi'c tijb sen guial ma bayüjndi xgab por xtolidi. Per bën zidnal naj, laaman guroobnijs lëjt con xSprijt Dios con në bajl, din laaman mazri rajp guialrniabee guial lon, abi' ni'qui xgurëchaman ad rayalt gaxhiecan. ¹² Abi' zi'c raya trigo zian güünnëman bejn. Din bën zinal ree xnejz Dios chinëman laa reeman lod rniabeeman, guiáad ree bën ad zinalt xnejz Dios guixhiaalaman laa reeman loj bajl ni ad yu't dxej yayü'.

Gurobnijs Jesús

(Mr. 1:9-11; Lc. 3:21-22)

¹³ Lën ree dxej zii guza Jesús niz Galilea wejman ro' guiiw Jordán lod za' Waj, din guroobnijs Waj guin laaman. ¹⁴ Per ad nuyëntaman nuroobnijsaman Jesús, rëbaman lojman:

—Lüj rayal guroobnijs naj, ad najt rayal guroobnijs lüj.

¹⁵ Dxel rëb Jesús lojman:

—Yo guna gac zian, din mazri zagdxe yaguieen gra zi'c rniabee Dios.

Dxel cwëjb Waj baroobnijsaman laaman. ¹⁶ Chi gulox guroobnijsaman, naabzi bariiman loj nijs guin, dxejczy bixal xanyabaa, abi' baguiaaman zidguiajt xSprijt Dios zi'c tijb palom xt guijcaman.

¹⁷ Dxel biguien cha' tijb bejn xanyabaa, rëbaman:

—Bën guie naj da Xi'nan, bën rën da'tan bën rabaanë' tëën.

4

*Gojc Jesús prueb**(Mr. 1:12-13; Lc. 4:1-13)*

¹ Dxel binë xSprijt Dios Jesús niz loj yujbidx, din güün xindxab laaman prueb.

² Ni guzuman tiuu dxej tiuu guiaal sin guialraw, dxel gulaanman. ³ Abi' bidxin xindxab beenx laaman prueb, rëbix:

—Bal wali najl xi'n Dios, gunabee yayajc guiaj guie ree guiadxtil.

⁴ Per badxi' Jesúsán rëbaman:

—Loj xtiidx Dios rëb: “Ad ganaxtizi guiadxtil guiban bejn, nëgajc gra diidx rníee Dios.”

⁵ Dxel binë xindxab guin laaman Jerusalén, abi' gulë'pix laaman guijc yadooro' zobj luguiedxzii, ⁶abi' rëbix lojman:

—Bal wali najl xi'n Dios, gudidya' diizd guie, din loj xtiidx Dios rëb:

Dios guixhiaal ree xianjlaman din guinia reeman lüj.

Guiniaaz reeman lüj con yaa reeman chitëë ladx ni'czi tijb guiaj guia'l.

⁷ Badxi' Jesúsán, rëbaman:

—Rëb gajc loj xtiidx Dios: “Ad güünl prueb xDadil Dios.”

⁸ Dxel binë xindxab guin laaman tijb guijc guia' ya da't, lod balüüx laaman gra ree guiedx riga' loj guidxliuj në ree guialnaza'c yu' loj reen. ⁹ Abi' rebix lojman:

—Naj gune gra ree ni guie lojl, bal guzuxibil lon guiniajchi' tëël naj.

¹⁰ Badxi' Jesúsán, rëbaman:

—Biquied, xindxab, din loj gajc xtiidx Dios rëb:
 “Gunajchi' xDadil Dios, tijbzi lojman been sirv.”

¹¹ Dxel biquied xindxab guin lojman, abi' bi't
 tio'p choon ree xianjl Dios persi been reeman
 laaman sirv.

*Rzuloj Jesús rtie'chaman xtiidx Dios niz Galilea
 (Mr. 1:14-15; Lc. 4:14-15)*

¹² Chi gogbee Jesús guial yu' Waj ladxguiib,
 bayejcaman Galilea. ¹³ Per ad gurejtraman guiedx
 Nazaret, wejman bisobaman guiedx Capernaum,
 tijb guiedx riga' gajxh ro' nijs Galilea niz lod goc
 ree xdajn Zabulón në Neftalí. ¹⁴ Zian gojc persi
 gojc cumplid ni bacaa Isaías, bën badëë xtiidx Dios
 loj ree bejn, chi rëbaman:

¹⁵ Bën Zabulón con ree bën Neftalí,
 në ree bën zojb gajxh ro' nijsdoo, nëtëë ree bën
 zojb xijch guiiw Jordán
 con gra ree bën zojb niz Galilea,
 lod zojb ree bën ad najt bën Israel,
¹⁶ gra reeman gubajn loj xcay.
 Yan ma brii tijb biani par laa reeman,
 abi' biani guin guxhal xquiarguiejn ree bën ad
 nabant xnejz loj Dios.

¹⁷ Diizd dxejzii guzuloj gutie'ch Jesús xtiidx Dios,
 rëbaman:

—Gol bayüjn xgab por xtolidi din ma zëed gajxh
 xguialrniabee Dios.

*Rbejdx Jesús tajp ree bën gac xbejnman
 (Mr. 1:16-20; Lc. 5:1-11)*

¹⁸ La'tgaj caza Jesús gajxh ro' nijsdoo Galilea,
 baguiaaman Simón bën la gajc Bëd con bijchaman

Andrejs. Cuzaal reeman guijxh loj nijs din guiniaaz reeman bëjl. Guial laan naj xchiin reeman.

¹⁹ Dxel rëb Jesús loj reeman:

—Gol tanal naj, din gulün lëjt xhienaag güüнди din guto'pиди bejn par Dios luar guiniaazidi bëjl.

²⁰ Loj hor guin gajc basa'n xguijxh reeman abi' zinal reeman laaman.

²¹ Guzaman zatibda'n dxel baguiaaman zatio'p ree bejn, Jacob con bijchaman Waj, xi'ngaan ree Zebedeo. Yu' reeman loj tijb barcw con xdad reeman cayünchaaw xguijxh reeman. Dxel gurejdx Jesús laa reeman, ²² abi' basa'n reeman barcw guin con xdad reeman, dxel laa zinal gajc reeman laaman.

*Rülüü Jesús zien ree bejn
(Lc. 6:17-19)*

²³ Wej Jesús guidibczi niz Galilea, abi' tijbgaj ree guiedx wejman lën ree yadoo persi balüüman bejn ree. Balüüman laa reeman xtiidx Dios, rëbaman loj reeman xhienaag naj xguialrniabee Dios, abi' bayünman bën rdoob ree në gra ree bën rajc xhi-etëz guialguijdxan. ²⁴ Guidibczi niz Siria bire'ch xtiidx Jesús, abi' bidnë reeman bën cusagdiaj ree gadxagayaa ni mal në graloj ree guialguijdx, bën yu' ree xindxab luxdoo, në ree bën rëjtja', nëtëe ree bën ad rilet' suli, abi' bayün Jesús laa reeman. ²⁵ Dád zien ree bejn binal laaman, bën Galilea ree, bën zëed ree Decápolis, bën Jerusalén ree, bën zëed ree niz Judea në ree bën zëed stiblad ro' guiiw Jordán.

5

Ni baliü Jesús tijb guiyc guia'

¹ Chi baguiaa Jesús bén guixiuj ree, wë'paman tijb guiyc guia' abi' gurejman, dxel gubig ree xbejman lojman. ² Abi' guzuloj culüüman laa reeman, rëbaman:

*Xiquilbaa ree bejn**(Lc. 6:20-23)*

³—Xiquilbaa ree bén ragbee guial ryaadx gagnë Dios laa reeman, din por zian yayal reeman lod rniabeeman.

⁴ 'Xiquilbaa ree bén yu'naya, din Dios yagu' luxdoo reeman zagdxë.

⁵ 'Xiquilbaa ree bén naj bén chaawladx, din laa reeman tia' guidxliuj ni rëb Dios gudëëdaman loj reeman.

⁶ 'Xiquilbaa ree bén rzajc zi'c chi rliaan bejn o chi re'caman nijs zian rën da't reeman güün reeman zi'c rniabee Dios, din Dios gagnë laa reeman din güün reeman zi'c ruladxaman.

⁷ 'Xiquilbaa ree bén raya lasa', din zian yaya Dios laa reeman.

⁸ 'Xiquilbaa ree bén naya loj Dios, din laa reeman guguaa laaman.

⁹ 'Xiquilbaa ree bén rüjn naguiejn cwedxenë lasa', din laa reeman grii laj xi'n Dios.

¹⁰ 'Xiquilbaa ree bén cadëd loj guialzi por graloj ni rujnnë bejn laa reeman guial cayüjn reeman zi'c rniabee Dios, din laa reeman yayal lod rniabeeman.

¹¹ 'Xiquilbaadi, chi rüjnnë reeman lëjt xhiernarajc në chi rnieeguijdx reeman lëjt nëtëë chi rudxiib reeman guijquidi graczi, guial najdi

da bejnan. ¹² Gol badxe' luxdoodi nix, gol babaa tëë din narooob naj ni gunee Dios lojdi xanyabaa. Abi' lëjt ragbee guial ziangajc basagzi reeman bën badëë ree xtiidx Dios loj ree bejn gocli chi gadidi gui't loj guidxliuj.

Lëjt naj zi'c zëd në zi'c bajl
(Mr. 9:50; Lc. 14:34-35)

¹³ 'Lëjt naj zi'c zëd loj guidxliuj guie. Per bal id naxijran, ¿xhieza naag yayajcan naxij zatiyb? Achetri dxiin güünan, gaz guire'chan abi' chë'p ree bejn guijcan.

¹⁴ 'Lëjt naj zi'c tijb biani loj guidxliuj guie, naj tëëdi zi'c tijb guiedx ni riga' tijb guijc guia' abi' ad zajct guiguie'chan. ¹⁵ Ad ritiaguuj tëët tijb guij par guida'cwan lën tijb yagalm, rtiaguijn persi rzojban ya din gusnin loj gra ree bën yu' lënu. ¹⁶ Ziangajc lëjt, gol gojc zi'c biani loj ree bejn, din chi guguaa reeman ni zagdxë cayündi guza't reeman xDadidi Dios zagdxë bën yu' xanyabaa.

Rulüü Jesús xcwent ley

¹⁷ 'Ad naladxidi zialan par günan ley tibläd, ley ni badëë Dios loj Moisejs o ni balüü ree bën badëë xtiidx Dios loj ree bejn, zialan par günanan cumplid. ¹⁸ Din naj rni lojdi, la'tgaj yu' xanyabaa në guidxliuj, ad ziquiedt tijb punt o tijb lejtr loj ley xt chi gac gra ni naj gac. ¹⁹ Zianan zeel bën ad ruzoobt tijb mandamient ni zëed loj ley guin majsi nidobëz naj mandamient guin, bal rulüü tëëman bejn ree güün reeman zian, laaman lasajc ta'nzi lod rniabee Dios. Per bën ruzoob gra ree mandamient ni zëed loj ley guin, rulüü tëëman bejn ree guzoob reeman laan, laaman naj mazri

bén lasajc lod rniabee Dios. ²⁰ Zeel naj rni lojdi, bal id zabajndi mazri zagdxe guial loj ree mextr rajc ley në ree bénfarisew, ad zayaltidi lod rniabee Dios.

Rulüü Jesús xcwent guialrdxe'ch lasa'

(Lc. 12:57-59)

²¹ Lëjt ragbee guial rëb Dios loj ree xbéngulalidi: “Ad gugüjtil bejn, din bén gugüjt bejn yayalaman casti.” ²² Per naj rni lojdi, chutëéz bén rdxe'chnë lasa', yayalaman casti, në bén rniece diidxguijdx lasa' xt loj guxtis zajc cheman, guiáad bén rëb loj lasa' achet sirv lüj, laaman yayal loj bajl yu' gabijl.

²³ Zeel bal zinël gon lën yadoo abi' yagaj rusaal-
adxil guial yu' bén rdxe'chil, ²⁴ basa'nsii xgonl yagaj, yalojxgaj babenë bén rdxe'chil zagdxe, dxel ma zile' yajejquil din gusa'n xgonl.

²⁵ Bal chu bén rudëed lüj loj guxtis, baya'nnëman diidx zagdxe la'tgaj yu' tiamp, chitëë yayüman lüj loj guxtis, abi' guxtis guin nabee chu'l ladxguiib. ²⁶ Naj rni lüj, ad zariitil ladxguiib guin xtczi quixil gra ni na guxtis guin.

Rulüü Jesús xcwent guialrzunë lacheel ben ren

²⁷ Lëjt ragbee guial loj ley rëb: “Ad sunël lacheel ben ren.” ²⁸ Per naj rni lëjt, chutëéz bén rüjn xgab-mal chi ruguiaaman tijb béngunaa, con laan ma beenman dol lën luxdooan por béngunaa guin.

²⁹ Bal laagajc guiaaloj ladbeel rüjn din güünl dol, mazri zagdxe naj gulëen bazaalan zijt. Din mazri zagdxe naj nit tiblax guiaaloj luar che guidibil gabijl. ³⁰ Abi' bal laagajc yaa ladbeel rüjn din güünl dol, gutü'n bazaalan zijt. Din mazri zagdxe naj nit tiblax yaal luar che guidibil gabijl.

*Rulüü Jesús xcwent guial rala' lasa' bejn
(Mt. 19:9; Mr. 10:11-12; Lc. 16:18)*

³¹ 'Ma bacaagdiajg tēedi: “Chutēez bēn rala' lacheel, rayal gudēedaman gui'ch lojman guial ma bala' lasa' reeman.” ³² Per naj rni lējt: Xinguaaw rala' xbēngunaa, abi' ad za'nēt bēngunaa guin xin ren, laagajc laax cayūjn din sunē xbēngunaax xin ren. Abi' xin tia' bēngunaa guin dolan cayūjnx.

Ad rayalt guza't xlia' bejn Dios

³³ 'Rēb tēē Dios loj ree xbēngulalidi: “Ad guza't xlia'di Dios, rayal güündi cumplid ni rēbidi gudēedidi lojman.” ³⁴ Per naj rni lojdi: Ad rayaltczi guza'tidi Dios, ni'qui xanyabaa par chililadx reeman lējt din ni zojb Dios, ³⁵ ni'qui guidxliuj din loj guidxliuj naj lod ruzuj guia'man, ni'qui Jerusalén din laan naj ladx rey mazri rniabee. ³⁶ Ad guza't tēē guijquidi par chililadx reeman lējt, din ni'qui tijb guidxguijquidi ad zajct güündi ni ya's o ni naquich ya. ³⁷ Zagdxeli con gol güjdx “an” o “a'n”, dīn los demazri ree ni guinieedi loj xindxab zan.

*Ad yadxi'di ni mal por ni mal
(Lc. 6:29-30)*

³⁸ 'Lējt ragbee guial loj ley rēb: “Bēn cwēē guiaalojl, gulēē gajc guiaalojman. Guiáad bēn cwēē layil, gulēē gajc layaman.” ³⁹ Per naj rni lējt: Ad yadxi'di ni mal por ni mal, bal chu chēez xhajg ladbeedi, gol badēē stibladan chēezaman. ⁴⁰ Bal chu bēn tilē lūj din cwēēxuuman xmanguil, badēē nē xchamarril tia'man. ⁴¹ Abi' bal rüjn reeman lūj naguiejn güül tijb yuu din sanēlan tib kilometro, gusanēn tio'p kilometro. ⁴² Chutēez bēn rniab

xhienin lojl, badëëdan, bal chu tëë rgui'n xhienin lojl ad bal cwexuul gudëëdilan.

Guyën bën rdxe'ch lüj

(Lc. 6:27-28, 32-36)

⁴³ 'Ragbee tëëdi rëb ree bejn: "Guyën bën rën lüj, bidxe'ch tëë bën rdxe'ch lüj." ⁴⁴ Per naj rni lojdi: Gol guyën bën rdxe'ch lëjt, gol gurejdx tëë Dios por ree bën rzunal lëjt, din güün reeman lëjt ni mal. ⁴⁵ Din zian gaquidi xi'n xDadidi Dios bën yu' xanyabaa, din laaman ruslejn xgubijdxaman par ree benza'c në par ree benmal, ruscal tëëman guia par ree bën naban zi'c rayal në par ree bën ad nabant zi'c rayal. ⁴⁶ Din bal rëndi ganaxzi bën rën lëjt, ¿xhieza tia'di loj Dios zian? Din xt bëndol ree rüjn zian. ⁴⁷ Abi' bal ganaxzi bën rëndi rugajpdiozidi, ¿xhieza ni zagdxe cayüjndi? Din xt bën ad nünbeet ree Dios rüjn zian. ⁴⁸ Zeel gol gojc benza'c, zi'c naj xDadidi Dios bën yu' xanyabaa.

6

Xhienaag gagnë lasa' bejn

¹ 'Ad güündi ni zagdxe niz loj ree bejn naabzi par yadxaløj reeman lëjt. Din bal güündi zian, xDadidi Dios bën yu' xanyabaa achet gunee-man lojdi. ² Zeel chi güünl yudar bën ryaadx xhienin, ad guitie'chil diidx par gagbee bejn xhie cayüjnl zi'c rüjn ree bën rusquiee, lën ree yadoo në ree lunejz, din guilies bejn xvalor reeman naj ree-man benza'c. Per diidxliczi rnin lojdi, laazan naj ni rayal reeman. ³ Zeel chi güünl yudar bën ryaadx xhienin, ni'czi loj xmiwda'til ad gül diidx ni cayüjnl. ⁴ Mazri zagdxe lüjzi gagbee ni cayüjnl,

abi' xDadil Dios laaman cuguaa ni cayüjn lüjzi, laaman gunee ni rayalil.

Xcwent xhienaag cwedx guiniab bejn Dios
(Lc. 11:2-4)

⁵ Chi cwedx guiniabidi Dios, ad güündi zi'c rüjn ree bën rusquiee, bën ruladx ree rzuli par cwedx guiniab reeman Dios lën ree yadoo në ree xquin nejz, din yadxaloj bejn laa reeman. Din naj rni lojdi, laazan naj ni rayal reeman. ⁶ Per lüj chi cwedx guiniabil Dios, bayu lënü lidxil, basiaaw ro' port, dxel gurejdx gunab Dios bën za'në lüj. Abi' laaman cuguaa ni cayüjn lüjzi, laaman gunee ni rayalil.

⁷ Chi rbejdx rniabidi Dios, ad radxi'di diidx guin guië'tzi guië't naabzi par gacxhiey xtiidxidi, zi'c rüjn ree bën ad nünbeet Dios. Din laa reeman naladx guial zien ni rniece reeman mazri guidxga' Dios laa reeman. ⁸ Ad güündi zi'c rüjn reeman, din xDadidi Dios ma ragbeeman xhie ryaadxidi chi gadidi guiniab laan. ⁹ Zeel chi cwedx guiniabidi Dios, gol güjdx:

Dad, lüj yu' xanyabaa,
rayal yaya'p da'tan lajl respejt.

¹⁰ Gac zi'c rniabeel.

Gac zi'c rënl loj guidxliuj zi'c rajc xanyabaa.

¹¹ Banee ni yadaawan guixie guixie.

¹² Been dunujn perdon gra ree ni mal ma
baguieenan

zi'c raguieenan perdon bën rüjn ree dunujn ni
mal.

¹³ Ad guslaal dunujn yaguieenan dol,
babëë dunujn loj gra ni mal.

14 'Din bal güündi perdon Bén rüjn lëjt ni mal, ziangajc xDadidi Dios Bén yu' xanyabaa züjn gaj-caman perdon xtolidi. 15 Per bal id züjndi perdon Bén rüjn ree lëjt ni mal, ziangajc xDadidi Dios ad züjntaman lëjt perdon.

Xcwent guialrba'n

16 'Chi rba'ndi ad güün lojdi naya, zi'c rüjn ree Bén rusquiee din guguaa bejn guial naba'n reeman. Naj rni lojdi, guial laazan naj ni rayal reeman. 17 Per lüj, chi rba'nl, gudiib lojl gudüjn tää guijquil 18 chitää gagbee ree bejn guial naba'nl. Tijbzi xDadil Dios Bén za'në lüj naj Bén gagbee laan, abi' laaman gunee lüj ni rayal tia'l.

Guialnaza'c yu' xanyabaa (Lc. 12:33-34)

19 'Ad guto'pidi guialnaza'c loj guidxliuj guie lod zajc tiabe reen o xhin reen o chu' xingubaaan cwan laa reen. 20 Zagdxeli gol been naguiejn gol been gan guialnaza'c yu' xanyabaa lod ad zacabet reen, lod ad zaxint reen, lod ad zu tää xingubaaan cwan laa reen. 21 Lod gapil guialnaza'c guin yagaj su luxdool.

Guiaaloj bejn naj zi'c biani (Lc. 11:34-36)

22 'Guiaaloj bejn naj zi'c tijb biani par xcuerpaman. Zeel bal cayüjnl ni zagdxe, guidib xcuerpil rajp biani. 23 Per bal cayüjnl ni mal, guidib xcuerpil naj zi'c lod nacay, zi'c naj lod nacaybuu.

Dios ya o milia (Lc. 16:13)

²⁴ 'Ad zile't chu güün sirv loj tio'p patron, din zadxe'chaman tijbaman abi' guiënman stijbaman, o gacaman benza'c con tijbaman abi' ad zëntaman stijbaman. Zeel ad zile't güündi sirv loj Dios në loj milia.

Ahetczi rayal chu' bejn xgab
(Lc. 12:22-31)

²⁵ 'Naj rni lëjt: Ad chu'di xgab por ni gawidi në por ni guië'di din guibandi, ni'qui por lajd ni gacwidi. Guialnaban mazri lasajc guial loj guialraw, abi' xcuerp bejn mazri lasajc guial loj xabaman. ²⁶ Gol baguiaa ree be rzuj xanyabaa, ad rxübint reeb, ad rato'p tëët reeb guialnaza'c, ad naj tëët lod cu'chaaw reeb guialnaza'c guin. Per xDadidi Dios bën yu' xanyabaa rudëed ni raw reeb. Abi' mazri lasajquidi guial loj reeb. ²⁷ Abi' tëë, ¿wen guial ru da'tidi xgab ma güün lëjt mazri ziool ya?

²⁸ ¿Chexquiza zeel dád rudi xgab por xabidi? Gol baguiaa xhienaag rni's ree guiaa dajn. Achet dxiin rüjn reen ad rguib tëët reen, ²⁹ per ni'qui rey Salomón ad guzujchaawt zi'c za'chaaw ree guiaa majsi mast guzujchaawaman. ³⁰ Abi' bal gui'xh dajn ruzujchaaw Dios yan, majsi guixiezi che'can. Diidxgui lëjt bën ad rliladxza'ct ree laaman, nid zuneeman ni gacwidi ya. ³¹ Zeel ad rudi xgab xhie gawidi, o xhie guië'di, o xhie gacwidi. ³² Din bën ad nünbeet ree Dios rüjn zian, laa reeman ru xgab por gra ree ni guin. Per lëjt yu' xDadidi xanyabaa, abi' laaman ragbeechaaw xhienin ryaadxidi. ³³ Per yalojxgaj gol baguiil güündi zi'c rniabee Dios, gol been tëë zi'c rënman, dxel laaman gunee gra ree

ni ryaadxidi. ³⁴ Ad chu'di xgab por ni gac guixie, gol basa'nan par guixie, zagdxeli gol guyu xgab tib dxejgaj.

7

Xcwent guialrula'ch

(Lc. 6:37-38, 41-42)

¹ 'Ad gula'chidi bejn chitëë saquidi zian. ² Din bal rula'chidi bejn ziangajc saquidi, zi'c rüjnnëdi bejn ziangajc güünnë reeman lëjt. ³ Ad gula'chidi bën ren por falt dobëz ni rajpaman, zagdxeli gol guyu xgab por falt narooob ni rajpidi. ⁴ Abi' bal mazri falt narooob rajpidi, ¿xoza guiëbidi loj stijb bejn: “Ad laat naj ni rüjnl”? ⁵ ¡Bën rusquiee! Yalojxgaj gol been zi'c rayal, chi ma rüjndi zian dxel ma zile' guiëbidi loj stijb bejn: “Ad laat naj ni rüjnl.”

⁶ 'Ad güüнди nagueijn güüncwent ree bën ad rënt güüncwent xtiidx Dios, chitëë xhie güünnë reeman lëjt. Din bal güüнди zian, laan naj zi'c chi ruzaal bejn tijb ni nagle' loj bë'cw, o chi ruzaal bejn tijb ni lasajc loj cüch abi' chë'pzib guijcan.

Ni guiniabidi zaca'dan

(Lc. 11:9-13; 6:31)

⁷ 'Naj rni lëjt: Gol gunab loj Dios, abi' laaman gunee ni rniabidi. Gol baguiilaman, zadxejlidi laaman. Gol gurejdx gunabaman, züjncwentaman lëjt. ⁸ Din bën rniab, zaca'man. Abi' bën rguuil, zadxejlaman, guiáad bën rbejdx rniab laaman, züjncwentaman laaman.

⁹ 'Lëjt najdi dad, ¿wen zudëëdi tijb guiaj loj xi'ndi ya chi guiniabix guiadxtil?, ¹⁰ ¿o zudëëdi tijb bëël

ya chi guiniabix bëjl? ¹¹ Nacli lëjt najdi béndol rajc rudëedi ni rën xi'ndi. ¡Diidxgui xDadidi bën yu' xanyabaa, nid zudëedaman ni zagdxë loj ree bën rniab laan ya!

¹² 'Gol beennë ree bejn zi'c rëndi güünnë reeman lëjt. Din zian rniabee xley Dios në ni bacaa ree bën badëë xtiidxaman loj ree bejn.

Port nadëë
(Lc. 13:24)

¹³ 'Gol been naguiejn din chu'di niz ro' port nadëë. Din port gulajg në nejj gulajg, laa reen naj ni zinë bejn loj nejj mal, abi' zien bejn zë loj nejj guin. ¹⁴ Per port nadëë guin në nejj nadëë guin laa reen naj ni rnë bejn lod yu' guialnaban tiblayaa, abi' ta'nzi ree bejn zë loj nejj guin.

Por ni rüjndi zayünbee ree bejn lëjt
(Lc. 6:43-44)

¹⁵ 'Gol gojp cudad con ree bën rusquiee rëb rudëed reeman xtiidx Dios. Din rulüü dád bën chaawladx reen, per rüjnzi reeman par gusquiee reeman bejn. ¹⁶ Per zayünbeedi laa reeman por ni rüjn reeman, din ad rtiat uv loj yaquiejch ad rtia tëët higo loj gui'xh guiējch. ¹⁷ Zeel gra yag zagdxë rtia ni zagdxë lojn. Guiáad gra yag guijdx rtia ni guijdx lojn. ¹⁸ Ad rtiat ni guijdx loj yag zagdxë, ad rtia tëët ni zagdxë loj yag guijdx. ¹⁹ Gra yag ad rtiat ni zagdxë, rirugan dxel re'can. ²⁰ Ziangajc lëjt zayünbeedi laa reeman por ni rüjn reeman.

Ad grat bejn chu' lod rniabee Dios
(Lc. 13:25-27)

²¹ 'Ad grat ree bën na lon: “Dad, Dad,” chu' lod rniabee Dios, ganaxzi ree bën rüjn zi'c rën da

Dadan, b n yu' xanyabaa. ²² Dxejzii, zien ree b n na lon: “Dad, Dad, por l j batie'chan xtiidxil, abi' guial baza'tan lajl bal en xindxab ree luxdoo ree bejn, baguieen t en zien ree milagr guial baza'tan lajl.” ²³ Dxel gui n loj reeman: “Ad benbeetczan l jt, gol gubi'ca lon b ndol.”

Tio'p loj cimiant

(Lc. 6:47-49; Mr. 1:22)

²⁴ 'Chut ez b n rucaagdiajg da diidxan abi' r jnman ni r n, laaman naj zi'c tijb b n nasin gules xcimiant lidx loj guiaj. ²⁵ Abi' gol guia, dxel biguiajt nijs ro' gubi' t e bidoxh, gulaj reen lad yu guin, per ad gulenxantan guial naj xcimiantan loj guiaj. ²⁶ Per b n riguiejn da diidxan abi' ad r jntaman ni r n, laaman naj zi'c tijb b n ad nasint bazoob lidx loj  x. ²⁷ Abi' chi gol guia biguiajt nijs narooob, gubi' t e bidoxh. Abi' gulaj reen lad yu guin zianz gulenxanan, ni'qui tibda'n nan ad baya'nt.

²⁸ Chi gulox guneen  Jes s b n guin ree, graczi reeman badxa da't loj zi'c bal  man laa reeman, ²⁹ guial rul  man laa reeman zi'c b n rajp guialrniabee, ad zi'c rul  t ree mextr rajc ley.

8

Ray jn Jes s tijb b n rajc guialguijdx la lepra

(Mr. 1:40-45; Lc. 5:12-16)

¹ Chi baza Jes s ruguia' guin, d d zien bejn nal laaman. ² Dxel gubig tijb bejn lojman rajcaman guialguijdx la lepra, abi' bazuxibaman lojman, r baman:

—Dad, bal ti bil, zile' yay jnl naj.

³ Dxel basli yaa Jesús baqui'man laaman, rëbaman:

—Rënan. Bayajc.

Chi rëb Jesús zian, loj hor ziigajc biquied guial-guijdx guin abi' bayaman. ⁴ Dxel rëb Jesús lojman:

—Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël zi'c gunabee Moisejs, din gagbee gra ree bejn guial ma bayajquil.

Bayajc xmojs tijb bén suldad rniabee ree suldad (Lc. 7:1-10)

⁵ Chi guyu Jesús luguiedx Capernaum, tijb suldad Rom rniabee ree suldad bibig lojman, guzaj-caman laaman liaadx, ⁶ rëbaman:

—Dad, laa da mojsan naga' lidxan ragxuux. Ad riler' chixchex, dád cusagzi guialguijdx guin laax.

⁷ Dxel rëb Jesús lojman:

—Gan din yayünan laax.

⁸ Badxi' bén rniabee ree suldad guinan, rëbaman:

—Dad, ad rayaltan chu'l lidxan, per gunee diizd guie din yayajc da mojsan. ⁹ Din zi'c naj yu' ree bén rniabee naj, ziangajc naj yu' ree da suldadan xin rniabeen. Chi rën loj tijb reex: “Wej”, rejx, chi rën loj stijbix: “Guda,” ri'tix. Abi' chi rë loj da mojsan: “Been ni guin”, rüjnxan.

¹⁰ Chi biguiejn Jesús zian, dád badxalojman abi' rëbaman loj ree bén zinal laaman:

—Naj rni lojdi, ni'qui Israel ad wadxaaglojtan tijb bén rliladx Dios zi'c rliladx bén guin Dios.

¹¹ Naj rni lëjt, dád zien ree bén gralad yayal gawnë Abraham, në Isaac, në Jacob lod rniabee Dios.

¹² Guiáad ree bén rayal niu lod rniabee Dios, laa

reeman yayal lod nacay da't lod goon reeman lod gaw tëë lay reeman.

¹³ Dxel rëb Jesús loj suldad rniabee guin:

—Baguiaj lidxil, gac tëë zi'c ma bililadxil.

Abi' loj hor guin gajc bayajc xmojs bën guin.

Rayüjn Jesús xnasuegr Bëd

(Mr. 1:29-31; Lc. 4:38-39)

¹⁴ Chi we Jesús lidx Bëd, baguiaaman xnasuegr Bëd naga'man yu'man xliaa. ¹⁵ Dxel gunaazaman yaaman, abi' bariiman xliaa guin, dxel bixche-man guzuloj cuyaanman laa reeman.

Rayüjn Jesús zien ree bënragxuu

(Mr. 1:32-34; Lc. 4:40-41)

¹⁶ Chi ma caxhin, binë ree bejn zien ree bën yu' xindxab luxdoo loj Jesús. Abi' con tijb diidx ni guneeman babëëman xindxab guin luxdoo ree-man, bayüjn tëëman gra ree bënragxuu. ¹⁷ Zian gojc persi gojc cumplid ni rëb Isaías, bën badëë xtiidx Dios loj ree bejn, chi rëbaman: “Laaman zignë dux gualguijdx ree, laa tëëman zignë dux gualzi ree.”

Bén rën chinal Jesús

(Lc. 9:57-62)

¹⁸ Chi baguiaa Jesús bénguixiuj nayaw laaman, gunabeeman tédaman stiblad ro' nijs naj yagaj.

¹⁹ Dxel gubig tijb mextr rajc ley loj Jesús, rëbaman:

—Mextr, rënan guidnaalan lüj bantëëz guin chel.

²⁰ Abi' rëb Jesús lojman:

—Bëz ree yu' xbiliaa reeb, abi' ree biguijn yu' xguixbitia's reeb. Per Bén guxhaal Dios ni'qui lod quixh guiycaman ad yu't.

²¹ Dxel rëb stijb ree bën zinal laaman:

—Dad, baslaa naj gabenë' da dadan xt chi guiëtaman.

²² Per rëb Jesús lojman:

—Tanal naj, basa'nman con ree bén ad rënt guidnal naj, laa reeman guquie'ch laaman chi guiëtaman.

Racwëez Jesús bidoxh

(Mr. 4:35-41; Lc. 8:22-25)

²³ Guyu Jesús loj barcw con ree xbejnman, ²⁴ abi' la'tgaj zë reeman loj nijs guin dxejlczi gubi' tijb bidoxh, ma cazëëbczi barcw guin xan nijs. Per Jesús naga'yëjsaman. ²⁵ Dxel bicwëen ree xbejnman laaman, rëb reeman:

—¡Dad, gunaj dunujn! ¡Ma cayzëëban xan nijs!

²⁶ Badxi'man laan rëbaman:

—¿Chexc zeel dád rdxebidi? ¿Chexc zeel ad rliladxza'ctidi naj?

Dxel bixchewan abi' gunabeeman bacwëez bi guin në nijs guin. Loj hor ziigajc babedxe reen.

²⁷ Abi' ree xbejnman badxa da't loj reeman, zianz gunabdiidx loj lasa' reeman, rëb reeman:

—¿Chu bén guin, zeel xt bi në nijs ruzoob xtiidxaman?

Tio'p ree bén yu' xinxab luxdoo

(Mr. 5:1-20; Lc. 8:26-39)

²⁸ Chi bidxin Jesús stiblad ro' nijs guin, loj xguidxliuj ree bén Gadara, dxel tio'p ree xinguaaw yu' xinxab luxdoo brii reex lad ree baa abi' wej reex loj Jesús. Dád nadoxh reex, zeel ad rile't chu téd lunejz guin. ²⁹ Chi baguiaa reex Jesús, gurixdiaj reex rëb reex:

—¿Xhie rēnl con dunujn, Jesús, Xi'n Dios? ¿Zēēdil guie ya din gusagzil dunujn chi gadli dxej guidxin?

³⁰ Per gajxh yagaj za' zien ree cūch, cayaw reeb, ³¹ abi' guzajc ree xindxab guin liaadx loj Jesús, rēb reex:

—Bal yabēēl dunujn, banee mod yadxu'n lēn ree cūch guin.

³² Dxel rēb Jesús:

—Gol wej.

Dxel barii ree xindxab guin luxdoo ree bēn guin bayu reex lēn ree cūch guin. Abi' gra reeb guzuloj cuxūūn zianz bitidia' reeb ro' tijb bala' xt loj nijs, lod gu' reeb nijs abi' gūjt reeb.

³³ Abi' ree bēn cayajp cūch guin ree, baxūūn reeman. Dxel chi badxin reeman luguiedx guin, be reeman diidx gra ni goc nē gra ni guzac ree bēn yu' ree xindxab guin luxdoo. ³⁴ Dxel gra ree bēn guiedx guin brii wej lod za' Jesús, abi' chi baguiaa reeman laaman, guzajc reeman laaman liaadx, din yazaman ladx reeman.

9

Bayūjn Jesús bēn nējt xcuerp (Mr. 2:1-12; Lc. 5:17-26)

¹ Dxel bayu Jesús loj tijb barcw, badēdaman stiblad ro' nijs guin abi' badxin ladxaman. ² Yagaj binē ree bejn tijb xin nējt xcuerp, naga'x loj da. Chi baguiaa Jesús guial rliladx reeman laaman, rēbaman loj xin ragxuu guin:

—Bagu' luxdool zagdxe, xi'n. Ma benan perdon xtolil.

³ Dxel tio'p choon ree mextr rajc ley been reeman xgab: “Diosan rūjnx tiblād guial rnieex zian.”

⁴ Per guial gogbee gajc Jesús xhie xgaban cayüjn reeman, dxel rëbaman loj reeman:

—¿Chexc zeel rüjndi xgabmal? ⁵ ¿Conin mazri nawëëg gac? ¿Guial guiën ya: “Ma benan perdon xtolil” o guiën: “Bixche, guza”? ⁶ Per yan, gulün lëjt guial naj, Bén guxhaal Dios ra'pan guialrniabee loj guidxliuj guie par gūnan perdon dol ree.

Dxel rëb Jesús loj xin ragxuu guin:

—Bixche. Baca' ni go'til loj. Baguiaj lidxil.

⁷ Laa bixchegajquix zia lidxix. ⁸ Chi baguiaa ree bén guin zian, bidxeb reeman, abi' baza't reeman Dios zagdxe por guialrniabee ni badëëman loj ree bejn.

Rbejdx Jesús Matew

(Mr. 2:13-17; Lc. 5:27-32)

⁹ Chi baza Jesús yagaj ziaman, baguiaaman tijb xin la Matew. Zojbix lod ruquijxix impuest, abi' rëbaman lojx:

—Tanal naj.

Dxel bisu Matew zinalix laaman.

¹⁰ Tijb dxej chi cayaw Jesús lidx Matew con zien ree bén ruquijx impuest në ree Bén zëëb xtiidx ad nabant xnejz, gra reeman zojbnë Jesús xan mex con ree xbejnman. ¹¹ Chi baguiaa ree Bénfarisew zian, gunabdiidx reeman loj ree xbejn Jesús rëb reeman:

—¿Chexc zeel cayawnë xmextridi Bén ruquijx ree impuest në ree béndol?

¹² Chi biguiejn Jesús ni rëb reeman, dxel rëbaman:

—Bénnadaan ree ad ryaadxt reeman doctor, Bénragxuu ree laa reeman ryaadx doctor. ¹³ Gol chej, gol basiid xhie rën guiëb loj xtiidx Dios lod

rëb: “Ni mazri rënan naj guial yaya lasa'di luar guidnëdi gon lon.” Yan, naj ad zialtan par ree benza'c, zialan par ree béndol, din yayüjn reeman xgab por xtol reeman.

*Rniabdiidx reeman loj Jesús xcwent guialrba'n
(Mr. 2:18-22; Lc. 5:33-39)*

¹⁴ Dxel ree xbejn Waj, bën baroobnijs bejn ree, bibig reeman loj Jesús, zianz gunabdiidx reeman lojman, rëb reeman:

—¿Chexc zeel dunujn con ree bënfarisew dád zienvolt raba'nan, guiáad ree xbejnl ad rba'nt reeman?

¹⁵ Badxi' Jesúsán rëbaman:

—Lod yu' guialruxhliaa, ¿wen runaya ree biooz ya chi za'në xin cuxhliaa guin laa reeman? Per guidxin dxej chiquiedix, dxel guiba'n reeman.

¹⁶ 'Achut rata' lajd cüb loj lajd yojx din zaxü'n lajd cüb guin, abi' mazri quixya'n lajd yojx guin.

¹⁷ Ad rgu' tëet reeman vin cüb lën anfr yojx din zaxya' anfr yojx guin, abi' zi'c anfr guin zi'c vin guin zaxin reen. Zeel naj guial chu' vin cüb lën anfr cüb, din ni'qui tijb reen ad zaxint.

*Bayajc xi'n Jairo në béngunaa bagaal xab Jesús
(Mr. 5:21-43; Lc. 8:40-56)*

¹⁸ La'tgaj canee Jesús zian, bidxin tijb bën rniabee lën xyadoo ree bën Israel, abi' bazuxibaman loj Jesús, rëbaman:

—Yangajczi güjt da xi'ndxa'pan, per bal gui'til guixhioob yaal guijquim zabanm.

¹⁹ Dxel zinë Jesús laaman con ree xbejn Jesús.

²⁰ Abi' tijb béngunaa ragxuu ma gojc chiptio'p ijz ad rbëzt ryajbaman rejn, gubigaman niz xijch Jesús

abi' bagaalaman guia' xabaman, ²¹ guial gunal-
adxaman: “Bal gugaalaman majsi xabzaman, za-
yajcaman.” ²² Per badxi' loj Jesús, abi' baguiaadx-
ijchaman béngunaa guin, dxel rëbaman lojman:

—Zagdxe bagu' luxdool, xi'n. Ma bayajquil guial
bililadxil naj.

Abi' loj hor ziigajc bayajc bën guin.

²³ Chi bidxin Jesús lidx bën rniabee guin,
baguiaaman ma riga' ree xinrucwejdx din
chiquie'ch reex xi'nman, abi' ree bejn roon
rbixdiaj reeman guijquim. ²⁴ Dxel rëb Jesús loj
reeman:

—Gol barii guie, din ad güjtt bindo guin,
naga'yëjszim.

Abi' baxijdxnë reeman laaman. ²⁵ Chi ma barii
reeman, zianz guyuman. Gunaazaman yaa bindo
guin dxel bixchem. ²⁶ Abi' guidib niz yagaj bire'ch
diidx ni goc.

Rayüjn Jesús tio'p bénlutia'p

²⁷ Chi baza Jesús yagaj, binal tio'p bénlutia'p
laaman, rbixdiaj reeman, rëb reeman:

—¡Jesús, xdiaa Davi, baya dunujn!

²⁸ Chi badxin Jesús lod zojbaman, dxel bibig
ree bën guin lojman, abi' gunabdiidxaman loj
reeman, rëbaman:

—¿Rliladxidi ya guial zile' yayünan lëjt?

Badxi' reeman laan rëb reeman:

—Raliduladxan, Dad.

²⁹ Dxel bagaal Jesús guiaaloj reeman, rëbaman:

—Gac zi'c rliladxidi.

³⁰ Abi' bayajc guiaaloj reeman, dxel rëb Jesús loj
reeman:

—Ad bal chu loj guiëbidi guial bayajc guiaalojdi.

31 Per naabzi baza reeman yagaj, guzuloj catie'ch reeman diidx guidib niz yagaj ni been Jesús.

Rayüjn Jesús tijb bengop

32 Chi baza ree bén bayüjn Jesús guiaaløj, dxel bidxinnë ree bejn tijb bengop, yu' xindxab luxdooan. 33 Abi' guloxzi babëë Jesús xindxab guin luxdoo bengop guin, laa guzuloj gajc caneeman. Abi' dád badxaløj ree bejn, rëb reeman:

—Ad goct waguiaa ree lasa' milagr guie niz Israel.

34 Per ree bénfarisew rëb reeman:

—Bén guin rabëë xindxab luxdoo ree bejn por xgualrniabee gajc xindxab rniabee ree xindxab.

Raya Jesús bejn ree

35 Wej Jesús gra ree ciuda në ree guiedx ni riga' niz yagaj, abi' beegaj lod rejman ruman lën ree yadoo persi rulüüman bejn ree xtiidx Dios, rëbaman loj reeman xhienaag rniabee Dios, rayüjn tëëman graløj gualrdoob në graløj gualguijdx ni rajc ree bejn. 36 Chi baguiaa Jesús benzien guin ree, bayaman laa reeman, gual dád naya riga' reeman, riga' reeman zi'c xiil ad rya'pt. 37 Dxel rëbaman loj ree xbejnman:

—Walican zien bejn rën gucaagdiajg xtiidx Dios, per ad zient bén gulüü laa reeman yu'. 38 Zeel gol gunab loj Dios din guixhiaalaman mazri ree bén gulüü laa reeman.

10

*Gulej Jesús chiptio'p ree apóstoles
(Mr. 3:13-19; Lc. 6:12-16)*

¹ Gurejdx Jesús chiptio'p ree xbejnman, abi badëëman guialrniabee loj reeman din yabëë reeman xindxab luxdoo ree bejn din yayüjn tëë reeman bejn ree graloj guialrdoob në graloj guialguijdx.

² Bén guie ree naj guidxiptio'p ree xi apóstoles Jesús: Simón bén gulëëljman Bëd, con bijchaman Andrejs, në Jacob con Waj, bén naj ree xi'n Zebedeo. ³Në Felip, Tol, Tumajs con Matew bén baquijx impuest, nëtëë Jacob xi'n Alfeo con Lebeo bén la gajc Tadeo ⁴ në Simón bén bi'ch loj ree bén Cananistas con Judas Iscariote bén yayü Jesús.

Rxhiaal Jesús gra ree xbejnman chigliüü reeman xtiidx Dios
(Mr. 6:7-13; Lc. 9:1-6)

⁵ Chi guxhaal Jesús guidxiptio'p ree xbejnman, rëbaman loj reeman:

—Ad chedi niz lod zobj ree bén ad najt bén Israel, ni'qui ree guiedx riga' niz Samaria, ⁶ gol chejli niz lod zobj ree bén Israel bén ad zinalt ree xnejz Dios. ⁷ Gol güjdx loj reeman guial ma zëëd gajxh xguialrniabee Dios. ⁸ Gol bayüjn bénragxuu ree, gol basban bén ma güjt ree, gol bayüjn bén rajc ree guialguijdx la lepra, gol babëë tëë xindxab luxdoo ree bejn. Zi'cgajc cwa' lagajdi guialrniabee, zian-gajc yayüjndi bejn lagajzi.

⁹ Ad chinëdi or, ni'qui plajt, ni'qui cobr, ¹⁰ ni'qui guijxh. Ad bal chinë stib nejz xabidi, ni'qui stib nejz xgurëchidi, ni'qui yagriadxidi, din bén rüjn dxiin rayal gudëëd ree bejn ni gawaman.

11 'Chi guidxindi tijb guiedx o tijb ciuda, gol gule'c ruson chu bën naj benza'c yaya'ndi lidx, yagaj gol baya'n xt chi yazadi luguiedx guin. 12 Abi' chi chu'di lënü guin, gol güjdx loj ree bën zojb yagaj: “Yabe'cdxe Dios luxdoodi.” 13 Bal rayal reeman guialnaza'c guin, zaya'nan con laa reeman guiáad bal id rayal reeman laan zayejan con lëjt. 14 Guiáad bal yu' guiedx o yu ya lod ad raca't reeman lëjt o bal id rën reeman gucaagdiajg reeman ni guiëbidi, gol baza yagaj, gol gudxiyp guxyuj guia'di zi'c tijb sen guial ad bazoobt reeman xtiidxidi. 15 Naj rni lëjt guial dxej ni yadëed ree bejn cwent loj Dios, mazri casti narooob yayal reeman guial loj ree bën Sodoma në Gomorra.

Guialzi ni zëäd

16 Rëb tëë Jesús loj ree xbejnman:

—Gol bacaagdiajg ni rnin, naj rxhial lëjt zi'c ree xiil loj ree cuyojt. Zeel gol gojc nasin zi'c bëel, gol gojc tëë nadoo zi'c palom. 17 Gol gojp cudad din zayü ree bejn lëjt loj ree guxtis, zaguijn reeman lëjt lën ree yadoo. 18 Abi' xt chinë reeman lëjt loj ree gobernador në loj ree rey guial rliladxidi naj, zian güdi da diidxan loj reeman në loj ree bën ad zinalt xnejz Dios. 19 Per chi chinë reeman lëjt loj guxtis, ad chu'di xgab xhie guinieedi xhie tëë naag guinieedan, din chi guidxin hor guinieedi, Dios yazaladx lëjt diidx ni guinieedi. 20 Din ad lëjttan guinee, xSprijt xDadidi Diosan guinee por lëjt.

21 'Zadxin dxej yayü ree bejn laagajc bijch reeman par guiët reeman. Guiáad ree dad yayü laagajc xi'n reeman, abi' ree bejn zadxe'ch xdad reeman në xniaa reeman abi' yayü reeman laa

reeman par guiët reeman. ²² Gra bénguidxliuj guidxe'ch lëjt guial najdi da bejnan, per bën sudxi'ch loj guial riladxaman naj xt dxej chigra guibanman, laaman yayal xanyabaa. ²³ Chi sunal reeman lëjt tijb luguiedx par güün reeman lëjt xhienin, gol chej stijb guiedx, din naj rni lojdi, ad warat xguiedx Israel chedi chi gui't Bén guxhaal Dios.

²⁴ 'Tijb bejn ad mast lasajc loj xmextraman, ni'qui tijb mojs ad mast lasajquix loj xpatronx. ²⁵ Bén cusiid rayal xhienladxaman chi ma rajcaman zi'c rajc xmextraman guiáad tijb mojs rayal xhienladxix chi ma najx zi'c xpatronx. Nacli naj rniabeen lojdi, gulëëljaj ree bejn naj Beelzebú, didxgui lëjt najdi da bejnan.

*Chu rayal guidxeb bejn
(Lc. 12:2-9)*

²⁶ 'Ad guidxebidi bejn ree, din achet ni ralan yu' ni ad zaguiant, ni'qui tijb ni naguie'ch ad yu't ni ad zagbeet bejn. ²⁷ Ni canin lëjt naguie'ch, gol güjdxan loj ree bejn, guiáad ni canin lëjt ralan, gol güjdxan loj gra ree bejn. ²⁸ Ad rdxebidi bën rën ree gugüjt lëjt. Din zile' gugüjt reeman xcuerpidi, per xsprijtidi ad zile't gugüjt reeman laan. Gol bidxebli Dios din laaman zile' gunijt xcuerpidi abi' guixhiaalaman xsprijtidi gabijl.

²⁹ 'Lëjt ragbee guial biguijndoo ree ad lasajct reeb wayëjx, per ni'qui tijb reeb ad zëjtt sin xpermis xDadidi Dios. ³⁰ Guiáad lëjt xt guidxguijquidi graczan nayab loj Dios. ³¹ Zeel ad rdxebidi din mazri lasajquidi guial loj zien da't ree biguijndoo.

*Bén rëb loj ree bejn guial najman xbejn Jesucrist
(Lc. 12:8-9)*

³² 'Bén guiëb niz loj ree bejn guial da bejnanan, ziangajc naj guië loj da Dadan Dios bén yu' xanyabaa guial da bejnanan. ³³ Per bén guiëb niz loj ree bejn guial ad da bejntanan, ziangajc guië loj da Dadan Dios bén yu' xanyabaa guial ad da bejntanan.

*Por Jesús rlia' lasa' ree bejn
(Lc. 12:51-53; 14:26-27)*

³⁴ Rëb tëë Jesús:

—Ad zialtan par yabecdxeñ luxdoo bejn, zialan din guial chililadx reeman naj chu' wadijl. ³⁵ Din guial chililadx bejn naj, zadxe'ch xinguaaw xdadix, guiáad biingunaa zadxe'ch xniaam, abi' biinwalidx zadxe'ch xnasuegrim. ³⁶ Abi' laagajc bén zojb ree lëñülixidi guidxe'ch lëjt.

³⁷ 'Bén rën xdad o xniaa mazczi guial lon, ad zajc gacaman da bejnan. Ziangajc bén rën xi'ngaan o xi'ndxa'p mazczi guial lon, ad zajc gacaman da bejnan. ³⁸ Bén rën guidnal naj, abi' ad rëntaman sagdiajman por naj, ad zile't gacaman da bejnan. ³⁹ Bén rniajchi' guialnaban rajpaman loj guidxliuj guie, zadxin dxej gunijtaman laan, per bén guiët por naj, zajpaman guialnaban tiblayaa con Dios.

*Ni tia' ree bejn
(Mr. 9:41)*

⁴⁰ 'Bén ridxga' lëjt, najn ridxga'man, guiáad bén ridxga' naj, bén guxhaal najn ridxga'man. ⁴¹ Bén ridxga' tijb bén rudëë xtiidx Dios loj ree bejn, guial zëedaman por Dios, zaca'man lasa' ni rayal tia' bén guin loj Dios. Ziangajc bén ridxga' tijb bén naban

zi'c rën Dios, zaca'man lasa' ni rayal tia' bën guin loj Dios. ⁴² Abi' chutëez bën gudëed majsi tib xijgzi nijs naalyuj loj bejn guial najman da bejnan, naj rni lojdi guial yu' ni gudëed Dios tia' reeman.

11

Bigneenë ree xbejn Waj Jesús

(Lc. 7:18-35)

¹ Chi gulox rëb Jesús loj guidxiptio'p ree xbejman con ree nin chiguieen reeman, dxel bazaman yagaj ziglüüman bejn ree xtiidx Dios loj ree guiedx riga' niz yagaj.

² Abi' Waj, la'tgaj yu'man ladxguiib, cwa'man ruson gra ree ni cayüjn Jesús. Dxel guxhaal tio'p choon ree xbejman, ³ bignabdiidx reeman lojman, rëb reeman:

—¿Lüj naj Cristo ya bën naj gui't, o yalëjzan ben ren ya?

⁴ Dxel rëb Jesús loj reeman:

—Gol chej gol güjdx loj Waj ni cuguiaadi në ni cucaagdiajguidi. ⁵ Gol güjdx lojman guial ma ruguiaa ree bénlutia'p, ma rajc rza ree bencoj, ma bayajc tëë ree bën rajc guialguijdx la lepra, ma rigueijn ree bën nacwa't guiáad ree bengüt ma baban reeman, abi' ree bënprob ma cagueijn reeman xtiidx Dios. ⁶ Xiquilbaa ree bën ad zucwëët chililadx naj.

⁷ Chi baza ree bën guxhaal Waj, dxel guzuloj Jesús caneeman loj ree bejn xcwent Waj, rëbaman:

—¿Chu naladxidi naj bën biquiaadi loj yujbidx? ¿Naladxidi ya najman zi'c tijb biqui ni runiib bi?

⁸ ¿O xhienaag naj bën biquiaadi? ¿Najman tijb bën

najcw lajd zagdxe ya? Lëjt ragbee guial bén rajcw ree lajd zagdxe lën palas zobj reeman. ⁹ ¿Chuza biquiaadi? ¿Tijb bén rudëë xtiidx Dios loj ree bejn ya? Per naj rni lojdi guial biquiaadi tijb bén mazri zobjloj guial loj bén rudëëd xtiidx Dios loj ree bejn. ¹⁰ Wajn din laaman naj ben ruza't loj xtiidx Dios lod rëb:

Naj rxhial tijb bén ned lojl,
ben güünchaaw xnejzil.

¹¹ Naj rni lëjt, loj graczi ree bénguidxliuj, ad wayut bén mazri zobjloj guial loj Waj. Per majsi zian, bén ad zobjlojt loj xguialrniabee Dios, laaman mazri zobjloj guial loj Waj.

¹² 'Diizd chi bi't Waj xt yan, zien bejn rüjn da't naguiejn chu' lod rniabee Dios. Abi' ree bén rüjn da't naguiejn laa reeman chu' lod rniabeeman.

¹³ Diizd ley badëë Dios loj Moisejs con loj ree bén badëë xtiidx Dios loj ree bejn, xt Waj, laa reeman gunee xcwent xguialrniabee Dios. ¹⁴ Abi' bal chililadxidi ni ganin lëjt, naj rni guial Wajn naj Elías bén badëë xtiidx Dios loj ree bejn. ¹⁵ Bén rën ree gucaagdiajg, gol bacaagdiajg.

¹⁶ '¿Xhienaag ganin lëjt naj ree bén riga' loj guidxliuj guie yan? Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: ¹⁷ “Bacwejdxan bidxa, per ad baya'tidi, badoolan ni naya ree per ad biintidi.” ¹⁸ Din bi't Waj bén baroobnijs bejn ree, ad rawtaman ad rë' tëëtaman vin, abi' rëbidi xindxab yu' luxdooman. ¹⁹ Yan, bi't Bén guxhaal Dios, rawaman rë' tëëman vin abi' rëbidi nalaman ruladx tëëman gui'e'man, ruchajg tëëman béndol ree con ree bén ruquijx impuest. Per ree bén ma ca' xguialrniabee Dios,

por laa reeman rguien guial gra ni rüjn Dios naj zagdxe.

Bén ad bazoobt ree xtiidx Dios
(Lc. 10:13-15)

²⁰ Dxel guzuloj Jesús cadilëman bén zojb ree guiedx lod beenman mazri zien ree milagr. Din bén guin ree ad bayüjnt reeman xgab por xtol reeman, abi' rëbaman loj reeman:

²¹ —¡Probza lëjt bén Corazín! ¡Probza lëjt bén Betsaida! Din bal luguiedx Tiro në luguiedx Sidón niajc ree milagr ni goc ladxidi, diizd gocli nayüjn reeman xgab por xtol reeman, niajcw reeman lajd ya's nuroob tëë cobdëj guiyc reeman zi'c tijb sen guial ma bayüjn reeman xgab por xtol reeman.

²² Per rnin lëjt guial dxej yadëed ree bejn cwent loj Dios, mazri casti narooob yayalidi guial loj ree bén Tiro në ree bén Sidón. ²³ Guiáad lëjt bén Capernaum, ad naladxidi yayalidi xanyabaa, lëjt yayal gabijl. Din bal luguiedx Sodoma niajc ree milagr goc ladxidi, xt yan sta yu' guiedx guin.

²⁴ Per rnin lojdi guial dxej yadëed ree bejn cwent loj Dios, mazri casti narooob yayalidi guial loj ree bén Sodoma.

Gol guda lon din yaziiladxidi
(Lc. 10:21-22)

²⁵ Lën ree dxejzii rëb Jesús:

—Dad, ruzatan lüj zagdxe, din ni baquie'chil loj ree bén rajc në loj ree bén rignia', laan ma balüül loj ree bén ad rajct. ²⁶ Zian gojc Dad, din zian guyënl.

²⁷ 'Da Dadan banee gra lon. Abi' achut nünbee Jesucrist xi'n Dios, tijbzi Dios, achu tëët nünbee

Dios, tijbzi Jesucrist xi'nman, con ree b́en ŕenman ǵuunbee Dios. ²⁸ Gradi, b́en ma badxag ŕujn xhienin din yaya'ndi zagdxex loj Dios, ma badxag t́eedi ńuü xtolidi. Gol guda lon, naj gune guialraziiladx lojdi. ²⁹ Gol bazoob da diidxan, gol basiid t́ee gaquidi benza'c ńe b́en chaawladx zi'c naj, din yabedxe luxdoodi loj Dios. ³⁰ Din ad naẃeegt guial guzoobidi da diidxan, ad naẃeeg t́eet guial ǵuundi zi'c ŕenan.

12

Rgui'ch ree xbejn Jesús trigo dxej raziiladx ree b́en Israel

(Mr. 2:23-28; Lc. 6:1-5)

¹ Tijb dxej raziiladx ree bejn, chi cadéd Jesús con ree xbejnman loj tijb guiniaa lod yu' trigo, dxel calaan ree xbejnman abi' guzuloj cagui'ch reeman trigo persi cayaw reeman laan. ² Abi' chi baguiaa ree b́enfarisew ni cayüjn reeman, ŕeb reeman loj Jesús:

—Baguiaa ree xbejnl nial cayüjn reeman ni ad rayalt ǵuun reeman dxej raziiladx ree bejn.

³ Dxel ŕeb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman? ⁴ Guyu Davi ĺen xyadoo Dios abi' cwa'man guiadxtil ma nagle' ree gudawaman con ree xcompniaraman, ni ad rayalt niajw reeman, bixhiosi ree rayal gaw laa reen. ⁵ ¿O gadidi gool loj xley Moisejs ya guial achet dol ŕujn ree bixhioz chi ŕujn reeman dxiin ĺen yadoo majsi ad raziiladxt reeman dxej raziiladx ree bejn? ⁶ Abi' naj rni ĺejt guial naj, b́en za'né ĺejt mazri lasajcan guial loj yadoo. ⁷ Bal

rignia'di xhie rën guiëb loj xtiidx Dios lod rëb: “Ni rënan naj guial yaya lasa'di, ad guial gunetidi gon lon.” Bal rignia'di diidx guin ree ad zudxiibtidi guijc ree bën ad rajpt dol. ⁸ Abi' Bén guxhaal Dios rajpaman guialrniabee dxej raziiladx ree bejn.

Rayajc tijb bën nëjt tibladyaa

(Mr. 3:1-6; Lc. 6:6-11)

⁹ Chi gudëd gojc zian, dxel baza Jesús abi' guyuman lën tijb yadoo naj niz yagaj. ¹⁰ Lën yadoo guin za' tijb bën nëjt tibladyaa. Abi' guial ree bënfarisew raguuil reeman mod xhie gudxiib reeman guijc Jesús, dxel gunabdiidx reeman lojman, rëb reeman:

—¿Zile' yayüjn bejn tijb bënragxuu dxej raziiladx bejn ya?

¹¹ Badxi' Jesús san rëbaman:

—Bal tijb lëjt rajp tijb xiil, abi' yabib lën bala' dxej raziiladx bejn. ¿Nid zabëëdi laab dxej guin ya?

¹² ¿Wen id mazri lasajc tijb bejn guial loj tijb xiil ya? Zeel achet güünan zajc güün bejn ni naj zagdxe dxej raziiladx bejn.

¹³ Dxel rëb Jesús loj bënragxuu yaa guin:

—Basli yaal.

Abi' basli yaa bën guin, loj hor ziigajc bayajc yaaman zi'c naj stibladan. ¹⁴ Per chi barii ree bënfarisew guin lën yadoo guin, guzuloj cayü reeman diidx xhienaag güün reeman din gugüjt reeman Jesús.

Bën gule Dios

¹⁵ Chi gogbee Jesús zian, laa zia gajcaman, abi' zien ree bejn binal laaman. Dxel bayüjnman gra ree bënragxuu, ¹⁶ abi' gunabeeman laa reeman

chitëe gutie'ch reeman diidx chu bayüjn laa reeman. ¹⁷ Zian guzobj xtiidx Isaías, bén badëe xtiidx Dios loj ree bejn, chi rëbaman:

¹⁸ Gol baguiaa, bén guie naj bén gulen din güünman naj sirv, laaman naj bén rën da'tan, rabaanë' tëen laaman.

Gudë da Sprijtan lojman abi' guiëbaman loj ree bénguidxliuj xhienaag naj da guialrniabeen.

¹⁹ Achut tilnëman, ad zabixdiaj tëetaman achut tëët guien cha'man niz lunejz.

²⁰ Ad zudëedtaman casti bén ad za'dxi'cht ree loj da nejzan, në ree bén ad ridxga'za'ct naj, xt chi ma beenman gan gac guialguxtis.

²¹ Abi' xt ree bén ad najt bén Israel cwëz reeman yabëëman laa reeman loj dol.

*Rëb ree bejn ca' Jesús xguialrniabee Beelzebú
(Mr. 3:19-30; Lc. 11:14-23; 12:10)*

²² Binë ree bejn tijb xinguaaw lod za' Jesús, yu' xinxab luxdoox, natia'p lojx naj tëex gop. Dxel bayüjn Jesús laax abi' guzuloj rnieex ruguiaa tëex.

²³ Graczi ree bejn dád badxaløj reeman, abi' rëb reeman:

—¿Id bén guinan zëed loj xdiaa Davi ya?

²⁴ Chi biguiejn ree bënfarisew zian, dxel rëb reeman:

—Bén guin rabëe xinxab luxdoo ree bejn por xguialrniabee Beelzebú xin rniabee ree xinxab.

²⁵ Per Jesús gogbee gajcaman xgab cayüjn reeman, abi' rëbaman:

—Gra nacion o ciuda bal id nadxag riga' bejn, rlia' lasa' reeman, ziangajc tijb famil bal id nadxag riga' reeman, rlia' lasa' reeman. ²⁶ Ziangajc bal xindxab su contr laagajquix, nayob nitix. ²⁷ Lëjt na guial naj rabë xindxab luxdoo ree bejn por xguialrniabee Beelzebú, per bal zianan, ¿chuza rudëë guialrniabee loj xbejndi din yabëë reeman xindxab? Zeel laagajc reeman rulüü guial ad laat rnieedi. ²⁸ Per naj, bal por xSprijt Dios rabën xindxab luxdoo ree bejn, rën guiëban guial ma za'në xguialrniabee Dios lëjt.

²⁹ Din ¿xhieza naag chu' tijb bejn lidx tijb bën gojl par cwanman ni rajpaman, bal id zaxhiixgajman laaman? Zian güünman din chile' cwanman ni rajpaman.

³⁰ Bën ad za't con naj, za'man contr naj. Guiáad bën ad ruto'pt bejn par naj, rtie'chaman laa reeman.

³¹ 'Zeel rnin lëjt: Züjn Dios perdon xhietëëz dolan, në ree diidxguijdx ni rnieetzi ree bejn, per ad züjntaman perdon bën rnieeguijdx ree xSprijt Dios. ³² Chutëëz bën guinieeguijdx Bën guxhaal Dios, zajcaman perdon, per bën guinieeguijdx xSprijt Dios ad zajctaman perdon yan, ni'qui chi yaguialan.

*Nünbee bejn tijb yag por ni rtia lojn
(Lc. 6:43-45)*

³³ 'Lëjt ragbee, bal tijb bejn ruzuj tijb yag zagdxe, rtia ni zagdxe lojn, per bal guzujman tijb yag guijdx, rtia ni guijdx lojn. Din tijb gaj yag nünbee bejnan por ni rtia lojn. ³⁴ ¡Xi'n xindxab! ¿Xoza guinieedi diidx zagdxe ree awa benmal

lèjt? Din ni yu' luxdoo bejn laan rnieeman.
³⁵ Benza'c rnieeman diidxza'c, din laan yu' luxdoo-
 dooman. Guiáad benmal rnieeman diidxmal din
 laan yu' luxdoooman. ³⁶ Per naj rni lèjt guial dxej ni
 güün xguialguxtis Dios, gra ree bejn yadëed cwent
 lojman por gra ree diidxguijdx ni rniee reeman.
³⁷ Din por xtiidx gajc bejn guiguien bal rayalaman
 xcasti Dios o ad rayaltaman laan ya.

Rniab ree bénfarisew tijb milagr

(Mr. 8:12; Lc. 11:29-32)

³⁸ Yu' ree bénfarisew con ree mextr ni rajc ley, rëb
 loj Jesús:

—Mextr, rayënan yaguaaan güünl tijb milagr.

³⁹ Badxi' Jesúsán rëbaman:

—Lèjt benmal, bén ad rüjnt ni rën Dios abi' rëndi
 günan tijb milagr. Per achetri guguaadi, tijbzi
 zi'c guzac Jonás bén badëe xtiidx Dios loj ree bejn.

⁴⁰ Din zi'c guyu Jonás lën bëjl narooob choon dxej
 choon guiaal, ziangajc Bén guxhaal Dios, choon
 dxej choon guiaal chu'man lën baa. ⁴¹ Abi' chi

yadëed ree bejn cwent loj Dios, bén guban ree
 Nínive zaban reeman abi' guiëb reeman guial ree
 bén riga' yan, yayal reeman xcasti Dios. Din bén
 Nínive ree bayejc reeman loj Dios chi bacaagdiajg
 reeman xtiidx Dios ni gunee Jonás. Abi' yan,
 bén za'në lèjt mazri lasajcaman guial loj Jonás.

⁴² Ziangajc bén goc reina niz sur, zabanman chi
 yadëed ree bejn cwent loj Dios, dxel guiëbaman
 guial ree bén riga' yan, yayal reeman xcasti Dios.
 Din laaman dád zijt guzaman persi bicaagdiajga-
 man xguialrajc rey Salomón. Abi' yan, bén za'në
 lèjt mazri lasajcan guial loj Salomón.

*Xindxab ni rayejc**(Lc. 11:24-26)*

⁴³ 'Chi rarii tijb xindxab luxdoo tijb bejn, abi' rzax niz loj yujbidx rguuilix lod yaziiladxix. Abi' chi ad rdxejlt lod yaziiladxix, dxel rüjn_x xgab naladxix: ⁴⁴ “Zagdxeli yaye'can lod guzaan.” Abi' chi rayejquix ruguiaax luxdoo bén guin najn zi'c tijb lénü lod achut zobj, lod bilioob lod najcchaaw tää. ⁴⁵ Dxel rica'x za gajdx xindxab naj ree mazri xinmal guial lojx. Abi' ru gra reex luxdoo bén guin. Dxel mazri benmal gacaman guial loj ni gocaman yaløj. Ziangajc sac ree benmal riga' loj guidxliuj yan.

*Xniaa Jesús con ree bijchaman**(Mr. 3:31-35; Lc. 8:19-21)*

⁴⁶ Sta canee Jesús loj ree bejn, bidxin xniaaman con ree bijchaman, za' reeman lule', rën reeman guinieenë reeman laaman. ⁴⁷ Abi' yu' tijb bén rëb lojman:

—Laa xniaal con ree bijchil za' lule' guin, rën reeman guinieenë reeman lüj.

⁴⁸ Per Jesús badxi'man xtiidx bén guin rëbaman:

—¿Chu naj da nan chu tää ree nin naj da bichan?

⁴⁹ Dxel con yaaman balüü ree xbejnman rëbaman:

—Bén guie ree naj da nan në ree da bichan.

⁵⁰ Din chutëez bén rüjn zi'c rën da Dadan bén yu' xanyabaa, laaman naj da bichan, da zanan, në da nan.

13*Xcwent bén rtie'ch bin**(Mr. 4:1-9; Lc. 8:4-8)*

¹ Dxejzii brieri Jesús yu lod zojbaman, bisobaman ro' nijs Galilea. ² Abi' guial dád zien ree bejn bido'p yagaj, beenan naguiejn wë'p Jesús loj tijb barcw dxel gurejman lojn, guiáad ree bën guin za' reeman ro' nijs guin. ³ Zien ree ni guzuloj culüüman laa reeman, per con ganax zi'c cwent ree, rëbaman loj reeman:

—Tijb bejn, briiman bigtie'chaman bin loj xguiniaaman. ⁴ Chi catie'chaman bin guin, ta'n nan biajb loj nejz, abi' bi't ree biguijn gudaw reeb laan. ⁵ Sta'n nan biajb loj ree guiaj lod ad riga't zien yuj, cari gulejnan guial ad zient yuj riga'. ⁶ Per chi brieri gubijdx, baze'can laan, abi' guial ad yu't liujn gubidxan. ⁷ Dxel sta'n nan biajb loj ree yaquiëjch, chi guni's ree yaquiëjch guin banidloj reen laan. ⁸ Per sta'n nan biajb loj yuj za'c, abi' dád gojcan. Yu'n cwa tibgayuu bin loj, yu'n cwa gayojn yu' tēen cwa gajlbichii. ⁹ Bën rën gucaagdiajg, gol bacaagdiajg.

*Chexc zeel rulüü Jesús con ni naj ree zi'c cwent
(Mr. 4:10-12; Lc. 8:9-10)*

¹⁰ Dxel gubig ree xbejn Jesús lojman rëb reeman:
—¿Chexquiza zeel rulüül bejn ree con ganax zi'c cwent ree?

¹¹ Badxi' Jesús laan rëbaman:

—Lëjt, Dios ma basa'n lëjt din chignia'di xhien-aag naj xguialrniabeeman, per bën guin ree ad basa'nt Dios laa reeman chignia' reeman laan. ¹² Din Bën ma rignia', gusnuu chignia'man mazri, abi' zignia' da'taman. Per bën ad rignia'za'ct ad rüjn tēetaman naguiejn chignia'man mazri, xt ta'n ni rignia'man zayanladxaman. ¹³ Zeel rnienë'n

laa reeman con ganaxzi zi'c cwent ree. Din majsi rani loj reeman per rüjn reeman zi'c bén ad ruguiaat, abi' majsi rigueijn reeman per rüjn reeman zi'c bén ad rigueijnt, bén ad rignia' tēēt.

¹⁴ Zian rzojb xtiidx Isaías, bén badēē xtiidx Dios loj ree bejn, chi rēbaman:

Majsi rigueijn reeman, per achetczi chignia' reeman.

Abi' majsi rani loj reeman, per ad ruguiaat reeman.

¹⁵ Din ma been luxdoo reeman gojl,

nayaaw guidiajg reeman,

nayaaw tēē guiaaløj reeman.

Chitēē guguaa reeman,

guiguieijn reeman,

chignia' tēē reeman.

Din ad rēnt reeman gui't reeman lon din gūnan laa reeman perdon.

¹⁶ 'Per xiquilbaadi cuguaadi caguiejn tēēdi.

¹⁷ Din naj rni lojdi guial dád zien ree bén badēē xtiidx Dios loj ree bejn, nē ree bén guban zi'c rayal,

guyēn reeman nuguaa reeman ni cuguaadi per

ad baguiaat reeman laan. Guyēn reeman niguiējn

reeman ni caguiejndi per ad bigueijnt reeman

laan.

Rusignia' Jesús xcwent bén rtie'ch bin

(Mr. 4:13-20; Lc. 8:11-15)

¹⁸ 'Yan gol bacaagdiajg xhie rēn guiēb ni rnin lojdi xcwent bén bigtie'ch bin. ¹⁹ Bén rigueijn xtiidx

Dios abi' ad rignia'taman laan, laaman naj zi'c bin

biajb loj nejz, guial laa ri't gajc xindxab rquiedix ni

bacaagdiajgaman. ²⁰ Guiáad bin biajb loj ree guiaj

naj zi'c bén rigueijn xtiidx Dios, abi' dád nix ru

luxdooan riguejnman laan, ²¹ per guial najman zi'c cwaan ni ad yu't xliuj, ad rzudxi'chtaman. Chi rzagdiajman o rdxe'ch ree bejn laaman por xtiidx Dios, laa rusa'n gajcaman ni rililadxaman. ²² Abi' bin biajb loj ree yaquiějch naj zi'c bėn riguejn xtiidx Dios, per guial mazri ruman xgab por ni yu' loj guidxliuj guie, rusquiee guialnaza'c riga' loj guidxliuj guie laaman, abi' zianzi rucwėėz rucaagdiajgaman xtiidx Dios achet sirv been ni bacaagdiajgaman. ²³ Per bin biajb loj yuj za'c naj zi'c bėn riguejn xtiidx Dios abi' rignia'man laan rőjn tėėman zi'c rėn Dios, zi'c ni cwa tibgayuu bin loj o zi'c ni cwa gayojn o ni cwa gajlbichii.

Trigo con gui'xhguijdx

²⁴ Be Jesús stijb ni naj zi'c cwent loj reeman, rėbaman:

—Xguialrniabee Dios naj zi'c tijb bėn badxe' ganax bin zagdxe loj xguiniaa. ²⁵ Per la'tgaj naga'yėjs gra reeman, bidxin bėn rdxe'ch laaman guxőbinman gui'xhguijdx ree loj trigo guin dxel ziaman. ²⁶ Abi' chi gulen trigo guin brii tėė dojn lojn nė ree gui'xh guin ma yu' lojn. ²⁷ Dxel bi-cojn ree xmojs bėn naj xguiniaa laan laaman, rėb reeman: “Dad ŷnid ganax bin zagdxe badxe' loj xguiniaal ya? yan, ŷbanza guza gui'xh yu' lojn?” ²⁸ Badxi'man laan rėbaman: “Wed tijb bėn rdxe'ch naj bidgadxe' laan.” Dxel gunabdiix ree mojs guin lojman rėb reeman: “ŷXhie nal zudojxhan gui'xh guin ree ya?” ²⁹ Dxel rėbaman loj reeman: “Yajqui, chitėė guial gaxhidi gui'xh guin gaxhidi nė trigo guin. ³⁰ Zagdxeli gol basa'nan đin ni'snėn trigo guin xt chi ma gojcan. Abi' chi guidxin dxej yado'p

trigo guin guiën loj ree bén guto'p laan din yalojx-gaj gui'xh guin yato'p reeman din guixhii reeman lënan zianz che'can. Dxelri yato'p reeman trigo guin din cu'chaaw reeman laa reen lod ruchaaw reen.”

Xcwent xhaj moxtajs

(Mr. 4:30-32; Lc. 13:18-19)

³¹ Be Jesús stijb ni naj zi'c cwent loj reeman, rëbaman:

—Xguialrniabee Dios naj zi'c xhaj moxtajs, ni rudxe' tijb bejn loj xguiniaaman. ³² Abi' bin guin naj mazri ni wit loj gra ree bin, per chi rni'san laan rajc mazri ni narooob loj gra ree cwaan. Abi' guial narooob da't rajcan, xt rüjn xguixbitia's ree biguijn xidxan.

Xcwent levadur

(Lc. 13:20-21)

³³ Be tëë Jesús stijb ni naj zi'c cwent loj reeman, rëbaman:

—Xguialrniabee Dios naj zi'c levadur ni rugo'ch tijb béngunaa choon midid harin, abi' laan rusaaguij gra cob guin.

Chexc zeel rülüü Jesús con ni naj ree zi'c cwent

(Mr. 4:33-34)

³⁴ Gra ree ni balüü Jesús bejn ree, balüüman laa reeman con ganax ree ni naj zi'c cwent, achet balüüman laa reeman con ni ad najt ree zi'c cwent.

³⁵ Zian gojc persi guzobj xtiidx bén badëë xtiidx Dios loj ree bejn, chi rëbaman:

Con ganaxzi ni naj ree zi'c cwent gulün bejn ree, guiën loj reeman ni gad reeman gagbee diizd chi gocchaaw guidxliuj.

Rusignia' Jesús xcwent gui'xhguijdx

³⁶ Chi ma bazaadiidxnè Jesús benzien guin ree, dxel bayuman lènü con ree xbejnman, abi' gunab-diidx reeman lojman, rëb reeman:

—Basignia' dunujn xcwent gui'xhguijdx ni gulen loj guiniaa guin.

³⁷ Badxi' Jesúsán rëbaman:

—Bén rudxe' bin zagdxe guin naj Bén guxhaal Dios, ³⁸ abi' guiniaa guin naj guidxliuj. Guiáad bin zagdxe guin naj ree bén naj par loj xguialrniabee Dios. Abi' ree gui'xh guin naj bén naj ree par xindxab. ³⁹ Guiáad bén rdxe'ch, bén guxübin trigo guin naj xindxab. Abi' guial rado'p guialnaza'c guin rën guiëb chi nit guidxliuj, guiáad ree bén yato'p guialnaza'c guin naj ree xianjl Dios. ⁴⁰ Zian zi'c rado'p ree gui'xhguijdx guin par che'c reen, zian gac chi nit guidxliuj. ⁴¹ Bén guxhaal Dios guixhiaal ree xianjlaman din yabëë reeman bén rayal ree yarii loj xguialrniabeeman, bén ruzaal-guiiw bejn ree din güün reeman dol në gra ree bén cayüjn dol. ⁴² Abi' guzaal reeman laa reeman loj bajl lod goon reeman xt gaw lay reeman. ⁴³ Dxel bén naban ree zi'c rën Dios, gudiin reeman bacha' loj xguialrniabee xDad reeman Dios, zi'c rdiin gubijdx bacha'. Bén rën gucaagdiajg, gol bacaagdiajg.

Xcwent ni lasajc

⁴⁴ 'Xguialrniabee Dios naj zi'c tijb ni lasajc da't, ni naguie'ch loj tijb guidxliuj. Abi' rdxejl tijb bejn laan zianz ruquie'chaman laan stijb, lod gulëëman laan. Abi' dád rabaaman ruto' gra ni rajpaman persi rsiiman guidxliuj guin.

Xcwent perl

⁴⁵ 'Rni tëën lëjt: Xgualrniabee Dios naj zi'c tijb bën rguuil perl zagdxe din siiman laan. ⁴⁶ Chi rdxejlaman tijb perl lasajc, ruto' gra ni rajpaman abi' rsiiman laan.

Xcwent guijxh rniaaz bëjl

⁴⁷ 'Abi' tëë xgualrniabee Dios naj zi'c tijb guijxh ni ruzaal reeman loj nijs abi' rniaazan graloj bëjl. ⁴⁸ Dxel chi ma gudxa guijxh guin rabëë reeman laan ro' nijs guin, abi' rbej reeman rabe reeman loj bëjl guin, dxel ragu' reeman be zagdxe lën dxüm guiáad be ad najt zagdxe rusëëb reeman. ⁴⁹ Zian gac dxej nit guidxliuj, gui't ree xianjl Dios yabe reeman benmal loj ree benza'c. ⁵⁰ Abi' guzaal reeman benmal guin ree loj bajl lod goon reeman abi' xt gaw lay reeman.

Bén rbe nicüb në ni yojx

⁵¹ Dxel gunabdiidx Jesús loj ree xbejnman, rëbaman:

—¿Rignia'di gra ni canin lëjt ya?

Badxi' reeman laan rëb reeman:

—Rayignia'nán, Dad.

⁵² Dxel rëb Jesús loj reeman:

—Gra ree mextr ni rajc ley, abi' cusiid reeman xhienaag naj xgualrniabee Dios, laa reeman naj zi'c tijb bën rbe nicüb në ni yojx loj gra ni rajpaman.

Badxin Jesús Nazaret

(Mr. 6:1-6; Lc. 4:16-30)

⁵³ Chi gulox gunee Jesús loj reeman zian, zianz bazaman. ⁵⁴ Dxel badxin ladxaman, ni guzuloj

culüüman bejn ree lën xyadoo reeman. Abi' dád badxaløj ree bën guin, rëb reeman:

—¿Ban guin basiidaman gra ree ni rajcaman? ¿Chexquiza zeel rajc rüjnman milagr ree? ⁵⁵ ¿Nid laaman naj xi'n carpinter ya, abi' xniaaman naj Li, guiáad ree bijchaman naj Jacob, Xiëb, Simón, në Judas? ⁵⁶ ¿Nid luguiedx guie zojb ree bizanman ya? ¿Banza guin basiidaman gra ree ni rajcaman?

⁵⁷ Abi' ad bidxga't reeman Jesús. Per rëbaman loj reeman:

—Bantëez guin rajp ree bejn respejt tijb bën rudëe xtiidx Dios loj ree bejn, per ladxaman achut rajp laaman respejt ni'qui lidxaman.

⁵⁸ Abi' ad zient milagr beenman yagaj guial ad bililadxt reeman laaman.

14

Güjt Waj Bén baroobnijs bejn ree (Mr. 6:14-29; Lc. 9:7-9)

¹ Tiampzii Herodes bën canabee niz Galilea, biguiejnman ni cayüjn Jesús. ² Abi' rëbaman loj ree xbejnman:

—Waj bën baroobnijs bejn ree, laaman baban zatijb, zeel rajpaman guialrniabee rüjnman milagr ree.

³ Rëb Herodes zian guial laaman gunabee bini-aaz Waj, abi' bixiiman con caden dxel badxe' reeman laaman ladxguiib. Been Herodes guin zian por Herodías lacheel bijchaman bën la Felip, ⁴ guial rëb Waj guin loj Herodes:

—Ad laat guial zojbnël laagajc lacheel bijchil.

⁵ Guyën Herodes nugüjtaman Waj, per bidxbaman xhie nüjn ree bejn laaman guial graczi

reeman rëb Waj naj tijb bén rudëed xtiidx Dios loj ree bejn. ⁶ Per chi baza' Herodes ijz, brii xi'n Herodías baya'm loj ree xbioozaman. Abi' dád bayuladx Herodes zi'c baya'm, ⁷ dxel rëb Herodes gudëëdaman xhietëez ni guiniabim. ⁸ Abi' xniaam rëb lojm xhie guiniabim, dxel rëbim loj Herodes:

—Banee guiyc Waj bén ruroobnijs bejn ree, baneen loj tijb pliajt.

⁹ Dád guyunaya rey Herodes, per guial mal baya'n reeman diidx niz loj gra ree xbioozaman, gunabeeman xsuldadaman gudëed reeman ni gunabim. ¹⁰ Dxel gunabeeman guitü' reeman guiyc Waj lën ladxguiib guin, ¹¹ abi' bidxinnë reeman laan loj tijb pliajt badëed reeman laan lojm, dxel bayümin loj xniaam.

¹² Zianz bidxin ree xbejn Waj baca' reeman xcuerpaman persi biquie'ch reeman laaman. Dxel bicojn reeman Jesús.

Ruyaan Jesús gaay mil bejn

(Mr. 6:30-44; Lc. 9:10-17; Jn.6:1-14)

¹³ Chi gogbee Jesús zian, guyuman loj tijb barcw zëman niz lod achutczi zojb din su laazaman. Chi gogbee ree bejn, dxel brii ladx reeman zë guia'zi reeman lod guidxinman. ¹⁴ Chi barii Jesús loj barcw guin baguiaaman bén guixiuj ree riga' yagaj, bayaman laa reeman abi' bayünman bénragxuu zinë reeman. ¹⁵ Chi ma gudxe, gubig ree xbejnman lojman rëb reeman:

—Ma gudxe yan, abi' achut bejn zojb niz guie. Gündx loj ree bén guin ma gojl yaguiay reeman, din che reeman guiedx lod sii ni gaw reeman.

¹⁶ Per badxi' Jesúsán rëbaman:

—Ad rüjnt naguiejn yaguaaj reeman, lëjt gol badëë ni gaw reeman.

¹⁷ Badxi' reeman laan rëb reeman:

—Per gaayzi guiadxtil naca'n con zatio'p bëjl.

¹⁸ Dxel rëb Jesús loj reeman:

—Gol tanë reen guie.

¹⁹ Dxel gunabeeman gurej gra ree bén guin loj guixya'. Abi' cwa'man guigaay guiadxtil guin con grop bëjl guin. Dxel gules lojman xanyabaa badëëman quixtëë loj Dios, abi' gula'man guiadxtil guin badëëman laan loj ree xbejnman persi gudi's reeman laan loj gra ree bén guin. ²⁰ Gra reeman gudaw xt bigdxinladx reeman, abi' staczi bacha reeman za chiptio'p dxüm ni baya'n. ²¹ Bén gudaw guin ree naj reeman cost gaay mil xinguaaw garenqui ree béngunaa con ree xindoo.

Riza Jesús loj nijs

(Mr. 6:45-52; Jn.6 :16-21)

²² Dxel gunabee Jesús xbejnman guyu reeman loj barcw din ned reeman téd gaj reeman stiblad ro' nijs guin, la'tgaj cuzaadiidx nëman benzien guin ree. ²³ Chi ma gulox bazaadiidx nëman laa reeman, dxel zë xtijbaman guiyc tijb guia' din cwedx guiniabaman Dios. Chi gure guiaal xtijbzaman za' guiyc guia' guin. ²⁴ Guiáad barcw guin zijt ma zën loj nijs, dád rliaro' xtüjp nijs guin laan guial rliaj bi niz loj barcw guin. ²⁵ Chi ma cayreguiaal, zibig Jesús loj ree xbejnman rzaman loj nijs guin. ²⁶ Dxel baguiaa ree xbejnman laaman rzaman loj nijs guin, dád bidxeb reeman abi' gurixdiaj reeman rëb reeman:

—¡Tijb anman!

27 Per guneenë Jesús laa reeman rëbaman:

—¡Gol bagu' luxdoodi! ¡Najn, ad rdxebidi!

28 Badxi' Bëdan rëbaman:

—Dad, bal lüjn, gunabee gazan loj nijs guinalan lojl.

29 Abi' rëb Jesús lojman:

—Guda.

Dxel baguiajt Bëd loj barcw guin, rzaman loj nijs guin zëman loj Jesús. 30 Per chi baguiaaman bidoxhan cabi' dxel bidxebaman, abi' guial guzuloj cazëëbaman xan nijs guin guridxa'man rëbaman:

—¡Gognë naj, Dad!

31 Loj hor ziigajc basli yaa Jesús gunaazaman yaa Bëd, rëbaman lojman:

—¿Chexc zeel ad rliladxza'ctil, chexc zeel yu' nawëëguil?

32 Abi' chi bayë'p reeman loj barcw guin, laa bacwëöz gajc bi guin. 33 Guiáad ree bén yu' loj barcw guin bazuxib reeman loj Jesús, rëb reeman:

—Diidxliczi lüjn naj xi'n Dios.

*Rayüjn Jesús bénragxuu ree Genesaret
(Mr. 6:53-56)*

34 Chi gudëd reeman loj nijs guin dxel bidxin reeman xyuj ree bén Genesaret. 35 Abi' ree bén niz ni bayünbee reeman Jesús, abi' guidibczi niz yagaj gutie'ch reeman diidx guial za'man ni. Dxel biné ree bejn bénragxuu ree lojman, 36 guzajc reeman liaadx lojman din tiëbaman gugaal reeman majsi guia'zi xabaman. Abi' gra ree bén bagaal xabaman bayajc.

15

Ni rüjn persi rajc bejn béndol (Mr. 7:1-23)

¹ Bénfarisew ree con ree mextr rajc ley, bén za ree Jerusalén, gubig reeman loj Jesús abi' gunabdiidx reeman lojman, rëb reeman

² —¿Chexc zeel ad zinalt ree xbejnl costumbr ni basa'n dux béngulal ree? ¿Chexc zeel ad zinalt reeman costumbr zi'c rayal gunaa reeman chi gad reeman gaw?

³ Dxel rëb Jesús loj reeman:

—Laadx lëjt, ¿chexc zeel rüjn di xtiidx Dios tibladi persi zinal xcostumbridi? ⁴ Din Dios rëb: “Gojp re-spejt xDadil con xniaal”, abi’ “Bén rniee diidxguijdx loj xdadaman o xniaaman ya, rayal guiëtaman.”

⁵ Per lëjt rëb zile' guiëb bejn loj xdadaman o xniaaman: “Ad zile't gūnan lūj yudar, din gra ni ra'pan naj par Dios.” ⁶ Rëbidi guial bén guinee zian, ad zile't gūn yudar xdadaman con xniaaman, abi' zian rbëeladxidi xtiidx Dios persi zinal xcostumbridi. ⁷ ¡Bén rusquiee! ¡Rüjnzidi guial nabandi xnejz! Waliqwi ni gunee Isaías, bén badëe xtiidx Dios loj ree bejn, chi rëbaman:

⁸ Bén guie ree rëbzi reeman rniajchi' reeman naj, per ad rënt reeman naj con guidib luxdoo reeman.

⁹ Xlia'czi rniajchi' reeman naj, abi' rulüü reeman bejn ree ganaxzi ni rbëëgujic ree bénguidxliuj.

¹⁰ Dxel gurejdx Jesús ben zien riga' ree yagaj, abi' rëbaman loj reeman:

—Gol bacaagdiajg, gol bignia' tēē ni ganin lojdi.
 11 Ad ni rawt bejn rüjn laaman béndol, ni ririi ro'man laan rüjn laaman béndol.

12 Dxel gubig ree xbejn Jesús lojman, rēb ree-man:

—¿Gogbeel ya bidxe'ch ree bēnfarisew chi bigujejn reeman ni guneel?

13 Badxi' Jesús laan rēbaman:

—Gra ni ad zēēdt por da Dadan Dios bēn yu' xanyabaa, yu' dxej nitan. 14 Zeel gol basa'n reeman din laa reeman naj zi'c tijb bēnlutia'p rulüü stijb bēnlutia'p ban niz cheman. Abi' bal tijb bēnlutia'p gulüü stijb bēnlutia'p guin, zayajb grop reeman ro' bala'.

15 Dxel rēb Bēd loj Jesús:

—¿Basignia' dunujn xhie rēn guiēb ni guneel?

16 Badxi' Jesús an rēbaman:

—¿Wen, ni'qui lējt ad rignia'tan ya? 17 ¿Id rignia'di ya guial gra ni raw bejn rej lēnman abi' rariin? 18 Per diidx ririi ro' bejn, luxdooan zan, abi' laan rüjn laaman béndol. 19 Din luxdoo bejn za graloj ree xgabmal, guialrugüjt bejn, guial rüjn nidxuudx, guialrzunē lacheel ben ren, guialrban, guialrusquiee nē guialrniee diidxguijdx loj lasa'. 20 Gra ree ni guie naj ni rüjn bejn béndol. Per guial ad zunaat bejn zi'c naj costumbr ni rayal güün bejn chi gadaman gaw, ad laatan naj ni rüjn laaman béndol.

*Tijb bēngunaa Canaán bililadx Jesús
 (Mr. 7:24-30)*

21 Chi baza Jesús yagaj zēman niz Tiro nē niz Sidón. 22 Abi' yagaj zojb tijb bēngunaa za niz Canaán, briiman, rbixdiajman rēbaman loj Jesús:

—¡Dad, xdiaa Davi, baya naj! Da xi'ndxa'pan yu' bendxab luxdoom, dád rusagziman laam.

²³ Abi' Jesús ad badxi'taman xtiidx béngunaa guin. Dxel gubig ree xbejnman lojman, rëb reeman:

—Bidxga' béngunaa guin, din yaguaiajman, din rbixdiajman nalaman dunuj ree.

²⁴ Dxel rëb Jesús:

—Dios guxhaal naj din günan yudar ganaxzi ree bën Israel zë loj nejz mal.

²⁵ Per béngunaa guin bigzuxibaman loj Jesús, rëbaman:

—¡Dad, gognë naj!

²⁶ Badxi' Jesúsán, rëbaman:

—Ad zagdxtet naj chiquied bejn guidxtil loj xi'nman din gudëedaman laan loj ree bë'cw.

²⁷ Badxi' béngunaa guinan, rëbaman:

—Waliquil, Dad, per në ree bë'cw ruto'p guidxtil laay ni ryajb xan xmex bën naj xbë'cw laa reeb.

²⁸ Dxel rëb Jesús lojman:

—¡Na, waliquil riladxil con guidib luxdool! Gac zi'c rën!

Loj hor guin gajc bayajc xi'n bën guin.

Rayüjn Jesús zien ree béragxuu

²⁹ Baza Jesús yagaj, bidxinman ro' nijs Galilea, dxel wë'paman guijc tijb guia' abi' gurejman yagaj. ³⁰ Dád zien bejn bido'p lod za'man. Binë reeman bencoj ree, në ree bénlutia'p, në ree bën ad rüjnt xu'c dxiin, con ree bengop në zien ree béragxuu ren ree, badxig reeman laa reeman loj Jesús, abi' bayüjnman laa reeman. ³¹ Dád badxa loj ree bejn chi baguiaa reeman ma rníee ree bengop, ma bayajc xu'c ree bën ad rüjnt dxiin

xu'c, guiáad ree bencoj ma rza reeman abi' ree bénlutia'p ruguiaa reeman. Zianz guzuloj cuza't reeman zagdxé xDios ree bén Israel.

Ruyaan Jesús tajp mil bejn
(Mr. 8:1-10)

³² Abi' gurejdx Jesús bén naj ree xbejnman, rëbaman loj reeman:

—Rayan bén guin ree, din ma gojc choon dxej za' reeman con naj, abi' achet ni gaw reeman. Ad rëntan yagu'nejzan laa reeman sin gualraw ad nial yadaaj reeman niz lunejz.

³³ Dxel rëb ree xbejnman lojman:

—Per ¿ban guin yuca'n ni gaw ree benzien guin, zi'c naj guie lod achutczi bejn zojb?

³⁴ Gunabdiidx Jesús loj reeman, rëbaman:

—¿Bël guiadxtil ca'di?

Badxi' reeman laan rëb reeman:

—Gajdx guiadxtil con zatio'p choon bëjl.

³⁵ Dxel gunabee Jesús gurej gra ree bén guin luyuj. ³⁶ Abi' cwa'man guigajdx ree guiadxtil guin con ree bëjl guin, badëëman quixtëë loj Dios. Dxel gula'man laa reen, badëëman laa reen loj ree xbejnman persi gudi's reeman laa reen loj gra ree bén guin. ³⁷ Gra reeman gudaw xt bigdxinladx reeman. Abi' staczi bacha reeman gajdx dxüm ni baya'n. ³⁸ Bén gudaw ree naj reeman tajp mil xinguaaw, garenqui ree béngunaa con ree xindoo. ³⁹ Dxel bazaadiidxnë Jesús laa reeman, abi' guyuman loj barcw ziaman niz Magadán.

16

Rniab reeman güün Jesús tijb milagr

(Mr. 8:11-13; Lc. 12:54-56)

¹ Bénfarisew ree con ree bénsaducew bidxin reeman lod za' Jesús, abi' par güün reeman laaman prueb gunab reeman lojman din güünman tijb milagr din guiguien guial Dios guxhaal laaman.

² Per badxi' Jesús laan rëbaman:

—Wadxe ree chi ruguiaadi naxnia xanyabaa, rëbidi: “Zagdxé gac guixie din naxnia xanyabaa.”

³ Guiáad rsil chi naxnia xanyabaa yu' tée zaj, rëbidi: “Ad laat gac yandxej.” ¡Bén rusquiee!, bal ragbeedi xhie rën guiëb sen yu' xanyabaa, ¿chexc ad rignia'tidi xhie rën guiëb gra ni cuguiaadi yan? ⁴ Bén mal, ad rliladxtidi abi' rniabidi günan tijb milagr, per achet guguiaadi, tijbzi zi'c guzac Jonás.

Dxel basa'n Jesús laa reeman, ziataman.

Xlevadur ree bénfarisew

(Mr. 8:14-21)

⁵ Dxel gudëdnë ree xbejnman stiblad ro' nijs guin, per bayanladx ree xbejnman ninë reeman guiadxtil. ⁶ Abi' rëb Jesús loj reeman:

—Gol gojp cudad con xlevadur ree bénfarisew në ree bénsaducew.

⁷ Dxel guzuloj rëb loj lasa' reeman:

—Naman duloj ree zian guial ad naca't ree guiadxtil.

⁸ Gogbee Jesús ni canee reeman abi' rëbaman loj reeman:

—¿Chexc zeel rëbidi guial ad ca'tidi guiadxtil? Ta'nnijt rliladxidi naj. ⁹ ¿Staczi ad rignia'tidi ya? ¿Nid rusaaladxidi ya chi gudi'san gaay guiadxtil loj gaay mil bejn, abi' zabël dxüm ni baya'n bato'pidi?

¹⁰ ¿Nid zaladx tēedi ya chi gudi'san gajdx guiadx-til loj tajp mil bejn, abi' zabēl dxūman bato'pidi?

¹¹ ¿Chexc zeel ad rignia'tidi guial ad guiadxtiltan cuzatan lojdi, chi rnin lojdi gapidi cudad con xlevadur ree bēnfarisew nē ree bēnsadusew?

¹² Dxel bignia' ree xbejnman guial ad xlevadurt guiadxtilan cuza'taman loj reeman, rēbaman zian din gap reeman cudad con ni rulūü ree bēnfarisew nē ree bēnsaducew.

Rēb Bēd guial Jesús naj Cristo

(Mr. 8:27-30; Lc. 9:18-21)

¹³ Chi bidxin Jesús niz Cesarea de Filipino, gunabdiidxaman loj ree xbejnman, rēbaman:

—¿Chu rēb ree bejn, naj Bēn guxhaal Dios?

¹⁴ Badxi' reeman laan, rēb reeman:

—Yu' reeman rēb guial Wajn, bēn baroobnijs bejn ree. Yu'za reeman rēb guial Elíasan, bēn badēē xtiidx Dios loj ree bejn, yu' tēē reeman rēb guial Jeremíasan, bēn badēēd xtiidx Dios loj ree bejn o stijb ben ren ya, bēn badēēd xtiidx Dios loj ree bejn.

¹⁵ Dxel rēbaman loj reeman:

—Laadx lējt, ¿xhie nadi, chu naj?

¹⁶ Badxi' Simón Bēdan, rēbaman:

—Lūjn naj Cristo. Lūjn naj Xi'n Dios naban.

¹⁷ Dxel rēb Jesús lojman:

—Xiquilbaal, Simón, xi'n Jonás, din ad bēnguidxliujt guna lojl ni guinieel, da Dadan bēn yu' xanyabaa laaman naj bēn guna lojl. ¹⁸ Abi' naj rni lojl, Bēd, (rēn guiēban “guiaj”) lūj naj zi'c tijb guiaj ni gacnē lidxan, din por lūj grii ree bēn gac da bejnan abi' ni'qui guialgūjt ad zunijtt laa reeman.

¹⁹ Naj gunē lūj guialrniabee ni za xanyabaa, abi'

gra ni tiëbil gac loj guidxliuj guie ma naj gacan xanyabaa, guiáad ni ad zatiëjbtíl gac loj guidxliuj guie ad najt gacan xanyabaa.

²⁰ Dxel gunabee Jesús loj gra ree xbejnman guial achu loj guiëb reeman guial laaman naj Cristo.

Rugojn Jesús guiëtaman

(Mr. 8:31-9:1; Lc. 9:22-27)

²¹ Diizd nadxel guzuloj Jesús bagojn ree xbejnman guial naj cheman Jerusalén, abi' ree guxtis Israel con ree bixhioz rniabee ree bixhioz në ree mextr rajc ley, laa reeman naj bën gusagzi laaman, gugüjt reeman laaman, per ni yayon dxej yabanman. ²² Dxel gulëëcaan Bëd laaman, rëbaman lojman:

—¡Dios ad zabëëladxt lüj, Dad! ¡Laaman ad zatiëjbt saquíl zian!

²³ Per badxi' loj Jesús, rëbaman:

—¡Basa'n naj, xindxab!, ad rüjn nawëëguil lon. Din ad por Diost zëëd ree xgab ni rüjnl, xixgab bénguidxliujn rüjnl.

²⁴ Dxel rëb Jesús loj ree xbejnman:

—Bal yu' bën rën gac da bejnan ad zajct güünman zi'c naj xixgabaman, siibnejzaman guialzi ni tëdzaman abi' guidnalaman naj. ²⁵ Din bën mazri rën xguialnaban ni rajpaman loj guidxliuj guie zadxin dxej gunijtaman laan. Per bën guiët por naj, zajpaman guialnaban tiblayaa con Dios.

²⁶ Xhieczy gan gap bejn gra ni yu' loj guidxliuj, abi' nitaman loj Dios. Din ad zile't sii bejn xguialnabanman xanyabaa. ²⁷ Abi' Bën guxhaal Dios, gui'taman con xguialrniabee xDadaman Dios në ree xianjl Dios din gudëëman ni rayal tijbgaj bejn,

bal gonin been bejn. ²⁸ Diidxiczi rnin lojdi guial yu' ree b́en riga' guie ad zéjtt reeman chi gad reeman guguaiaa B́en guxhaal Dios, gui'taman con xguialrniabeeman din nabeeman.

17

Bidxaa Jesús loj choon ree xbejnman

(Mr. 9:2-13; Lc. 9:28-36)

¹ Chi gudéd xho'p dxej, biné Jesús Béd, né Jacob con Waj bijch Jacob, binéman laa reeman guijc tijb guia' ya. ² Ni bidxaa Jesús niz loj reeman. Dád balaa bacha' lojman zi'c rulaa gubijdx bacha', guiáad xabaman bayajcan naquich, balaa téen bacha' zi'c guij. ³ Abi' loj hor guin baguaiaa reeman Moisejs con Elías cayüné reeman Jesús diidx. ⁴ Dxel rēb Béd loj Jesús:

—Dad, ¡zagdxe naj nadxu' ree guie! Bal rēnl, gūnan choon ranch, tijban par lūj, tijban par Moisejs, stijban par Elías.

⁵ La'tgaj canee Béd zian, biguiajt tijb zaj xt guijc reeman ridiinan bacha', loj zaj guin brii cha' bejn rēbaman:

—B́en guie naj da Xi'nán, b́en rēn da'tan, b́en rabaanē' téen, gol bacaagdiajg xtiidxaman.

⁶ Chi biguiejn ree xbejn Jesús diidx guin ree, bazuxib reeman basajb loj reeman xt luyuj, dád bidxeb reeman. ⁷ Dxel gubig Jesús lod za' reeman, baqui'man laa reeman, rēbaman:

—Gol guzuli, ad ridxebidi.

⁸ Abi' chi gules loj reeman achutri baguaiaa reeman, tijbzi Jesús za' yagaj.

⁹ La'tgaj cayguiajt reeman ruguia' guin, rēb Jesús loj reeman:

—Achuczi loj guiëbidi ni baguiaadi, xt chi yaban Bén guxhaal Dios.

¹⁰ Dxel gunabdiidx ree xbejnman lojman, rëb reeman:

—¿Chexquiza zeel rëb ree mextr rajc ley guial yaløj Elías gui't?

¹¹ Badxi' Jesúsán, rëbaman:

—Walican guial yaløj Elías gui't, laaman guzuxnejz gra. ¹² Per naj rni lëjt guial mal bi't Elías, abi' ad bayagbeet ree bejn laaman, beennë reeman laaman ni guyëntzi reeman. Abi' ziangajc gusagzi reeman Bén guxhaal Dios.

¹³ Dxel gogbee ree xbejnman guial Wajn bén baroobnijs bejn ree cuza'taman.

Rayüjn Jesús tijb xin rëjtja'

(Mr. 9:14-29; Lc. 9:37-43)

¹⁴ Chi badxin Jesús con guiyon ree xbejnman, lod cabëz ree ben zien laaman bibig tijb xinguaaw lojman, bazuxibix lojman rëbix:

¹⁵ —Dad, baya da xi'nan, din dád rzagdiajx rëjtja'x. Bëlczí volt riyajbix lojguij o lojnijs ya.

¹⁶ Bidnë'n laax loj ree xbejnl, per ad rajct rayüjn reeman laax.

¹⁷ Badxi' Jesúsán, rëbaman:

—¡Benguijdx, bén ad riladxt! ¿Xt goc gazunë'n lëjt? ¿Xt goc gadaanán lëjt? Gol tanë xinzií guie.

¹⁸ Dxel gudilë Jesús xindxab guin, babëëman laax luxdoo xin guin. Loj hor guin gajc bayajquix.

¹⁹ Abi' gunabdiidx ree xbejn Jesús lojman lood ren, rëb reeman:

—¿Chexc zeel ad gojct nalëën xindxab guin luxdoo xin guin?

²⁰ Dxel rëb Jesús loj reeman:

—Guial ta'nzi rliladxidi. Naj rni lojdi bal naj xguialrliladxidi majsi zi'ctzi naj xhaj moxhtajs, zile' guiëbidi loj guia' guin: “Bisüd guie, bisob lood ren”, zucaagdiajgan xtiidxidi. Achetczi gac nawëëg par lëjt. ²¹ Per par yarii lasa' ree xindxab guie ryaadx chu cwedx guiniab Dios guiba'n tëë.

Rugojn Jesús zatijb guial guiëtaman
(Mr. 9:30-32; Lc. 9:43-45)

²² La'tgaj za' Jesús niz Galilea con ree xbejnman, rëbaman loj reeman guial yayü reeman Bén guxhaal Dios loj ree bejn, ²³ abi' gugüjt reeman laaman, per ni yayon dxej yabanman. Chi biguiejn ree xbejnman zian, dád guyu naya reeman.

Ni rajx par yadoo

²⁴ Chi badxin Jesús con ree xbejnman guiedx Capernaum, bén ruquijx ree impuest par yadoo wej reeman loj Bëd bignabdiidx reeman, rëb reeman:

—¿Rguijx xmextril impuest par yadoo ya?

²⁵ Badxi' Bëdan, rëbaman:

—Riguijxcaman laan.

Dxel chi bayu Bëd lënü lod za' Jesús, yalojli Jesús gunabdiidx lojman, rëbaman:

—¿Xhie naladxil, Simón? ¿Chu rguijx impuest loj ree rey yu' loj guidxliuj guie? ¿Xi'n reeman ya o benzit ree?

²⁶ Badxi' Bëd laan rëbaman:

—Benzit ree.

Dxel rëb Jesús:

—Abi' ree bén ladx reeman ad rguijxt reeman laan. ²⁷ Per chitëë guidxe'ch reeman, wej ro' nijs, bazaal xiansuelil, dxel bëjl yaloj ni guiniaazil

babëëb. Ro' bëjl guin guidxelil tijb cintabl, con laan bitijx dux impuest.

18

¿Chu mazri zobjloj?

(Mr. 9:33-37; Lc. 9:46-48)

¹ Lën ree dxejzii bidxin ree xbejn Jesús lod za'man, abi' gunabdiidx reeman lojman, rëb reeman:

—¿Chu mazri zobjloj lod rniabee Dios?

² Dxel gurejdx Jesús tijb xindoo, bazujman laax galay reeman, ³ abi' rëbaman:

—Diidxliczi rnin lojdi bal id zayüjndi xgab por xtolidi, bal id zajc tēedi zi'c tijb xindoo, ad zutidi lod rniabee Dios. ⁴ Bén güün naya loj Dios, gac tēeman zi'c xindo guie, laaman gac bén mazri zobjloj lod rniabee Dios. ⁵ Abi' bén yaca' tijb xindoo, por naj, najn raca'man.

Bén rüjn persi ryajb ree bejn loj dol

(Mr. 9:42-48; Lc. 17:1-2)

⁶ 'Bal chu gusajb tijb bén qui rliladxri naj loj dol, zagdxeli guixhii reeman tijb guiajro' yëjnman guzaal reeman laaman xt xan nijs. ⁷ ¡Probza bénguidxliuj guial yu' da't ni rusajb laaman loj dol! Zianczi yu' ni mal guin loj guidxliuj, per ¡probza bén gusajb bejn ree loj dol!

⁸ 'Zeel, bal laagajc yaal o guia'l rusajb lüj loj dol, zagdxeli gutü'n bazaalan zijt, din zagdxeli chu'l xanyabaa con tiblodzi yaal o con tiblodzi guia'l, luar chu'l con groplad yaal o groplad guia'l loj bajl ni ad yu't dxej yayü'. ⁹ Abi' bal laagajc guiaalojl rusajb lüj loj dol, gulëen bazaalan zijt, zagdxeli

chu'l con tiblodzi guiaalojl xanyabaa, luar chu'l con gropladan loj bajl yu' gabijl.

Xcwent xiil gunit

(Lc. 15:3-7)

¹⁰ 'Ad guiniajgaadi loj ree b́en qui rliladxri naj. Din diidxliczi rnin lějt guial xanyabaa yu' ree anjl rnij laa reeman zianczi za' reeman loj da Dadan Dios b́en yu' xanyabaa. ¹¹ Guiaad B́en guxhaal Dios zěedaman par ree b́en ad zinalt xnejz Dios din laa reeman loj dol.

¹² '¿Xhie naladxidi? Bal tijb bejn rajp tibgayuu xiil, abi' rizěeb tijbib, ¿nid zusa'nman zatajpga-lchiinbitapib dajn ya din chigdiilaman be bizěeb guin? ¹³ Abi' bal yadxejlaman laab, diidxliczi rnin mazri yabaaněman laab guial loj tajpgajlchiinbitap be ad bizěeb guint. ¹⁴ Ziangajc dux Dad ree Dios b́en yu' xanyabaa ad rěntaman nit ni'czi tijb ree b́en qui rliladxri laaman.

Xhienaag yaguieen perdon du lasa' ree

(Lc. 17:3)

¹⁵ 'Bal xhie tijb ni mal gűn lasa'l lűj, guneeněman lűzi din gagbeeman xhie falt badxe'man. Bal guidxga'man xtiidxil, ma beenl gan yaneeněl laaman zagdx. ¹⁶ Bal id ridxga'man lűj, bině zatijb o zatio'p bejn, din chigneenědi laaman din con xtiidx tio'p o choon bejn guiguien guial ma bigneeněl laaman. ¹⁷ Dxel bal ni'qui xtiidx reeman ad ridxga'taman, bagojn ree b́en zinal xnejz Dios, abi' bal ni'qui xtiidx reeman ad ridxga'taman, dxel ma guguiaadi laaman zi'c tijb b́en ad rliladxt Dios o zi'c tijb b́en ruquijx impuest par Rom.

¹⁸ 'Diidxiczi rnin, gra ni ad zatiëjbtidi gac loj guidxliuj guie ad rajctan xanyabaa, guiáad ni tiëbidi gac loj guidxliuj guie mal rajcan xanyabaa.

¹⁹ 'Rni tëen lëjt: Bal yaya'n tio'pidi diidx loj guidxliuj guie, par guiniabidi xhienin loj da Dadan bën yu' xanyabaa, laaman gunee laan.

²⁰ Din lod rado'p tio'p o choon bejn por naj, laa naj za' galay reeman.

²¹ Dxel gubig Bëd gunabdiidxaman loj Jesús, rëbaman:

—Dad, ¿bël volt rayal günan perdon lasa'n, bal güünman naj xhienin? ¿Xt gajdx volt ya?

²² Badxi' Jesúsan rëbaman:

—Ad gajdx voltizi rayal güün lasa'l perdon, rayal güünl perdon gajdx volt gayojnchii.

Xcwent bën ad rüjnt perdon lasa'

²³ 'Xgualrniabee Dios naj zi'c tijb rey ni been xgab guial ma gojl yaguijx ree xmojsaman lojman. ²⁴ Chi guzulojman caybëëman cwent guin, bidxin tijb xmojsaman lojman bën ral zro' da't.

²⁵ Abi' guial achet rajp bën guin din yaguijxaman ni ralaman, gunabee rey guin to'man loj ree bejn në lacheelaman con ree xi'nman nëtëë gra ni rajpaman din chile' yaguijxaman di'n guin.

²⁶ Dxel bazuxibaman loj rey guin, beenman naya rëbaman: “Dad, gojp naj pacens zaguixcan graczi ni ralan lojl.”

²⁷ Zianz baya rey guin laaman, beenman laaman perdon gra ni ralaman, abi' baslaaman laaman ziaman. ²⁸ Per chi barii mojs guin yagaj, badxajgaman tijb bën rüjnnëman dxiin, ralaman ta'nzi milia lojman. Dxel gunaazaman laaman guzuloj caguiajman yëjnman, rëbaman:

“¡Baguijx ni ralil lon!” ²⁹ Dxel bazuxib b́en guin lojman beenman naya rēbaman: “Gojp naj pacens zaguixcan graczi ni ralan lojl.” ³⁰ Per ad guyēnt b́en guin, badxe'man laaman ladxguiib xt lodzi yaguijxaman di'n guin. ³¹ Chi baguiaa ree los demazri ree xmojs rey guin, dád gognaa luxdoo reeman, abi' wej reeman biguiedx reeman lojman gra ni goc. ³² Dxel gurejdx rey guin mojs guin, zianz rēbaman lojman: “¡Mojs guiidx! Benan perdon gra ni ralil lon guial beenl naya. ³³ ¿Nid nēgajc lūj rayal naya xcompniaril ya, zi'cgajc bayan lūj?” ³⁴ Abi' guial tant balen rey guin, gunabeeman badxe' reeman laaman ladxguiib xt lodzi baguijx gra ni ralaman.

³⁵ Basnuu Jesús rēbaman:

—Ziangajc güünnē da Dadan lējt, b́en yu' xanyabaa, bal id zūjn perdon lasa'di con guidib luxdoodi ni rūjnnē reeman lējt.

19

Rulüü Jesús xcwent guial rala' lasa'

(Mr. 10:1-12; Lc. 16:18)

¹ Chi gulox gunee Jesús zian, bazaman niz Galilea, zēman niz Judea, niz stiblad ro' guiw Jordán. ² Zien ree bejn binal laaman, yagaj bayūjnman b́enragxuu ree.

³ Abi' tio'p choon ree b́enfarisew bibig loj Jesús, dxel par güün reeman laaman prueb, gunabdiidx reeman lojman rēb reeman:

—¿Zile' yala' bejn lacheelaman por xhiedx-itzinin ya?

⁴ Badxi' Jesús san rēbaman:

—¿Nid wayoolidi loj xtiidx Dios ya, guial diizd guia'xchej Dios “been xinguaaaw në béngunaa”?
⁵ Rëb tëëman: “Zeel xinguaaaw gusa'n xdad xniaax din guibannë lacheelix, dxel grop reex ma gac zi'c tijbzi bejn.” ⁶ Zianan zeel ad najtri reex tio'p, ma naj reex tijbzi. Zeel bénguidxliuj ad rayalt yala'man lasa' ni ma bachajg Dios.

⁷ Dxel rëb ree bénfarisew guin loj Jesús:

—¿Chexquiza zeel rëb Moisejs guial zile' yala' lacheel bejn, con gudëédaman gui'ch guial ma bala' lasa' reeman?

⁸ Badxi' Jesúsán, rëbaman:

—Cwëjb Moisejs gojc zian guial ad rëntidi gu-zoobidi diidx, per ad ziant gojc diizd guia'xchej.
⁹ Naj rni lojdi. Xin yala' lacheel, bal id za'në lacheelix xin ren, abi' tia'x ben ren dolan cayüjnx. Ziangajc xin tia' bén qui bala'ri lasa' guin dolan cayüjnx.

¹⁰ Dxel rëb ree xbejn Jesús lojman:

—Bal zian naj xcwent guial ru lacheel, zagdxeli ad zut lacheel bejn

¹¹ Badxi' Jesúsán rëbaman:

—Ad grat bejn zile' chignia' ni canin, bén ca'zi ree quiarguejn par chignia' reeman laan. ¹² Yu' bejn diizd rajlaman ad zëëdtaman loj guidxliuj par guxhlaaman, yu'za reeman, bejn rüjn laa reeman zian. Abi' yu' reeman rüjn xgab guial zagdxeli gui-tie'ch reeman xtiidx Dios luar guxhlaa reeman. Bén rën chignia', gol bignia'.

*Rüjnle' Jesús xindoo ree
 (Mr. 10:13-16; Lc. 18:15-17)*

¹³ Binë ree bejn xindoo ree lod za' Jesús, din guixhioob yaaman guiyc reex cwedx guiniab tēeman Dios por laa reex, per ree xbejnman guzuloj cadilë reeman bën zinë ree laa reex. ¹⁴ Dxel rëb Jesús loj reeman:

—Gol baslaa gui't reex lon, ad bal rudxoondi, din lod rniabee Dios naj par ree bën naj zi'c laa reex.

¹⁵ Abi' guxhoob yaa Jesús guiyc ree xindo guin, dxel ziaman.

Tijb xinrijcw

(Mr. 10:17-31; Lc. 18:18-30)

¹⁶ Bidxin tijb xin guin loj Jesús, abi' gunabdiidxix lojman, rëbix:

—Mextr, ¿xhie ni zagdxe günan din ga'pan guialnaban tiblayaa con Dios?

¹⁷ Dxel rëb Jesús lojx:

—¿Chexc zeel rniabdiidxil lon conin naj ni zagdxe? Achut naj benza'c, tijbzi Dios. Per bal rën l gapil guialnaban tiblayaa con Dios, been zi'c rëb ree mandamient.

¹⁸ Dxel gunabdiidxix loj Jesús rëbix:

—¿Con ree mandamientan?

Badxi' Jesúsán, rëbaman:

—Ad gugüjtil bejn, ad sunël lacheel ben ren, ad cwanl, ad cwëel xtiidx bejn, ¹⁹ gojp respejt xdad xniaal, guyën tēë ree lasa'l zi'c rën lüj gajc.

²⁰ Dxel rëbix:

—Gra ree ni guin cayünan diizd najn xindoo, ¿xhieri ryaadx günan yan?

²¹ Badxi' Jesúsán, rëbaman:

—Bal rēnl gaquil benza'c loj Dios, bigto' gra ni rajpil dxel gudēel milia guin loj ree bēnprob. Zian gapil guialnaza'c xanyabaa. Zianz guidnalil naj.

²² Chi biguiejn xin guin zian, dád guyu nayax ziax, guial dád xinrijcwan.

²³ Dxel rēb Jesús loj ree xbejnman:

—Diidxiczi rnin lojdi: Dád nawēēg chu' benrijcw lod rniabee Dios. ²⁴ Naj rni lējt. Adli nawēēgt tēd tijb camell xan gagux, guial chu' tijb benrijcw lod rniabee Dios.

²⁵ Chi biguiejn ree xbejn Jesús zian, dád badxaloj reeman, abi' rēb reeman:

—¿Chuzazajc gac perdon loj Dios?

²⁶ Dxel baguiaa Jesús loj reeman, rēbaman:

—Nawēēg gac zian par bēnguidxliuj, per par Dios achet ni nawēēg yu'.

²⁷ Abi' rēb Bēd lojman:

—Ma basa'nan graczi ni raya'pan, persi zudnaalan lūj. Abi' ¿xhieza yayalan?

²⁸ Badxi' Jesúsán, rēbaman:

—Diidxiczi rnin lojdi chi guidxin dxej yacüb gra, guidxin tēē dxej cwe Bēn guxhaal Dios luar lod nabeeman, nē lējt, guial zidnalidi naj, cwedi loj chiptio'p ree luar lod nabeedi, din güün xguialguxtisidi loj guidxiptio'p ree xdiaa Israel. ²⁹ Abi' gra ree bēn basa'n lidx, bijch, bizan, xdad, xniaa, xi'n, o guidxliuj ree por naj, zaca' reeman tibgayuu volt mazri guial loj ni basa'n reeman, zajp tēē reeman guialnaban tiblayaa con Dios. ³⁰ Per zien ree bēn naj bēn yaloj, gac reeman bēn bigra, abi' zienza ree bēn naj bēn bigra, gac reeman bēn yaloj.

20

Xcwent ree b́en rüjn dxiin

¹ Rëb tēē Jesús:

—Xgualrniabee Dios naj zi'c tijb b́en rajp tijb guiniaaro', rsildoo briiman zitiilaman mojs güün dxiin loj xguiniaaman. ² Baya'nnēman laa reeman diidx plac quixaman tijb gaj reeman tibdxej, dxel guxhaalaman laa reeman loj xguiniaaman. ³ Dxel briiman stijb cost raca gaa rsil, abi' baguiaaman ben ren ree za' reeman galay luguiedx, achet xchiin reeman. ⁴ Zianz rēbaman loj reeman: “Gol biguieen dxiin loj da guiniaan, naj gaguix lējt zi'c rayal.” Dxel zē reeman. ⁵ Cost garol dxej briiman stijb, abi' brii gajman cost raca choon wadxe ziangajc rēbaman loj ree b́en riga' yagaj, b́en achet xchiin. ⁶ Cost raca gaay wadxe wejman galay luguiedx guin stijb, abi' bidxaa-glojman ben ren ree, b́en achet ree xchiin, gunabdiidxaman loj reeman, rēbaman: “¿Chexc zeel za'di guin gudēdchej ad cayüjntidi dxiin?” ⁷ Badxi' reeman laan rēb reeman: “Achut wanee dxiin yaguieenan.” Dxel rēbaman loj reeman: “Nē lējt gol biguieen dxiin loj da guiniaan naj gaguix lējt zi'c rayal.” ⁸ Chi ma gurej guiaal, rēb b́en naj xguiniaan loj b́en naaz dxiin guin: “Gurejdx ree mojs guin din quixil laa reeman, per yalojxgaj gudijx ree b́en bigra guyu, zianz quixil b́en guyu ree yaloj.” ⁹ Chi bidxin ree b́en guyu loj dxiin guin raca gaay wadxe, gojx tijbgaj reeman xieen tibdxej. ¹⁰ Dxel chi bidxin ree b́en guyu loj dxiin diizd rsil, gunaladx reeman niajx reeman mazri, per nēgajc reeman gojx xieen tibdxej. ¹¹ Abi'

chi cayajx reeman, guzuloj cadxe'ch reeman b́en naj xguiniaa laan, ¹² rēb reeman lojman: “B́en bigra guyu ree, been reeman dxiin tib horzi abi' zi'cgajc caguijxil dunujn gudijxil laa reeman, abi' dunujn badaanan baguieenan dxiin dēchej loj guialnalaa.” ¹³ Per rēb b́en guin loj tijb reeman: “Achēt ni mal cayūnan lūj. ¿Nid baya'n diidx ya plac gunen tia'l tibdxej? ¹⁴ Cwa' ni bayalil baguiaj. Din naj rēnan gaguixan b́en bigratē guyu zi'c gudixan lūj, ¹⁵ zajc gūnnē' da milian ni rēntzan. ¿O nadēdlojl ya guial najn benza'c?” ¹⁶ Zianan zeel b́en naj ree b́en bigra gac reeman b́en yaloj, guiáad ree b́en yaloj gac reeman b́en bigra.

Bayon volt bagojn Jesús guial guiētaman

(Mr. 10:32-34; Lc. 18:31-34)

¹⁷ Chi zē Jesús Jerusalén, gurejdx guidxiptio'p ree xbejnman tiblād, rēbaman loj reeman:

¹⁸ —Ganin lējt, ziyo' ree Jerusalén, lod yayū reeman B́en guxhaal Dios, loj ree bixhioz rniabee ree bixhioz nē loj ree mextr rajc ley, abi' laa reeman nabee guiētaman, ¹⁹ yayū reeman laaman loj ree benzit, din guze' reeman laaman quin tēē reeman laaman, abi' gucaa reeman laaman loj crūjz, per yayon dxej yabanman.

Ni gunab xniaa Jacob con Waj

(Mr. 10:35-45)

²⁰ Gubig lacheel Zebedeo loj Jesús con grop ree xi'nman, bazuxibaman lojman din guiniabaman ni rēnman. ²¹ Gunabdiidx Jesús lojman, rēbaman:

—¿Xhie rēnl?

Badxi' b́en guinan, rēbaman:

—Rënan nabeel cwe tijb da xi'nan xladbeel, stibim xladruvejsil, chi ma canabeel.

²² Dxel rëb Jesús:

—Ad ragbeetidi ni rniabidi. ¿Wen zajc tédidi guialzi zi'c naj ni gadëëdan ya?

Badxi' reeman laan, rëb reeman:

—Zayajcan.

²³ Abi' rëbaman:

—Diidxliczi rnin zajc tédidi guialzi zi'c naj ni gadëëdan, per guial cwedi da ladbeen o da ladruvejsan ya ad najt rayal ganabee, din ma najn par ree bën bacaabee da Dadan.

²⁴ Chi biguiejn zachii ree xbejn Jesús zian dád balen reeman grop bijch reeman. ²⁵ Per gurejdx Jesús laa reeman, rëbaman:

—Lëjt ragbee, bën rniabee ree loj guidxliuj, rniabee reeman bejn ree zi'ctzi rën reeman, guiáad ree bën zojbloj rüjnnë reeman bejn ree zi'ctzi rën reeman por guialrniabee ni rajp reeman. ²⁶ Per con lëjt ad rayalt gac zian. Bal chu rën gac bën rniabee lojdi, rayal güünman sirv lojdi. ²⁷ Ziangajc bën rën gac bën zojbloj lojdi, rayal güünman sirv lojdi zi'c bën nado'. ²⁸ Zi'c Bén guxhaal Dios ad bi'ttaman par güün reeman sirv lojman, bi'taman par güünman sirv gudëë tée xguialnabanman din laa zien bejn loj dol.

Rayüjn Jesús tio'p ree bénlutia'p

(Mr. 10:46-52; Lc. 18:35-43)

²⁹ Chi bazaman luguiedx Jericó con ree xbejman, dád zien ree bejn binal laaman. ³⁰ Dxel tio'p ree bénlutia'p zojb cwë' nejz chi biguiejn reeman cadëd Jesús niz yagaj, gurixdiaj reeman rëb reeman:

—¡Dad, xdiaa Davi, baya dunujn!

³¹ Abi' rdilë ree ben guin laa reeman din yacwëez ro' reeman, per mazri ribixdiaj reeman rëb reeman:

—¡Dad, xdiaa Davi, baya dunujn!

³² Dxel guzudxe Jesús, gurejdxaman laa reeman, gunabdiidxaman loj reeman, rëbaman:

—¿Xhie rëndi gūnan por lëjt?

³³ Badxi' reeman laan, rëb reeman:

—Dad, rayënan yaxal du lojn.

³⁴ Dxel baya Jesús laa reeman, abi' baqui'man loj reeman. Loj hor zii baxal loj reeman, dxel binal reeman Jesús.

21

Ru Jesús Jerusalén

(Mr 11:1-11; Lc. 19:28-40; Jn.12 :12-19)

¹ Chi ma cadxin Jesús con ree xbejnman Jerusalén, niz guiedx la Betfagé, gajxh ruguia' Olivos, guxhaal Jesús tio'p ree xbejnman, ² rëbaman loj reeman:

—Golchej guiedx riga' lad ni, ni guidxaaglojdi tijb bur, caduunë xi'nb. Gol guxhiec reeb gol tanë reeb guie. ³ Abi' bal chu xhie na lojdi, gol güjdx guial Dad Jesús cayaadx laa reeb, gandoo yaxhaalaman laa reeb.

⁴ Zian gojc persi gojc cumplid ni gunee bén badëe xtiidx Dios loj ree bejn, chi rëbaman:

⁵ Gol güjdx loj ree bén Sión:

“Gol baguiaa laa xreydi zëed lojdi, ad zëedtaman nabë, dxiibaman tijb bur, tijb burdoo xi'n tijb be rüü.”

⁶ Dxel wej ree xbejn Jesús abi' been reeman zi'c rëbaman loj reeman, ⁷ binë reeman bur guin con xi'nb, abi' badxiib xab reeman xijch reeb zianz gudxib Jesús burdo guin. ⁸ Abi' guial zien ree bejn, yu' reeman rguijxh xab lunejz, zien tëë reeman ritü' xidx ree yag persi rguijxh reeman laa reen lod cadëdaman. ⁹ Abi' zi'c ree bën ned zi'c ree bën zidnal laaman, rbixdiaj reeman, rëb reeman:

—¡Benza'c bendxoon naj xdiaa rey Davi! ¡Nüjnle' Dios bën guxhaalaman! ¡Benza'c bendxoon naj Dios bën yu' xanyabaa!

¹⁰ Chi guyu Jesús luguiedx Jerusalén, gra ree bën luguiedx guin badxaloj, abi' riniabdiidx loj lasa' reeman, rëb reeman:

—¿Chu bën guin?

¹¹ Dxel rëb ree benzien guin:

—Laaman naj Jesús, bën rudëë xtiidx Dios loj ree bejn, bën Nazaret guiedx riga' niz Galilea.

*Rabëë Jesús bën ruto' ree lën yadoo Jerusalén
(Mr. 11:15-19; Lc. 19:45-48; Jn.2 :13-22)*

¹² Chi bidxin Jesús ro' yadooro' Jerusalén, guzuloj caybëëman bën cuto' ree në ree bën cazii. Barexguiataman xmex ree bën cuchaa milia në xmex ree bën cuto' palom. ¹³ Dxel rëb Jesús loj reeman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nüjndan zi'c lidx ree xingubaan.

¹⁴ Dxel bénlutia'p ree con ree bencoj bibig reeman loj Jesús lën yadoo guin abi' bayüjnman laa reeman. ¹⁵ Per chi baguiaa ree bixhioz rniabee ree bixhioz con ree mextr rajc ley milagr cayüjn Jesús, biguiejn tëë reeman rëb ree xindoo lën yadoo

guin: “Benza'c bendxoon naj xdiaa rey Davi”, dxel dád bidxe'ch reeman. ¹⁶ Abi' rëb reeman loj Jesús:

—¿Rguiejnl ni canee ree xindo guin ya?

Badxi' Jesúsán, rëbaman:

—Rguiejncan. Per ¿gadidi gool loj xtiidx Dios ya?

Lod rëb:

Lüj badëed ni gool ree xindoo në ree xindobëz sta rë' dud,

din guilies reex xvaloril.

¹⁷ Dxel basa'n Jesús laa reeman, zëman Betania ni baya'nman guxin guin.

Tijb yag higo ni gubidx

(Mr. 11:12-14, 20-26)

¹⁸ Chi bareguiaal rsil la'tgaj zë Jesús Jerusalén stijb, guzuloj gulaanman. ¹⁹ Abi' baguiaaman zobjb tijb yag higo cwë' nejz, dxel gubigaman cwë'n, per ganaxzi balag ca lojn. Zianz rëbaman loj yag higo guin:

—¡Ad yu'tri dxej tial higo!

Loj hor guin gajc gubidx yag guin. ²⁰ Chi baguiaa ree xbejnman zian, dád badxaloj reeman abi' gun-abdiidx reeman loj Jesús, rëb reeman:

—¿Xhienaag gojc zeel laa gubidx gajc yag higo guin?

²¹ Badxi' Jesúsán, rëbaman:

—Naj rni lojdi, bal rliladxidi Dios abi' ad zu-nawëëgtidi, ad ni bentzan con yag higo guin zajc güüнди, zajc guiëbidi loj guia' guie: “Biquied guie, bisob loj nijsdoo”, abi' zajc gajc zian. ²² Gra ni guiniabidi loj Dios, bal rliladxidi laaman, zunee-man laan.

*Xgualrniabee Jesús**(Mr. 11:27-33; Lc. 20:1-8)*

²³ Chi guyu Jesús lën yadooro' Jerusalén, la'tgaj culüüman bejn ree. Bixhioz rniabee ree bixhioz con ree guxtis Israel, gubig reeman loj Jesús, abi' gunabdiidx reeman, rëb reeman:

—¿Chu na güünl ni guin ree? ¿Chu banee gualrniabee lojl?

²⁴ Badxi' Jesúsán, rëbaman:

—Ziangajc naj yu' tijb ni ganabdiidxan lojdi, bal yadxi'dan dxel ganin lëjt chu banee gualrniabee günan ni guin ree. ²⁵ ¿Chu guxhaal Waj chigroobnijsaman bejn ree, Dios ya o bénguidxliuj?

Dxel guzuloj cayü reeman diidx, rëb reeman:

—Bal yaguie'ch ree, “Dios guxhaal laaman”, zanaman: “¿Chexza zeel ad bililadxtidi laaman?”

²⁶ Abi'za bal yaguie'ch ree: “bénguidxliuj guxhaal laaman”, radxeb ree yalen ree bejn din gra reeman rliladx gual Waj naj bën badëéd xtiidx Dios loj ree bejn.

²⁷ Dxel rëb reeman loj Jesús:

—Ad rayagbeetan.

Badxi' Jesúsán, rëbaman:

—Ni'qui naj ad zanitan lojdi chu banee gualrniabee günan ni guin ree.

Tijb bën guyu tio'p xi'n

²⁸ Basnuu Jesús rëbaman loj ree bixhioz rniabee ree bixhioz në loj ree guxtis Israel.

—¿Xhie nadi ni ganin lëjt? Tijb bejn guyu tio'p xi'nman, dxel rëbaman loj tijbix: “Xi'n, wej yandxej biguieen dxiin loj guiniaa yu' uv.” ²⁹ Badxi'xan, rëbix: “Ad zatan.” Per dxelri bayüjnx xgab zianz

wejx. ³⁰ Abi' rëbaman loj stijb xi'nman din chex, badxi'xan, rëbix: “Yo dad, gazacan.” Per ad wejtix.

³¹ Yan, ¿chu loj grop reex been ni rën xdad reex?

Badxi' reeman laan, rëb reeman:

—Xin rëbaman loj yaloj guin.

Dxel rëb Jesús loj reeman:

—Diidxiczi rnin, bën ruquijx ree impuest con ree béngunaa naban nadxuudx, yalojl laa reeman chu' lod rniabee Dios guial lojdi. ³² Din bi't Waj, bën baroobnijs bejn ree par gulüüman lëjt xhienaag guibandi, per ad bililadxtidi xtiidxaman. Guiáad ree bën ruquijx impuest con ree béngunaa naban nadxuudx, bililadx reeman xtiidxaman. Per lëjt majsi baguiaadi gra ree ni guin, ad bayüjntidi xgab por xtolidi din nililadxidi laaman.

Xcwent ree mojs guijdx

(Mr. 12:1-12; Lc. 20:9-19)

³³ Rëb tëë Jesús loj reeman:

—Yan, gol bacaagdiajg ganin lëjt stijb ni naj zi'c cwent. Guyu tijb bejn guxübinman uv ree loj xguiniaaman, dxel beenman gurajl gadëd ro'n, beenchaaw tëëman tijb luar lod grii xnijs uv guin, abi' bazoobaman tijb yu ya da't din guiya'p guidib guiniaa guin.

'Zianz badëëdaman laan garol loj ree bën güün dxiin lojn, zëtaman zijt. ³⁴ Chi bidxin dxej yaru' ree uv guin, guxhaalaman tio'p choon ree xmojsaman chigxii reeman ni rayalaman. ³⁵ Per ree bën rüjn dxiin loj guiniaa guin gunaaz reeman mojs guin ree. Tijbaman gudijn reeman, stijbaman bagüjt reeman, stijbaman bacaaguaaj reeman. ³⁶ Dxel

bén naj xguiniaan guxhaalaman mazri ree mojs guial loj ree bén we yaloj, per ziangajc beennë ree bén guin laa reeman.

³⁷ 'Ni bigra, guxhaal xi'nman guial gunaladxaman: "Zajpqui reeman da xi'nnan respejt." ³⁸ Per chi baguiaa ree bén guin xi'nman, rëb loj lasa' reeman: "Xin guinan naj xin tia' guidxliuj guin, yagüjt reex din gacan du xieen ree." ³⁹ Abi' gunaaz reeman laax, babëë reeman laax loj guiniaa guin dxel bagüjt reeman laax.

⁴⁰ Dxel gunabdiidx Jesús loj ree bén caneenëman, rëbaman:

—Chi yadxin bén naj xguidxliuj laan, ¿xhie naladxidi günnëman bén guin ree?

⁴¹ Abi' rëb reeman loj Jesús:

—Ad zayataman gugüjtaman bén guin ree, dxel gudëëman guidxliuj guin garol loj ree ben ren, bén yayü ni rayalaman chi guidxin dxej yaru' ree uv guin.

⁴² Dxel rëb Jesús loj reeman:

—¿Id wayolczidi loj xtiidx Dios ya? Lod rëb: Guiaj ni gulëëgo'n ree bén rüjn yu.

Laan goc ni mazri been sirv gojcnë yu guin.

Laan naj ni been Dios, abi' dád radxa du loj ree.

⁴³ Zeel rnin lojdi, zariicadi loj xguialrniabee Dios abi' ben ren ree yayu xluaridi, bén wali ree güün zi'c rënman. ⁴⁴ Abi' chutëöz bén yab guijc guiaj guin, zarooxaman, guiáad bal yab guiaj guin guijcaman zanidlojman.

⁴⁵ Chi biguiejn ree bixhioz rniabee ree bixhioz con ree bénfarisew guin ni cayü Jesús zi'c cwent, dxel gogbee reeman guial laa reeman cuza'taman.

⁴⁶ Abi' guyèn reeman niniaaz reeman laaman, per bidxeb reeman bejn ree guial rliadx reeman laaman naj Bén rudëéd xtiidx Dios loj ree bejn.

22

Xcwent guialruxhliaa

¹ Basnuu Jesús beman zi'c cwent loj reeman rëbaman:

² —Xguialrniabee Dios naj zi'c tijb rey Bén been lanijro' chi baxhliaa xi'nman. ³ Abi' guxhaalaman mojs ree bignee reeman biooz ree, per biooz guin ree ad guyënt reeman niej reeman. ⁴ Dxel guxhaalaman mojs ren ree, rëbaman loj reeman: “Gol güjdx loj ree biooz guin ma naj guialraw, ma gunabeen güjt ree da go'nan në ree beren, bero' ree. Ma najcchaaw graczi, gol güjdx loj reeman din gui't reeman loj guialruxhliaa guin.”

⁵ Per biooz guin ree ad bidxga't reeman xtiidx rey guin, yu' reeman zë loj xguiniaa, yu' reeman zë xmandad, ⁶ yu' tëë reeman gunaaz mojs guin ree gudijn reeman laa reeman abi' bagüjt reeman laa reeman. ⁷ Chi gogbee rey guin zian, dád bidxe'chaman. Guxhaalaman Bén naj ree xsuldadaman persi bagüjt reeman Bén guin ree baze'c tëë reeman lidx reeman. ⁸ Dxel rëbaman loj ree xmojsaman: “Graczi ma najcchaaw par loj guialruxhliaa guin, per ree Bén gunen ad najt guial ni't reeman. ⁹ Yan, gol wej lod radxaag lasa' ree nejz, gol güjdx loj ree Bén guidxaalojtzidi din gui't reeman loj guialruxhliaa guin.” ¹⁰ Abi' brii ree mojs guin wej reeman lunejz guin ree, bato'p reeman gra ree Bén bidxaalojtzidi reeman, zi'c ree

benmal zi'c ree benza'c, zian gudxa ree biooz lidx rey guin.

¹¹ Per chi guyu rey guin din guguaaman biooz guin ree, baguaaman tijb bén ad najcwt xab ni rayal gacwaman loj guialruxhliaa guin. ¹² Abi' rëb rey guin lojman: “Laadx lüj, ¿xhienaag beenl guyul guie abi' ad najcwt xabil ni rayal gacwil loj guialruxhliaa?” Dxel achet badxejl niëjb bén guin. ¹³ Zianz rëb rey guin loj ree bén cagui's guialraw: “Gol guxhii guia'x në yaax, gol bazaal tëëx xchu lod nacay da't lod goonx gaw tëë layix.” ¹⁴ Din zien ree bejn rdxejl, per ad grataman chu'.

¿Rayal gax impuest ya?

(Mr. 12:13-17; Lc. 20:19-26)

¹⁵ Dxel baza ree bénfarisew yagaj, abi' baya'n reeman diidx xhie guiniabdiidx reeman loj Jesús din guidoon xhie guiëbaman, zian chile' gutedia' reeman laaman. ¹⁶ Abi' guxhaal ree xbejn reeman con ree xbejn Herodes, rëb reeman lojman:

—Mextr, dunujn rayagbee guial lüj rniece diidxli, abi' walil rulüül guial xhienaag rën Dios guiban bejn, ad ridxga' tëëtil chu naj bejn. Din lojl tiblojzi naj bejn. ¹⁷ Guna du lojn: ¿Zagdxen ya yadijxan impuest loj César o ad zagdxetan ya?

¹⁸ Per gogbee gajc Jesús xgabmal ni cayüjn reeman, abi' rëbaman loj reeman:

—Bén rusquiee, ¿chexc zeel raguiilidi mod xhienaag gutidia'di naj? ¹⁹ Gol balüü tijb cintabl lon ni rguijxnëdi impuest.

Dxel badëed reeman tijban lojman, ²⁰ abi' gun-abdiidx Jesús loj reeman, rëbaman:

—¿Chu loj ca lojn chu tëë laj ca lojn?

²¹ Badxi' reeman laan, rëb reeman:

—Laj César në lojman.

Dxel rëbaman:

—Gol badëéd loj César ni naj xieen César, guiáad loj Dios gol badëéd ni naj xieen Dios.

²² Chi biguiejn reeman zian, dád badxaloj reeman, dxel basa'n reeman laaman, zianz zia reeman.

Gunabdiidx reeman xcwent guial yaban ree bengüt

(Mr. 12:18-27; Lc. 20:27-40)

²³ Dxejzii gajc tio'p choon ree bénsadusew wej reeman bignaj reeman Jesús, bénsadusew guin ree ad riladxt reeman guial yaban ree bengüt, zeel rëb reeman loj Jesús:

²⁴ —Mextr, Moisejs rëb guial bal guiët tijb xinguaaw abi' achut xi'n reex guyu con lacheelix, bijch xingüt guin guxhliaanë béngunaa bizëjb guin din chu' xi'n reex luar bijchix. ²⁵ Du lojn guyu tijb famil lod gojc reex gajdx bijch. Baxhliaa xin yaloj guin, per güjtix abi' guial ad guyut xi'nx, dxel bijch barojpax baxhliaanë béngunaa guin. ²⁶ Per ziangajc guzajc xin barojp guin abi' ziangajc guzajc xin bayon guin, xt bagajdx reex guzajc zian. ²⁷ Chi bara reex güjt dxel güjt béngunaa guin. ²⁸ Yan, chi yaban ree bengüt, loj guigajdx reex, ¿chu gac xbéngunaa laaman guial gra reex baxhliaanë laaman?

²⁹ Badxi' Jesúsán, rëbaman:

—¡Ragdxadi guial ad nünbeetidi xtiidx Dios ad nünbee tëetidi xhienaag naj xguialrniabeeman!

³⁰ Din chi yaban ree bengüt, ad zuxhliaatri reeman ad zudëéd tëetri xi'n reeman guxhliaa, ma

gac reeman zi'c ree anjl yu' xanyabaa. ³¹ Abi' xcwent ni yaban ree bengüt, ¿gadidi gool ya lod ca guial Dios gajc rëb: ³² “Naj naj xDios Abraham, xDios Isaac në xDios Jacob”? Abi' Dios ad naj-taman xDios ree bengüt, najman xDios ree bën naban.

³³ Chi biguiejn ree bejn zian, dád badxaløj reeman zi'c rulüüman laa reeman.

Mandamient mazri zojbloj

(Mr. 12:28-34)

³⁴ Chi gogbee ree bënfarisew guial achet badxejl niëjb ree bénsadusew loj Jesús, dxel baya'n reeman diidx badxaag lasa' reeman. ³⁵ Abi' tijb ree bënfarisew guin, bën naj mextr rajc ley, gunab-diidxaman loj Jesús din guidoon xhie guiëbaman, rëbaman:

³⁶ —Mextr, ¿con mandamientan mazri zojbloj loj gra ree mandamient ni zëed loj ley?

³⁷ Badxi' Jesúsán rëbaman:

—“Guyën xDadil Dios guidiblagaa guidib guijc guidib ladxil.” ³⁸ Laan naj mandamient mazri zojbloj. ³⁹ Ziangajc naj mandamient rarojp ni rëb: “Guyën ree bejn zi'c rën lüj gajc.” ⁴⁰ Con grop ree mandamient guie, ma cayüjn bejn cumplid gra ley bacaa Moisejs në ree ni bacaa ree bën badëë xtiidx Dios loj ree bejn.

Chu loj xdiaa za Cristo

(Mr. 12:35-37; Lc. 20:41-44)

⁴¹ La'tgaj nadxag lasa' ree bënfarisew guin, gunab-diidx Jesús loj reeman, rëbaman:

⁴² —¿Xhie xgab rüjndi por Cristo? ¿Chu loj xdiaa zaman?

Badxi' reeman laan rëb reeman:

—Loj xdiaa Davi.

⁴³ Dxel rëb Jesús loj reeman:

—Per, ¿chexquiza zeel por xSprijt Dios rëb Davi lojman, Dad? Din Davi rëb:

⁴⁴ Dios rëb loj bén rniabee naj:

“Gurej da ladbeen, xt gabecan xin rdxe'ch ree lüj guia'l.”

⁴⁵ Yan, bal xi'n Davi naj Cristo, ¿chexquiza zeel rëb Davi lojman Dad?

⁴⁶ Achutczi gojc nadxi' xtiidx Jesús, ni'czi tijb didx. Abi' diizd dxejzii achutczi bayax niniabdiidx xhienin lojman.

23

*Ni rüjn ree mextr rajc ley në ree bénfarisew
(Mr. 12:38-40; Lc. 11:37-54; 20:45-47)*

¹ Rëb Jesús loj ree bejn në loj ree xbejnman:

² —Mextr rajc ree ley con ree bénfarisew rulüü reeman xhie rën guiëb ni ca loj xley Moisejs. ³ Zeel gol bazoob xtiidx reeman, gol been tëë gra ni na reeman lojdi, per ad güündi zi'c rüjn reeman, din laa reeman ni ren na reeman abi' ni ren rüjn reeman. ⁴ Rniabee reeman güün bejn ni nawëëg da't, per rniabeezi reeman güün bejn zian, guiáad laa reeman ni'qui ta'n ad rüjnt reeman bejn yudar din güün reeman zi'c rën reeman. ⁵ Gra ni rüjn reeman, rüjn reeman laan din yadxaløj bejn laa reeman. Ruladx reeman guixhii lucwaj reeman në xu'c reeman tijb cint ni ca xtiidx Dios loj, ruladx tëë reeman gacw reeman lajd zagdxe. ⁶ Ruladx reeman cwe reeman lod rayal rbej ree bén zøjbloj,

loj tijb guialraw, abi' ziangajc rüjn reeman lën ree yadoo. ⁷ Ruladx tëë reeman gugajpdioz bejn laa reeman zagdxe niz lunejz guiëb tëë reeman loj reeman mextr.

⁸ 'Per lëjt ad sëëbladxidi guiniee bejn lëjt mextr, din tijbzi naj gradi, tijbzi mextr rajpidi abi' laaman naj Cristo. ⁹ Ni'qui tijb loj bénguidxliuj, bën ad najt xdadidi, ad guiëbidi dad, din tijbzi xdadidi yu', laaman yu' xanyabaa. ¹⁰ Ad güün tëëdi naguiejn yayagbee ree bejn lëjt zi'c bën rniabee, din tijbzi bën rniabee yu', laaman naj Cristo. ¹¹ Bén mazri zobjloj lojdi, laaman rayal güün sirv lojdi. ¹² Din bën rlies xvalor gajc achet lasajcaman. Guiáad bën rüjn naya, zajs xvaloraman.

¹³ ;iProbza lëjt mextr rajc ley në lëjt bënfarisew, bën rusquiee!, ad rtiëjbtidi gagbee ree bejn xhienaag din gac reeman xbejn Dios, ni'quiza lëjt ad rüjntidi naguiejn gaquidi xbejn Dios, abi' rudxoondi gac xbejn Dios bën rën ree gac xbejnman.

¹⁴ ;iProbza lëjt mextr rajc ley në lëjt bënfarisew, bën rusquiee!, din raca'di lidx ree béngunaa bizëjb, abi' din guiëb bejn guial benza'c lëjt dád xchej rbejdx rniabidi Dios. Zeel mazri castiro' yayalidi.

¹⁵ ;iProbza lëjt mextr rajc ley në lëjt bënfarisew, bën rusquiee!, zizadi guidibdoo rguilidi bën gac ree xbejndi, abi' chi ma beendi gan tijbaman al mazri xi'n xindxab rüjndi laaman guial lojdi.

¹⁶ 'iProbza lëjt, bënlutia'p!, rëbidi: “Achet güünan bal id züjn bejn ni guneeman, majsi ma baza'taman yadooro' Jerusalén, per bal guza'taman ni or yu' ree lën yadoo guin, dxel ma rüjn naguiejn güünman ni guneeman.”

¹⁷ ;iNatontidi, wed natia'p lojdi! ¿Conin mazri lasajc:

Or guin ya o yadoo beenle' or guin? ¹⁸ Rëb tëëdi: “Achet güünan bal id züjn bejn ni guneeman majsi ma baza'taman xialtar yadoo guin, per bal guza'taman gon dxiib loj altar guin, rüjn naguiejn güünman ni guneeman.” ¹⁹ ¡Bénlutia'p! ¿Conin mazri lasajc par lëjt: Gon guin ya o altar beenle' gon guin? ²⁰ Bén ruza't altar guin ad altar guintzan ruza'taman, nëgajc gra ni dxiib lojn ruza'taman. ²¹ Guiáad bén ruza't yadoo guin, ad yadoo guintzan ruza'taman, Diosan ruza'taman din lidxaman naj yadoo guin. ²² Abi' bén ruza't xanyabaa, Diosan ruza'taman në lod zojbaman.

²³ ¡Probza lëjt mextr rajc ley në lëjt bénfarisew, bén rusquiee!, rbëëcadi bidxtil, anís nëtëë comin ni rayal gudëëdi loj Dios, abi' ad ruzoobtidi xley Moisejs ni mazri zojbloj, ad rüjntidi zi'c rayal, ad rayat lasa'di, ad za'dxi'ch tëëtidi loj xnejz Dios. Laa reen rayal güündi, per ad cwëëladxidi gudëëdi ni rayal loj Dios. ²⁴ ¡Bénlutia'p, rajpidi cudad chitëë guiëbidi tijb bizëdlajs, abi' rguiejbidi tijb camell!

²⁵ ¡Probza lëjt mextr rajc ley në lëjt bénfarisew, bén rusquiee!, rusiadi xijch ree vajs në xijch ree pliajt naj nadxuudx, guiáad luxdoodi guidxa ni dxuudx, në guialgubaan nëtëë guialrdxe'ch lasa'. ²⁶ ¡Bénfarisew lutia'p: Yalojxgaj gol basia, zian guiguien waliquidi nayadi loj Dios!

²⁷ ¡Probza lëjt mextr rajc ley në lëjt bénfarisew, bén rusquiee!, najdi zi'c baa nayë' culor naquich, guijcan rguien nix da't, per lënan guidxa ree xdxijt bengüt në graloj ree ni dxuudx. ²⁸ Zian najdi, niz loj ree bejn, rulüüdi benza'c, per luxdoodi guidxa guialrusquiee në guialnaladx.

29 'iProbza lëjt mextr rajc ley në lëjt bénfarisew, bén rusquiee!, rüjndi xbaa ree bén badëë xtiidx Dios loj ree bejn, abi' rüjnchaawidi xbaa ree bén goc benza'c, 30 dxel rëbidi: “Bal nabajnan xtiamp ree dux béngulalan, ad nët dunujn nagüjt bén badëë ree xtiidx Dios loj ree bejn.” 31 Abi' con ni guin ree, rayünbeegajquidi guial loj xdiaa bén bagüjt ree bén badëë xtiidx Dios loj ree bejn zëedidi. 32 ¡Gol baloozza ni guzuloj been xbéngulalidi!

33 'iBëndol, xi'n xindxab! ¿Xhienaag laadi loj castiro' ni yu' gabijl? 34 Zeel gaxhalan lojdi bén gudëë ree xtiidx Dios, bén rajc ree në ree mextr. Per yu' reeman gugüjtidi, yu' reeman gucaadi loj crüjz, yu' tëë reeman quindi lën ree xyadoodi abi' sunalidi laa reeman guiedx por guiedx din güündi laa reeman xhienin. 35 Zianan zeel guijquidi yab xtol gra ree bén bagüjt bén goc ree benza'c diizd Abel bén guban xnejz loj Dios xt Zacarías xi'n Berequías, bén bagüjt reeman lule' yadooro' Jerusalén. 36 Diidxliczi rnin lëjt, xcasti gra ree ni guin yab guijc ree bén riga' loj guidxliuj yan.

Roon Jesús por Jerusalén

(Lc. 13:34-35)

37 Rëb tëë Jesús:

—¡Bén Jerusalén, bén Jerusalén, rugüjtidi bén rudëë ree xtiidx Dios loj ree bejn abi' rucaagua-jdi bén rxhiaal Dios lojdi! ¡Bëlczì volt guyënan nuchagan lasa'di, zi'c rüjn tijb guid ruchajg lasa' ree xi'nb lën xhiilib, per ad gutiëjbtidi! 38 Zianan zeel yaya'n ladxidi zi'c tijb guiedx lod achut zojb. 39 Abi' rnin lëjt diizd yan ad zuguaatrìdi naj, xt chi

guidxin dxej guiëbidi: “iNüjnle' Dios bën guxhaalaman!”

24

Rëb Jesús guial yaze'n yadooro'

(Mr. 13:1-2; Lc. 21:5-6)

¹ Chi barii Jesús lën yadooro' Jerusalén, ziaman, bibig ree xbejnman lojman balüü reeman gra ree xyu yadoo guin lojman. ² Abi' rëb Jesús loj reeman: —Diidxiczi rnin, gra ni cuguaadi yu' dxej ni'qui tijb guiaj guin ad zaya'nt guijc stijban, gran yaze'n.

Ni gac chi gad guidxliuj nit

(Mr. 13:3-23; Lc. 21:7-24; 17:22-24)

³ La'tgaj zojb Jesús guijc guial' la Olivos, gubig ree xbejnman lojman, rëb reeman: —Rayënan nal goc gac zian. ¿Xhie ree sen gac chi ma zidyob gui'til stijb, në chi ma zidyob nit guidxliuj?

⁴ Dxel rëb Jesús loj reeman:

—Gol gojp cudad achu gusquiee lëjt. ⁵ Din zien ree bejn gui't guiëb reeman guial por naj zëed reeman, guiëb tëë reeman: “Naj naj Cristo”, abi' zien bejn gusquiee reeman. ⁶ Per lëjt chi guiguiejndi cayajc wadijl o zëëb diidx guial gac wadijl, ad guidxebidi din zian naj gac. Per ad wadxint dxej nit guidxliuj. ⁷ Din til nacion con stijb nacion, në bën rajp guialrniabee con stijb bën rajp guialrniabee. Abi' gui't xudoxh në gubijn niz ni niz gue.

⁸ Gra ree nine ree gac chi ma suloj guialzi guin.

⁹ 'Dxel yayü ree bejn lëjt loj ree bën gusagzi lëjt, gugÿjt reeman lëjt, abi' gra ree bénguidxliuj

guidxe'ch lëjt guial najdi da bejnan. ¹⁰ Chi gac zian zien ree bejn gusa'n guialrliladx reeman naj, guidxe'ch lasa' reeman abi' yayü lasa' reeman loj ree bën ralen laa reeman. ¹¹ Gui't tēē zien ree bën gusquiee, guiëb reeman guial rudëed reeman xtiidx Dios, abi' zien bejn gusquiee reeman. ¹² Abi' guial dád zien ni mal gac, zien da't bën ad zëntri ree lasa'. ¹³ Per bën sudxi'ch loj guialrliladxaman naj, xt dxej chigra guibanman, laaman yayal xanyabaa. ¹⁴ Abi' xtiidx Dios ni canin lëjt yan guire'chan guidibczi guidxliuj din gagbee gra bejnan, dxelri nit guidxliuj.

¹⁵ Zianan zeel chi guguaadi zojb tijb ni dxuudx, ni ad rüjnt sirv lën yadooro' Jerusalén, zi'c gunee Daniel bën badëe xtiidx Dios loj ree bejn (bën gool gui'ch guie ree, gol bignia'), ¹⁶ guial bën zojb ree Judea rayal guxüün reeman che reeman dajn. ¹⁷ Guiáad ree bën yë'p guiyc yulidx dxejzii, ad yayu lënülix reeman par tia' xhie xieen reeman. ¹⁸ Abi' ree bën za' dajn, ad yayejc reeman chigxii xab reeman. ¹⁹ ¡Probza ree béngunaa nüü xi'n o bën ca' ree xindobëz lën ree dxejzii! ²⁰ Gol gurejdx gunab Dios chitëe gac zian tiamp nayaag o dxej raziiladx ree bejn ya. ²¹ Din nadxel dád guialziro' chu', zi'c ad wayajtczi diizd guia'xchej chi gad guidxliuj gacchaaw ad yu' tēet dxej gac zian. ²² Abi' bal id Dios gucwëez guialzi chu' lën ree dxej guin, ni'qui tijb bejn ad zalaat, per gucwëezaman laa reen por ree bën guleman.

²³ Lën ree dxejzii bal chu na lojdi: “Gol baguiaa, laa Cristo za' guie”, o “Gol baguiaa laaman za' ni”, ad bal chililadxidi. ²⁴ Din zi't zien ree bën gusquiee

na guial laa reeman naj Bén guxhaal Dios o na reeman guial laa reeman naj Bén rudëed xtiidx Dios. Abi' züjn reeman milagr ree në graloj ni yadxaloj bejn din gusquiee reeman laa reeman, abi' bal zile'n xt në ree Bén gulej Dios gusquiee reeman. ²⁵ Ma rni xgajn lojdi ni gac. ²⁶ Zeel bal chu na lojdi: “Gol baguiaa laa Cristo za' niz loj yujbidx”, ad bal chedi o na reeman lojdi: “Laa Cristo yu' lënü ni”, ad bal chililadxidi. ²⁷ Din zi'c chi rë'p nijs, abi' rulaan bacha' niz lod rliejn gubijdx xt lod rëëzan, ziangajc gac dxej gui't Bén guxhaal Dios stijb. ²⁸ Bén rililadx ree naj gui't reeman lon, zi'c chi rado'p ree golbich lod naga' tijb begüt.

Gui't Bén guxhaal Dios stijb

(Mr. 13:24-37; Lc. 21:25-33; 17:26-30, 34-36)

²⁹ Chi ma gudëd ree dxej ni gac ree guialzi guin, guicajy loj gubijdx, ad zusnit bëëw, guiyajb ree bajl xanyabaa abi' gra ree ni yu' xanyabaa guiniib. ³⁰ Dxel guiguien tijb sen xanyabaa guial ma gui't Bén guxhaal Dios. Abi' gra ree bénguidxliuj goon da't chi guguiaa reeman Bén guxhaal Dios, rdiinman bacha' zëëdaman loj zäj con xguialrniabeman. ³¹ Dxel guixhiaal ree xianjlaman, abi' rejs da't gucwejdx reeman trompejt, din yadxajg lasa' ree Bén guleman, Bén za' ree gralad guidiblagaa guidxliuj.

³² 'Yan, gol baguiaa xhienaag rajc con tijb yag higo. Chi ma naquie'n xidxan, chi ma caydxib ree xbalagan, lëjt ragbee guial ma zëëd tiamp nalaa. ³³ Ziangajc chi guguiaadi ma cayajc ree ni guin, gagbeedi guial ma zidyob gac zi'c rnin

lëjt. ³⁴ Diidxliczi rnin lëjt guial gra ree ni guin gac chi gad ree bën naban yan guiët. ³⁵ Guidxliuj në xanyabaa zanijt reen, per da diidxan ad zanijtan.

³⁶ 'Per achut ragbee xhie dxejn në xhie horan gac zian, ni'qui ree anjl yu' xanyabaa, ni'qui Xi'n Dios ad ragbeet. Tijbzi da Dadan Dios ragbee.

³⁷ 'Zi'c goc gulal chi guban Noé, zian gac chi yaguaaad Bén guxhaal Dios. ³⁸ Din chi gad Dios guixhiaal guiadoxh loj guidxliuj, bejn ree, raw reeman, rë' reeman, ruxhliaa reeman, rudëë tëë xi'n reeman ruxhliaa, xt chi bidxin dxej guyu Noé lën barcwro' ni beenman. ³⁹ Abi' ad bidxgatczi reeman, dxejlczi gol guiadoxh abi' zinë nijs laa reeman, ziangajc gac chi yaguaaad Bén guxhaal Dios. ⁴⁰ Dxej guin, lod za' tio'p ree xinguaaaw dajn, tijbix yaza, stijbix yaya'n. ⁴¹ Guiáad lod cayojt tio'p ree béngunaa, tijbaman yaza, stijbaman yaya'n.

⁴² 'Zeel gol guzujsin din ad ragbeetidi xhie dxej yaguaaad xDadidi. ⁴³ Gol been xgab, bal tijb bejn ragbee xhie guxhin xhie tëë horan chu' xingubaan lidxaman cwanx, zabejnaaman abi' ad zatiëjbtaman chu' xingubaan guin lidxaman. ⁴⁴ Zianan zeel gol guzujsin, din ad ragbeetidi dx-ejlczi yaguaaad Bén guxhaal Dios.

*Mojs za'c në mojs guiidx
(Lc. 12:41-48)*

⁴⁵ '¿Chu lëjt naj zi'c tijb mojs rusa'n xpatronx lidxaman din gulenx gra ree mojs, gudëë tëëx ni gaw reeman chi gal hor? ⁴⁶ Xiquilbaa mojs cayüjn dxiin zi'c rayal chi yadxin xpatronx. ⁴⁷ Din diidxliczi rnin lëjt, patron guin zusa'n gra xieenman

loj mojs guin. ⁴⁸ Per bal naj mojs guin mojs dxu-udx, naladnix: “Zaglaari da patronan.” ⁴⁹ Zianz suloj gusagzix los demazri ree mojs guin, suloj gawix, guië'në tëëx xingu' ree. ⁵⁰ Abi' yadxin xpatronx tijb dxej ni ad ragbeetix ad rbëz tëëtix laaman. ⁵¹ Dxel dád castiro' gudëed patron guin laax, guixhiaal tëëman laax lod rayal ree bën rusquiee, lod goonx gaw tëë layix.

25

Xcwent chii biinxdüb

¹ Basnuu Jesús rëbaman:

—Loj xguialrniabee Dios gac zi'c guzac ree chii biinxdüb we loj tijb guialruxhliaa cwa' tijbgaj xguij reem bilëz reem xin cuxhliaa guin. ² Gaay reem been xgab xhie güün reem, per za gaay reem ad beent xgab. ³ Biin ad beent ree xgab guin binë xguij reem per ad binët reem mazri sejt ni che'cnë ree guij guin. ⁴ Guiáad ree biin been xgab guin xhie güün reem, binë reem za tib lumejtgaj sejt con xguij reem. ⁵ Abi' guial goglaa badxin xinruxhliaa guin, bi't bacaal loj gra reem, abi' goodyëjs reem. ⁶ Cost garol guiaal, biguien cha' tijb bejn rëbaman: “¡Laa xinruxhliaa guin ma ziaad, gol tagchaaglojx!” ⁷ Dxel bixche gra ree biinxdüb guin, abi' beenchaaw xguij reem. ⁸ Abi' gaay ree biin ad beent xgab guin xhie güün reem, rëb reem loj za gaay biin been xgab guin: “Gol baneesii tibda'n xsejtidi, din dux guijn ma cayü' reen.” ⁹ Per badxi' reemin rëb reem: “Yajqui, din dool ad zadaantan par lëjt ni'qui par dunujn. Zagdxeli gol wëj lod rdo'n din siidan par lëjt gajc.” ¹⁰ Abi' la'tgaj

zë reem zisii reem sejt, bidxin xinruxhliaa guin, abi' za gaay ree biin been xgab guin gyunë reem laax loj guialruxhliaa guin dxel bida'cw ro' port. ¹¹ Dxel chi badxin za gaay biin bisii ree sejt guin, rëb reem: “iDad, dad, guxhal din yadxu'n!” ¹² Per badxi'xan rëbix: “Diidxliczi rnin, ad nünbeetan lëjt.”

¹³ Dxel basnuu Jesús rëbaman:

—Zeel gol guzusin din ad ragbeetidi goc yaguaaad Bén guxhaal Dios.

Xcwent bén badëéd milia

¹⁴ Dxel rëb tëë Jesús:

—Xguialrniabee Dios naj zi'c tijb bén ma grii cheman zijt, abi' gurejdx ree xmojsaman, basa'n xmiliaman loj reeman. ¹⁵ 'Loj tijbaman badëëman gaay mil cintabl, loj zatijbaman badëëman zatio'p milan, guiáad loj zatijbaman badëëman za timilan. Loj tijbgaj reeman badëëdaman ni naladxaman zajc güünnë reeman dxiin, dxel briitaman zëman zijt. ¹⁶ Abi' mojs cwa' gaay mil cintabl guin beennëman laan dxiin abi' beenman gan za ziant gajcan. ¹⁷ Ziangajc been mojs cwa' tio'p milan, beenman gan za tio'p mil gajcan. ¹⁸ Per mojs cwa' timil cintabl guin bitëënman luyuj persi baquie'chaman cintabl guin ni badëëd xpatronman.

¹⁹ 'Gojc xchej da't dxel badxin patron guin abi' babëëman cwent con la reeman. ²⁰ Yaloj bidxin mojs cwa' gaay mil cintabl guin abi' bayüman zagaay milan, rëbaman: “Dad, lüj banee gaay milan lon, yan, laa za gaay milan guie ni benan gan.” ²¹ Dxel rëb patron guin lojman: “Zagdxen, mojsza'c, zagdxe beenl, guial zagdxe beenl con

tibda'n ni banen, yan, gunen mazri guial loj ni banen. Guyu, babaa con naj.” ²² Zianz bidxin mojs cwa' zatio'p mil cintabl guin rëbaman: “Dad, lüj banee tio'p milan lon, yan, laa zatio'p milan guie ni benan gan.” ²³ Dxel rëb patron guin lojman: “Zagdxen, mojsza'c, zagdxe beenl, guial zagdxe beenl con tibda'n ni banen, yan, gunen mazri guial loj ni banen. Guyu, babaa con naj.”

²⁴ 'Per chi bidxin mojs cwa' timil cintabl guin, rëb loj xpatronman: “Dad, naj ragbee guial ad rayatil bejn, rabëël guialnaza'c lod ad rgu'til bin, rato'p tëël guialnaza'c lod ad rtie'chtil bin. ²⁵ Zeel bidxeban abi' biquiechan xmilial lën liuj, yan, laa xmilial guie.” ²⁶ Badxi' patron guinan, rëbaman: “Mojs mal, mojs ploj, bal ragbeel rabën guialnaza'c lod ad rgu'tan bin, ratop tëën guialnaza'c lod ad rtiechtan bin. ²⁷ Adil nilu' da milian lën bancw, din chi naguialan naca'n'an con xi'n'an ni beenan gan.” ²⁸ Dxel rëb patron guin loj ree bën za' yagaj: “Gol biquied timil cintabl guin lojx, gol badëëdan loj xin rajp chii milan. ²⁹ Din bën rajp zaca'man mazri, abi' gapaman zro' da't, per bën rajp ta'nzi, xt ni rajpaman chiquied lojman. ³⁰ Abi' mojs ad rünjt sirv guin gol bazaalix xchuni lod nacay, lod goonx, lod gaw tëë layix.”

Xguialguxtis Jesús

³¹ 'Chi gui't Bén guxhaal Dios, gui'taman con xguialrniabeeman, në con gra ree xianjlaman din cweman lod nabeeman. ³² Dxel gra ree bénguidxliuj yado'p lojman, abi' cweman laa reeman zi'c rünj tijb bën rajp xiil chi rabëëcaman xiil

ree loj ree dxib. ³³ Abi' guzujman b n naj ree xbejnman xladbeeman, gui ad ree b n ad najt xbejnman guzujman xladruvejsaman. ³⁴ Dxel gui b rey guin loj ree b n za' xladbeeman: “Gol guda b n ma n jnle' da Dadan. Gol guyu loj guialrniabee najcchaaw par l jt, diizd chi go'tchaaw guidxliuj. ³⁵ Din chi gulaanan, baneedi ni gudawan, chi we'can nijs, baneedi ni gu'n, chi bizaan zi'c tijb benzit, baneedi lod baya'nan. ³⁶ Chi byaadx da xaban, l jt banee ni go'tan, chi gogxuun, bidgatixlojdi naj, abi' chi guyu'n ladxguiib, bidganajdi naj.” ³⁷ Dxel gui b ree b n za' ladbee guin: “Dad,  goc baguiaan l j rliaanl, abi' baneen ni gudawil?,  o goc baguiaan l j we'quil nijs, abi' baneen nijs gu'l? ³⁸  Goc baguiaan l j zizal zi'c tijb benzit, abi' baneen lod baya'nl, o goc biyaadx xabil, abi' baneen ni gotil? ³⁹  Abi' goc baguiaan l j ragxuul, o guyul ladxguiib, abi' budganajn l j?” ⁴⁰ Dxel gui b rey guin loj reeman: “Diidxiczi rnin lojdi, gra yudar beendi da bejn reen majsi ad najt reeman b n lasajc, najn beendi yudar.”

⁴¹ 'Dxel gui baman loj ree b n za' xladruvejsaman: “Gol biquied lon, benmal gol chej loj bajl ni ad yu't dxej yay ' ni ma naj par xindxab n  ree xbejnx. ⁴² Din chi gulaanan, ad baneetidi ni niawan, chi we'can nijs, ad baneetidi ni ni 'n. ⁴³ Chi bizaan zi'c benzit, ad baneetidi lod naya'nan, chi biyaadx da xaban, ad baneetidi ni nia'cwan. Abi' chi gogxuun n  chi guyu'n ladxguiib, ad bidganajtidi naj.” ⁴⁴ Dxel gui b reeman lojman: “Dad,  goc baguiaan l j rliaanl o re'quil nijs, o zizal zi'c tijb benzit, o goc baguiaan l j ryaadx xabil, o ragxuul,

o yu'l ladxguiib, abi' ad bayidxga'tan lüj?" ⁴⁵ Abi' yadxi'man laan guiëbaman: "Diidxiczi rnin lëjt, gra ni ad beentidi din nünjndi yudar da bejn reen majsi ad najt reeman bën lasajc, najn ad beentidi yudar." ⁴⁶ Laa reeman yayal loj casti tiblayaa, guiáad ree bën been zi'c rayal, laa reeman rayal guialnaban tiblayaa con Dios.

26

Baya'n reeman diidx xhienaag guiniaaz reeman Jesús

(Mr. 14:1-2; Lc. 22:1-2; Jn.11 :45-53)

¹ Chi gulox gunee Jesús diidx guin ree, dxel rëb loj ree xbejnman:

² —Lëjt ragbee guial ryaadx zatio'p dxejzi guial guidxin lanij pascw, abi' Bén guxhaal Dios yayü ree bejn laaman din tiaman loj crüzj.

³ Lën ree dxejzii badxaag lasa' ree bixhioz rniabee ree bixhioz, con xguxtis ree bën Israel, lidx Caifás quijb bixhioz zobjloj. ⁴ Ni baya'n reeman diidx xhienaag gusquiee reeman Jesús din guiniaaz reeman laaman, abi' gugüjt reeman laaman. ⁵ Per rëb reeman:

—Ad zaguieent ree zian loj lanij guin chitëë gac naquie' luguiedx guin.

Ruroob tijb béngunaa perfum guiyc Jesús

(Mr. 14:3-9; Jn.12 :1-8)

⁶ Chi za' Jesús luguiedx Betania lidx Simón, bën rniee reeman Leproso, ⁷ bidxin tijb béngunaa ca'man tijb lumejt guidxan perfum ni lasajc wayëjx. Abi' la'tgaj zobj Jesús xan mex, baroobaman perfum guin guiyc Jesús. ⁸ Chi baguiaa ree

xbejn Jesús ni been béngunaa guin, dád bidxe'ch reeman, abi' rëb reeman:

—¿Chexc zeel bixie' perfum guin? ⁹ Zile' nido'n zro' da't din nüjnan yudar bénprob ree.

¹⁰ Chi biguiejn Jesús ni canee reeman, rëbaman loj reeman:

—¿Chexc zeel rdxe'chidi béngunaa guin? Zagdxe naj ni beenman naj. ¹¹ Din bénprob guin ree zianczi za'në reeman lëjt, sa'n naj ad ziantczi gazunë'n lëjt. ¹² Abi' ni baroobaman perfum guin guican, rën guiëban guial ma beenchaaw xgajman naj par chi guiguie'chan. ¹³ Diidxliczi rnin, bantëz guin guire'ch xtiidxza'c Dios loj guidxliuj, zü ree bejn gra ni been béngunaa guin por naj, din gusaaladx reeman laaman.

Rayü Judas Jesús

(Mr. 14:10-11; Lc. 22:3-6)

¹⁴ Loj guidxiptio'p ree xbejn Jesús, bén la Judas Iscariote, bigneenëman bixhioz rniabee ree bixhioz, ¹⁵ rëbaman loj reeman:

—¿Plac guneedi din yanen Jesús lojdi?

Abi' badëed reeman gajlbichii milia plajt lojman. ¹⁶ Diizd dxejzii guzulojman raguuilaman mod xhienaag yayüman Jesús.

Gudawnë ree xbejn Jesús xche

(Mr. 14:12-25; Lc. 22:7-23; Jn.13 :21-30; 1Co.11 :23-26)

¹⁷ Dxej ni guzuloj lanij ni raw ree bejn guiadxtil ni ad yu't levadur, gubig ree xbejn Jesús lojman, rëb reeman:

—¿Ban guin rënl yaguieenchaawan ni yadaaw ree guxhin lanij pascw?

18 Badxi' Jesúsán rëbaman:

—Gol chej Jerusalén lidx Bén guin, gol biguiedx lojman: “Na Mextr: Ma bidxin xihoraman abi' rënman tédaman pascw lidxil con ree xbejnman.”

19 Dxel been ree xbejnman zi'c rëbaman, been tée reeman ni gaw reeman guxhin lanij pascw.

20 Chi gure guiaal, zobj Jesús xan mex con guidx-iptio'p ree xbejnman. 21 Abi' la'tgaj cayaw reeman, rëbaman loj reeman:

—Diidxiczi rnin, tijb gajc lëjt yayü naj.

22 Abi' dád gyunaya reeman, zianz guzuloj rni-abdiidx tijbgaj reeman loj Jesús, rëb reeman:

—¿Najn ya, Dad?

23 Badxi' Jesúsán, rëbaman:

—Bén cayaw loj pliajt ni cayaw gajcan, laaman yayü naj. 24 Walican, Bén guxhaal Dios naj guial sacaman zi'c rëb loj xtiidx Dios. Per jprobza Bén yayü laaman!, zagdxeli naj par laaman ad niutaman loj guidxliuj.

25 Dxel Judas Bén yayü Jesús, gunabdiidxaman rëbaman:

—Mextr, ¿wen najn ya?

Badxi' Jesúsán, rëbaman:

—Lüjn.

26 La'tgaj cayaw reeman, cwa' Jesús guiadx-til, badëédaman quixtëe loj Dios. Dxel gula'man guiadxtil guin gudi'saman laan loj ree xbejnman, rëbgajman:

—Gol gudaw guiadxtil guie, laan naj da cuerpan.

27 Dxel cwa'man tib cojp vin, chi gulox badëédaman quixtëe loj Dios, badëédaman cojp guin loj reeman, rëbgajman:

—Gol gu' gradi loj cojp guie. ²⁸ Din laan naj da reynan ni gaxhie'n chi guiëtan por zien ree bénguidxliuj. Din por da guialgüjtan guixal tijb nejj cüb xhienaag gap ree bejn perdon loj Dios por xtol reeman. ²⁹ Abi' diidxiczi rnin lëjt ad yu'tri dxej guië'n vin rajcchaawnë uv, xt chi guidxin dxej guië'në'n lëjt vin cüb lod rniabee da Dadan.

*Rëb Jesús guial guiëb Bëd ad nünbeetaman laaman
(Mr. 14:26-31; Lc. 22:31-34; Jn.13 :36-38)*

³⁰ Chi gulox biil reeman tijb cant par Dios, dxel zë reeman guijc guia' Olivos. ³¹ Abi' rëb Jesús loj reeman:

—Gradi zabëëladx naj yan guxhin, zi'c ca loj xtiidx Dios lod rëb: “Gugüjtan bën rajp ree xiil, dxel guire'ch ree xiil guin.” ³² Per chi yabanan, yaloj naj ganeed ga gajn Galilea dxelri gui'tidi.

³³ Dxel rëb Bëd lojman:

—Majsi gra reeman cwëëladx lüj per naj ad yu't dxej gabëladxan lüj.

³⁴ Per rëb Jesús lojman:

—Diidxiczi rnin lojl, yan guxhin gajc chi gad guid cwidxa', mal rëbil choon volt guial ad nünbeetil naj.

³⁵ Abi' rëb Bëd lojman:

—Majsi guiëtnë'n lüj, per ad yu't dxej guiën guial ad nünbeetan lüj.

Abi' gra ree xbejn Jesús ziangajc rëb reeman.

*Gurejdx gunab Jesús Dios lod la Getsemani
(Mr. 14:32-42; Lc. 22:39-46)*

³⁶ Chi bidxin Jesús con ree xbejnman tijb luar la Getsemaní, rëbaman loj reeman:

—Gol gurejsii guie, la'tgaj gan ni din gabedx ganaaban Dios.

³⁷ Dxel zinëman Bëd con grop ree xi'n Zebedeo, zianz guzuloj cayunayaman abi' ad nixtri yu' luxdooman. ³⁸ Zianz rëbaman loj reeman:

—Dád yu'naya luxdoon, rulüü ma gugüjt guialyu'naya guin naj. Gol baya'n guie ad gaayëjsidi.

³⁹ Dxel zë Jesús mazri delant abi' gurerulojman gurejdx gunabaman Dios, rëbaman:

—Dad, bal zile' yabëël naj loj guialzi ni gadëëdan, per ad gac zi'c rënan, gac zi'c rënl.

⁴⁰ Dxel baguiajman lod za' ree xbejnman, abi' baguiaaman naga'yëjs reeman, zianz rëbaman loj Bëd:

—¿Wen ni'qui tib hor ad bile't natie'ch xbaaalidi ya, din sunëdi naj? ⁴¹ Gol batie'ch xbaaalidi gol gurejdx gunab tëë Dios, chitëë güün xindxab lëjt gan, din rënquidi güüندی zi'c rayal, per xcuerpidi ad rtiëjbtan.

⁴² Ni barojp volt wejman gurejdx gunabaman Dios, rëbaman:

—Dad, bal id zile' tëd guialzi ni naj gadëëdan, bal rüjn naguiejn gadëëdanan gacri zi'c rënl.

⁴³ Chi badxinman lod za' ree xbejnman stijb, laa reeman naayëjs guial dád guidxa bacaal loj reeman. ⁴⁴ Dxel basa'nman laa reeman stijb, zëman, bayon volt cabejdx canabaman Dios con diidx guin gajc ree. ⁴⁵ Chi badxinman lod za' ree xbejnman, rëbaman loj reeman:

—¿Sta naga'yëjsidi ya, cayziiladx tëëdi? Guiáad Bén guxhaal Dios ma bidxin hor yayü reeman laaman loj ree bëndol. ⁴⁶ Gol bixche, yo' ree, gol baguiaa laa bén yayü naj ma zëëd gajxh.

*Gunaaz reeman Jesús**(Mr. 14:43-50; Lc. 22:47-53; Jn.18 :2-11)*

⁴⁷ Sta caneenë Jesús Bén naj ree xbejnman, chi bidxin Judas Bén naj gajc tijb xbejn Jesús. Bidxinnëman zien ree bejn, ca' reeman espad në yag. Guxhaal ree bixhioz rniabee ree bixhioz con ree xguxtis ree Bén Israel laa reeman. ⁴⁸ Abi' Judas Bén bayü laaman mal rëb xgajman loj ree Bén guin: “Bén gawan xid xhajg, laaman raguilidi, gol gunaazaman.” ⁴⁹ Chi bidxin Judas bibigaman loj Jesús, dxel rëbaman:

—¡Xchan, Mextr!

Laa gudaw gajcaman xid xhajgaman.

⁵⁰ Abi' rëb Jesús lojman:

—Judas, been ni zidguieenl.

Dxel gubig ree Bén guin, gunaaz reeman Jesús persi zinë reeman laaman.

⁵¹ Per tijb ree Bén za'në Jesús yagaj, gulëë xiespadaman dxel gutü'man guidiajg xmojs quijb bixhioz zobjloj. ⁵² Dxel rëb Jesús lojman:

—Bagu'chaaw xiespadil xluaran. Din Bén rdil con espad, con espad rëjtaman. ⁵³ ¿Wen, id ragbeel ya guial zajc gabledx ganaab da Dadan, abi' laa guixhiaal gajcaman por mil ree xianjlaman din gagnë reeman naj? ⁵⁴ Per ¿xoza gac cumplid zi'c ca loj xtiidx Dios ni rëb guial rüjn naguiejn gac ree ni cayajc?

⁵⁵ Loj hor guin gajc rëb Jesús loj ree benzien guin:

—¿Chexc zeel zëedidi con espad në con yag din guiniaazidi naj zi'c tijb xingubaan? Guixie guixie guzunë'n lëjt lën yadooro' Jerusalén balün lëjt xtiidx Dios, abi' ad gunaaztidi naj. ⁵⁶ Per gra ree

ni guie cayajc din gac cumplid ni bacaa ree bén badëë xtiidx Dios loj ree bejn.

Loj hor guin gajc baxüün ree xbejn Jesús, guro'nladx reeman laaman.

Za' Jesús loj ree guxtis Israel

(Mr. 14:53-65; Lc. 22:54-55, 63-71; Jn.18 :12-14, 19-24)

⁵⁷ Bén gunaaz ree Jesús binë reeman laaman lidx Caifás, quijb bixhioz zojbloj, yagaj badxaag lasa' ree mextr rajc ley con ree xguxtis ree bén Israel. ⁵⁸ Abi' Bëd zijt zijt nalaman Jesús, xt lule' lidx bixhioz guin. Dxel guyuman abi' gurejnëman bén rajp ree lidx bixhioz guin, din guguaaman xhie güünnë ree bén guin Jesús.

⁵⁹ Guiáad ree bixhioz rniabee ree bixhioz con gra ree guxtis guin raguiil reeman xhie gusquiee reeman din gutedia' reeman Jesús din nabee reeman guiëtaman. ⁶⁰ Per ad radxejlt xhienaag gutedia' reeman laaman majsi zien ree bén basquiee. Dxel bibig zatio'p reeman, ⁶¹ rëb reeman:

—Bén guie rëb: “Zile' yase'n nan xyadoo Dios abi' loj choon dxejzi yayünanan.”

⁶² Dxel guzuli quijb bixhioz zojbloj guin, rëbaman loj Jesús:

—¿Nid zadxi'lan ya? ¿Waliqui ni canee ree bén guin contr lüj ya?

⁶³ Per achet rëb Jesús. Dxel rëb bixhioz guin lojman:

—Por Dios bén naban, rniabeen lüj guna diidxli. Guna bal lüjn naj Cristo, Xi'n Dios.

⁶⁴ Badxi' Jesús san rëbaman:

—Waliquil. Rni tëën lëjt, zuguaadi Bén guxhaal Dios zojbaman xladbee Dios bén rajp guialrniabee abi' zuguaaa tëëdi gui'taman loj zaj xanyabaa.

⁶⁵ Chi biguiejn bixhioz guin zian, gudixya' xabaman, rëbaman:

—Diosan caneeguijdx Bén guin. ¿Xhie mazri rüjn naguiejn yadiil ree testiw? Lëjt gajc ma biguiejn guial rnieeguijdxaman Dios. ⁶⁶ Yan, ¿xhie nadi?

Badxi' ree Bén guinan rëb reeman:

—Rayal guiëtix.

⁶⁷ Dxel bacojp xhiejn reeman lojman, gudijn reeman laaman, yu' tëë reeman wëëz ro'man, ⁶⁸ rëb reeman lojman:

—Bal lüjn naj Cristo, guneeya' chu gudin lüj.

Rëb Bëd ad nünbeetaman Jesús

(Mr. 14:66-72; Lc. 22:56-62; Jn.18 :15-18, 25-27)

⁶⁹ La'tgaj zojb Bëd lule' lidx bixhioz guin, gubig tijb biin rüjn dxiin yagaj, rëbim lojman:

—Në lüj nal Jesús, Bén Galilea.

⁷⁰ Per Bëd gurexuuman, rëbaman niz loj gra reeman:

—Ad ragbeetan xhienin rnieel.

⁷¹ Chi zëman niz ro' port baguiaa stijb biin rüjn dxiin yagaj laaman, abi' rëbim loj ree Bén riga' yagaj:

—Në Bén guin nal Jesús Bén Nazaret.

⁷² Per Bëd gurexuuman stijb, xt baza'taman Dios, rëbaman:

—Ad nünbeetan Bén guin.

⁷³ Dxel ad gojct xchej, gubig ree Bén riga' yagaj loj Bëd, rëb reeman lojman:

—Laa rguien gajc në lüj naj xbejn reeman, din zi'cgajc rniee reeman rnieel.

⁷⁴ Per Bëd baza'taman Dios, rëbaman loj reeman:

—Dios gudëed naj casti bal rusquieen, per ad nünbeetan bën guin.

Hor guin gajc guridxa' tijb guid. ⁷⁵ Abi' basaal-adxaman guial rëb Jesús lojman: “Chi gad guid cwidxa', mal rëbil choon volt ad nünbeetil naj.” Dxel barii Bëd yagaj abi' dád naya biinman.

27

Binë reeman Jesús loj Pilato

(Mr. 15:1; Lc. 23:1-2; Jn.18 :28-32)

¹ Chi bani luyuj, gra ree bixhioz rniabee ree bixhioz con ree guxtis Israel baya'n reeman diidx xhienaag güün reeman din guiët Jesús. ² Dxel guxhii reeman laaman abi' binë reeman laaman loj gobernador Pilato.

Güjt Judas

³ Dxel Judas, bën bayü Jesús, chi baguiaaman guial ma naj guiët Jesús, guyunayaman, abi' bayüman gajlbichii milia plajt guin loj ree bixhioz rniabee con loj ree guxtis Israel, ⁴ rëbaman loj reeman:

—Ma benan dol guial banen tijb bën achet dol rajp.

Badxi' reeman laan rëb reeman:

—Xhieczi yaguieenan, ¡lütj gunaj!

⁵ Abi' bazaar Judas milia guin lën yadooro' Jerusalén zianz bariiman wejman bigxhii yëjnman.

⁶ Dxel bato'p ree bixhioz rniabee guin milia guin, abi' rëb reeman:

—Ad rayalt yadxé' ree milia guin lën lod ru gon, din con laan bio' bën guiët.

⁷ Dxel be reeman diidx, abi' con milia guin guzii reeman xguidxliuj bën rüjn trast bajn ree, din gacan lod guiguie'ch ree benzit. ⁸ Zeel xt yan la guidxliuj guin Yuj Rejn. ⁹ Zian gojc cumplid ni gunee Jeremías, bën badëë xtiidx Dios loj ree bejn, chi rëbaman: “Cwa' reeman gajlbichii milia plajt, prejs ni rëb ree bën Israel lasajcaman, ¹⁰ abi' con milia guin guzii reeman xguidxliuj bën rüjn trast bajn ree, zi'c gunabee Dios naj.”

Rniabdiidx Pilato loj Jesús

(Mr. 15:2-5; Lc. 23:3-5; Jn.18 :33-38)

¹¹ Dxel badxig reeman Jesús loj gobernador Pilato, abi' gunabdiidxaman loj Jesús, rëbaman:

—¿Lüjn naj xrey ree bën Israel ya?

Badxi' Jesúsán, rëbaman:

—Najcan.

¹² Abi' chi cutedia' ree bixhioz rniabee ree bixhioz con ree guxtis Israel laaman, achetzi radxi'man. ¹³ Dxel rëb Pilato lojman:

—¿Nid riguiejnl gra ni canee reeman contr lüj ya?

¹⁴ Per Jesús ni'qui tijb diidx ad badxi'taman, zeel dád badxa loj gobernador guin.

Gunabee reeman guiët Jesús

(Mr. 15:6-20; Lc. 23:13-25; Jn.18 :38-19:16)

¹⁵ Lën ree dxej lanij, ruslaa gobernador Pilato tijb bën yu' ladxguiib bën guiëb ree bénguiedx guin laa, zi'c naj xcostumbr reeman. ¹⁶ Lën ree dxejzii

yu' Barrabás ladxguiib, tijb b́en núnbee ree bejn niz ni niz guie. ¹⁷ Abi' chi badxaag lasa' gra ree bejn, gunabdiidx Pilato loj reeman, rēbaman:

—¿Chu rēndi guslaan? ¿Barrabás ya, o Jesús, b́en rēb ree bejn naj Cristo?

¹⁸ Rēbaman zian guial gogbeeman ganaxzi guial-nadēdlojn zeel bayü reeman Jesús.

¹⁹ La'tgaj zobj Pilato lod rüjnman guialgux-tis, bidxin xruson lacheelaman, rēbaman lojman: “Adxhie güünnēl b́en guin achet dol rajpaman, din dád nadxuudx gune'xchalan laaman nuche.”

²⁰ Per bixhioz rniabee ree bixhioz con ree guxtis Israel, badxe' reeman diidx gra ree bejn persi gunab reeman guslaaman Barrabás, guiáad Jesús guiētaman. ²¹ Gunabdiidx Pilato loj reeman stijb, rēbaman:

—¿Chu loj grop reeman rēndi guslaan?

Badxi' reeman laan rēb reeman:

—Barrabás.

²² Abi' rēb Pilato loj reeman:

—¿Xhieza günnē'n Jesús, b́en rēb ree bejn naj Cristo?

Badxi' gra reeman laan rēb reeman:

—¡Bacaaman loj crüjz!

²³ Abi' rēb Pilato loj reeman:

—¿Xhieza ni mal beenman?

Per laa reeman mazri rejs rbixdiaj reeman, rēb reeman:

—¡Bacaaman loj crüjz!

²⁴ Chi baguiaa Pilato guial achet rile' güünman, al mazri naquie' cayüjn ree b́en guin, dxel cwa'man nijs abi' banaaman delant loj gra reeman, rēbaman:

—Achet dol ra'pan guial guiët bén guie, xcwentidan.

²⁵ Badxi' gra ree bén guinan rëb reeman:

—¡Du guijcan, në guijc du xi'nan cwiban guial guiëtaman!

²⁶ Dxel baslaa Pilato Barrabás, zianz gunabee-man gudijn reeman Jesús abi' bayüman laaman din gucaa reeman laaman loj crüjz.

²⁷ Zianz xsuldad ree gobernador guin binë reeman Jesús lën palas lod bado'p gra ree suldad, gadëd lod za'man. ²⁸ Dxel gulëë reeman xabaman bascajcw reeman laaman tijb lajd xnia. ²⁹ Abi' beenchaaw reeman tijb coron guiëjch badxe' reeman laan guijcaman, zianz baga's reeman tijb yag ladxaaman ladbee. Dxel bazuxib reeman lojman, ruze' reeman laaman, rëb reeman:

—¡Guibanri xrey ree bén Israel!

³⁰ Abi' rucojp xhiejn reeman lojman, laagajc tëë yag ni ca'man rugaz reeman guijcaman. ³¹ Chi gulox baze' reeman laaman, dxel babëë reeman lajd xnia guin ladaman, bascajcw reeman xabaman, zianz zinë reeman laaman din gucaa reeman laaman loj crüjz.

Cwa Jesús loj crüjz

(Mr. 15:21-32; Lc. 23:26-43; Jn. 19 :17-27)

³² Chi zinë reeman Jesús, badxaagloj reeman tijb bén Cirene, laman Simón, abi' been reeman laaman naguiejn byaaman xcrüjz Jesús.

³³ Chi bidxin reeman tijb luar la Gólgota (rën guiëban Xluar Calaver), ³⁴ ni badëëd reeman vin, no'chan nijs nala da't guië' Jesús. Per chi beenman laan prueb, ad cwëjbtaman nië'man laan.

³⁵ Chi gulox bacaa reeman laaman loj crüzj, dxel gudxijt reeman suert guiyc xabaman din yala' reeman laan. ³⁶ Dxel gurej reeman yagaj din gap reeman laaman. ³⁷ Abi' guiyc crüzj guin bacaa reeman lejtr ni rëb, chexc zeel cwaman loj crüzj. Rëb lejtr guin: “BEN GUIE NAJ JESÚS XREY REE BEN ISRAEL.”

³⁸ Në tio'p xin gubaan bacaa reeman loj crüzj, tijbix xladbee Jesús stijbix xladruvejsaman. ³⁹ Abi' ree bën rdëd, rnieeguijdx reeman Jesús, runij guiyc reeman, ⁴⁰ rëbgaj reeman:

—Lüj rëb, nuse'nl yadooro' abi' loj choon dxejzi nayüjnlan, baslaa lüj gajc. Bal walil najl Xi'n Dios baguiajt loj crüzj guin.

⁴¹ Ziangajc ree bixhioz rniabee ree bixhioz në ree mextr rajc ley con ree guxtis Israel, ruze' reeman Jesús, rëb reeman:

⁴² —Baslaax ben ren ree, abi' ad rajct ruslaa laa-gajquix. Bal wali najx xrey ree bën Israel, yaguaiajtix loj crüzj guin, din yaliladx reex. ⁴³ Rililadxix Dios. ¡Yan, guslaaza Dios laax, bal wali rënman laax, din rëbix: “Xi'n Dios najx”!

⁴⁴ Abi' nëgajc ree xingubaan ca cwë'man ruze' laaman.

Güjt Jesús

(Mr. 15:33-41; Lc. 23:44-49; Jn. 19 :28-30)

⁴⁵ Dxel diizd garol dxej bicajy loj guidib guidxliuj, xt raca choon wadxe. ⁴⁶ Loj horzii gurixdiajman rejs da't, rëbaman:

—Elí, Elí, ¿lama sabactani? —rën guiëban: Dios, Dios, ¿chexc zeel gulëëladxil naj?

⁴⁷ Yu' ree b́en za' yagaj, chi biguiejn reeman, rēb reeman:

—Laaman cabejdx Elías, b́en badēē xtiidx Dios loj ree bejn.

⁴⁸ Laa baxüün gajc tijbaman bicajdxaman tijb xiil loj vinagr, abi' bacaaman laan loj tijb yag zianz badxigaman laan ro' Jesús din guiē'man laan. ⁴⁹ Per rēb los demazri reeman:

—Basa'nx, din yaguaiaa ree don zidgaslaa Elías laax ya.

⁵⁰ Zianz gurixdiaj Jesús rejs da't stijb, dxel güjtaman. ⁵¹ Loj hor zii goxya' lajd nal lēn yadooro' Jerusalén gojcan tio'p lala', diizd guiyc guin xt guia' guin goxya'. Abi' guxu, gula' tēē ree guiajro'.

⁵² Guiáad ree baa bixal reen, abi' zien ree bejn b́en naj xbejn Dios, b́en ma güjt ree baban. ⁵³ Dxel chi baban Jesús, barii lēn xbaa reeman, abi' guyu reeman Jerusalén, lod baguiaa zien ree bejn laa reeman.

⁵⁴ Dxel suldad rniabee ree suldad nē gra ree suldad za'nēman yagaj canaj reeman Jesús, chi baguiaa reeman caxu nē gra ni cayajc, dád bidxeb reeman abi' rēb reeman:

—Walican Xi'n Dios b́en guin.

⁵⁵ Zien ree béngunaa guzanal Jesús diizd Galilea, b́en been tēē ree laaman yudar, za' reeman zijt ruguiaa reeman ni cayajc. ⁵⁶ Loj reeman no'ch María Magdalena, nē Li xniaa Santiaaw con Xiēb nētēē xniaa ree xi'ngaan Zebedeo.

Biguie'ch Jesús

(Mr. 15:42-47; Lc. 23:50-56; Jn.19 :38-42)

⁵⁷ Chi gure guiaal, bidxin tijb benrijcw laman Xiēb, b́en Arimatea, nē laaman binal Jesús.

⁵⁸ Wejman loj Pilato, bignabaman xcuerp Jesús. Dxel gunabee Pilato bayü reeman cuerp guin lojman. ⁵⁹ Abi' cwa'man cuerp guin batüübaman tijb lajd naya. ⁶⁰ Dxel biquie'chaman laaman lën tijb baa cüb ni gudëenman par laagajcaman lën tijb guiaj. Zianz basiaawaman ro' baa guin con tijb guiajro', ziataman. ⁶¹ Abi' zojb María Magdalena con stijb bën la gajc Li, ro' baa guin.

Rajp ree suldad ro' xbaa Jesús

⁶² Chi bareguiaal, dxej raziiladx ree bejn, wej ree bixhioz rniabee ree bixhioz në ree bënfarisew, bigneenë reeman Pilato, ⁶³ rëb reeman lojman:

—Dad, rasaaduladxan, chi ziz naban bën rusquiee ni, rëbaman guial chi gac choon dxej yabanman. ⁶⁴ Zeel gunabee guiyaawdxi'ch ro' baa guin xt chi gac choon dxej, chitëë gui't ree xbejnman guxhin cwan reeman xcuerpaman. Abi' guiëb reeman loj ree bejn guial ma babanman. Abi' mazri gusquiee reeman bejn guial loj ni yaloj.

⁶⁵ Dxel rëb Pilato loj reeman:

—Laa ree suldad za' yagaj. Gol chinë reeman, gol basiaawdxi'ch ro' baa guin zi'c rëndi.

⁶⁶ Abi' zë reeman, dxel basiaawdxi'ch reeman ro' baa guin. Zianz basa'n reeman suldad guin ree cayajp reeman laan.

28

Raban Jesús

(Mr. 16:1-8; Lc. 24:1-12; Jn. 20 :1-10)

¹ Chi gudëd dxej raziiladx ree bejn, bareguiaal chidumíngw, María Magdalena con stijb bën la

gajc Li biquiaa reeman ro' baa guin. ² Dxel bi't tijb xudoxh, guial biguiajt tijb xianjl Dios dizd xanyabaa, dxel bibig anjl guin ro' baa guin biquiedaman guiaj nayaaw ro'n, zianz gurejman guijcan. ³ Dád rliajman bacha' zi'c chi rë'p nijs, guiaád xabaman naquichbëjn. ⁴ Chi baguiaa ree suldad guin anjl guin, binij reeman guial dád bidxeb reeman xt badaj reeman abi' biyajb reeman luyuj. ⁵ Dxel rëb anjl guin loj ree béngunaa guin:

—Ad rdxebidi, ragbeen cayguillidi Jesús bën cwa loj crüjz. ⁶ Per achutri laaman guie, ma babanman zi'c naman. Gol guida nial din guguaadi lod gudixh reeman laaman. ⁷ Yan, gol baxüün gol bicojn ree xbejnman guial ma babanman, ma nedaman lojdi zëgajman Galilea, ni guguaadi laaman. Ni nezan naj ni rugojnan lëjt.

⁸ Dxel cari da't baza reeman ro' baa guin rdxeb reeman rabaa tëë reeman, ruxüün reeman zia reeman zicojn reeman xbejn Jesús. ⁹ La'tgaj zia reeman, balüüloj Jesús loj reeman, bagajpdiozaman laa reeman. Abi' bibig reeman lojman, bazuxib reeman, gudiidx reeman guia'man, ¹⁰ abi' rëbaman loj reeman:

—Ad rdxebidi. Gol chej, gol biguiedx loj ree da bejnan din che reeman Galilea, ni guguaa reeman naj.

Ni rëb ree suldad

¹¹ La'tgaj zia ree béngunaa guin, në tio'p choon ree suldad cayajp ro' baa guin zë luguiedx guin zicojn reeman bixhioz rniabee ree bixhioz gra ni goc. ¹² Dxel wej ree bixhioz rniabee guin bigneenë

reeman guxtis Israel ree persi baya'n reeman di-idx xhie güün reeman. Abi' dad zro' milia badëöd reeman loj ree suldad guin, ¹³ rëb reeman:

—Con gol güjdx loj ree bejn: “Guxhin la'tgaj nadoodyëjsan, bi't ree xbejn Jesús abi' gulan reeman xcuerpaman.” ¹⁴ Abi' bal gagbee gobernador, dunujn yaneenë' laaman chitëë xhie güünnëman lëjt.

¹⁵ Dxel cwa' ree suldad guin milia guin abi' been reeman zi'c rëb reeman. Laan naj diidx ni nare'ch loj ree bën Israel xt yan.

Rxhiaal Jesús bën naj ree apóstoles

(Mr. 16:14-18; Lc. 24:36-49; Jn.20 :19-23)

¹⁶ Guidxiptib ree xi apóstoles Jesús, wej reeman Galilea, guiyc tijb guia' lod rëb Jesús che reeman.

¹⁷ Abi' chi baguiaa reeman Jesús, bazuxib reeman lojman, majsi yu' reeman ad bililadxza'ct. ¹⁸ Dxel bibig Jesús loj reeman, rëbaman:

—Dios ma banee gra guialrniabee din ganabeen xanyabaa në loj guidxliuj. ¹⁹ Zeel, gol chej guidib guidxliuj, gol biglüü ree bejn din gac reeman da bejnan. Gol baroobnijs reeman por dux Dad ree, por Xi'nman në por xSprijtaman, ²⁰ gol balüü tëë reeman din guzoob reeman diidx gra ni ma rnin lëjt. Abi' naj gazunë' lëjt gradxejczy xt chi nit guidxliuj. Amén.

Xtiidx Dios
New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files
dated 29 Jan 2022

fb4ebcb8-e1f4-5bfc-b08c-f590e137d86d